

ЭРКИН АЪЗАМОВ

**ОТОЙИНИНГ ТУГИЛГАН
ЙИЛИ**

ҚИССА ВА ҲИКОЯЛАР

*Тошкент
Гафур Гулом номидаги
Адабиёт ва санъат нашриёти
1981*

Ўз
4 95

70803—20
A M352(04)—81 171—81 4803010000

© Faafur Fулом номидаги Адабиёт ва санъат нашриёти, 1981 й.

ОТОЙИННИГ ТҮФИЛГАН ЙИЛИ

ШАРТАҚИЛИК ҚИССАСИ

Айтсам — ўлдиурлар,
Айтмасам — ўлам...

„Ошиқ Гариф ва Шәхсанам“
достонидан

Машрабнинг оти нега Машраб? Она қорнида йиғлагани учунми? Ажабо, у нимага йиғлаган экан?

Табиийки, туғилётганда одамзод фарёд билан дунёга келади. (Нега?) Табиийки, уни дарҳол овутишга тушадилар. (Тинчлик керак!) Табиийки, у бир пайт йиғидан тұхтайды. (Тұхтамаса-чи?) Аммо баъзилар шунга одатланыб қолади. Демек, йиғласа — овутишади, йиғласа — юпатишади, овутышса, юпатышса — йиғламаслик лозим. Албатта, у бир күн гүдаклика хос күз ёшини унутади — жиіддій, расмана одамга айланади. «Болалигингда йиғлоқи эднинг», десалар, «Бекор гап», дея кулимсираб құяди.

Башарты бандаси она қорнида йиғласа-чи — Машраб бўладими? Феъл-атвори ҳам унга ўхшайдими?

Ривоятларга кўра, бир кимса туғилган чоғида ҳар қанча уринмасинлар, овутмасинлар, йиғини бас қиямаган экан. Юзини тимдалаганча уввало чинақиравмиш. «Йиғлоқироқ чиқди-да», деб ўзларига тасалли беришибди. Бироқ у гүдаклик ёшидан ўтиб кап-катта бола бўлганида ҳам одати одат — арзиган-арзимаган нарса учун ўзини ерга уриб ҳўнграгани ҳўнграган экан. Улғайгани-

дан кейин бирор унга «Сиркаси сув кўтармайдиган хи-
лидан», деб баҳо берса, бирор «Инжиқ, кўзига ҳамма
нарса хунук кўринадиган бадбин», бошқа бирор эса,
«Дунёга тўрвасининг йиртиғидан қарайдиган девона»,
дер экан. Лекин бари бир ҳамма-ҳамма негадир ундан
алланечук ҳайиқаркан. Айтишларича, оламдан ўтаётга-
нида ҳам пешонасига шапатилай-шанатилай, юзларини
тиrnай-tirnay, фарёд чека-чека кўз юмган экан.

Мабодо у ҳам Машраб сингари она қорнида истидъо
этмаганмикан?

Мен ўзимни ўша зотга ўхшатаман; бу ривоят мен ва
мен кабилар ҳақида бўлса керак, деб ўйлайман.

Лекин менинг отим Машраб эмас — Асқар, Асқар
Шодибек ўғли!

Беш боласини ҳам қўшиб хотинини уйдан ҳайдаган
тоғасига:

— Энди бир дурбин топинг, бўйинга осасиз-да, ўт-
ган-кетган қиз-жувонни томоша қили-иб юрасиз,— дея
бетамизлик билан ақл ўргатса;

«Зарнинг зўри»ни уқтиришга уринган севгилисига:

— Денгиз чифаноғининг ярасини... тўрт юз сўмга со-
тиб олиш мешчанлик-ку!—деб такаллуф дарчасини тақа-
тақ ёпса;

Лекцияни нима учун ёзиб олмаётганини сўраган дом-
ласига:

— Дарсликда бор гапларни кўчириб ўтиришга одаг-
ланмаганман,— деб саркашлик қилса...

Ким бўлди бу?

Ана шундай, ҳамма мени отасини ҳам танимайдиган
шартаки, беандиша, дейди. Бу гапда қанчалик жон бор—
ёлғиз худога аён. Лекин шуниси аниқки, нима ҳақда бўл-
масин, кимга, қайси шароитда эканидан қатъий назар,
доимо кўнглимдаги гапнинг индаллосини айтиб қўя қо-
лишга ошиқаман. Дастлабки танишувдаёқ суҳбатдошим-
ниг юзига «кўзгу» тутаман — марҳамат қилиб асл ба-

шарасини кўрсин! Шу одатим туфайли неча бор каллам ғурра бўлди, неча-неча марталаб панду пушаймон едим. «Бугундан бошлаб тамом, энди асло бундай қилмайман!», дея онт ичавериб қасам мен учун сувга айланди. Тўғри гап туққанингга ёқмайди, аммо иложим йўқ; ростини айтмасам — ичимда яна бир одам пайдо бўлиб, мени билан баҳлашади, мени гўр азобига солади; айтмасам — талай вақт ўзимга келолмай, дунёдаги энг пачоқ ожиз кимсадек хўрланаман; айтмасам — бир неча кун танимда типратикан ўрмалагандек безовтаю беҳузур юраман. Менга қийин, лекин начора? Сут билан кирганини жон билан чиқармиш, яъни буクリнинг давоси — гўр. Нима деймиз — мен юзига «кўзгу» тутганилар шунга умид боғлаб сабр қилсинглар! Уларга ҳам қийин, лекин начора?

Нега мен бунақаман? Нега курсдошим Мадҳиддинга ўхшаб майнзек мулойим, икки гапнинг бирида «Раҳмат, раҳмат», деб турадиган ювош, сертавозе эмасман?

Онамнинг гапига қараганда, гўдаклигимда жуда инжиқ, йиғлоқи эканман. «Апа, олабўжи!», деб сандиқни тақијллатишсагина андак тинчирканман. «Олабўжи кела-вериб» сандиқнинг ўша жойи ейилиб кетибди.

Болаликда эса бобомнинг эркаси эдим, қаёққа борса әтагига илашиб юрардим. Бобом оқшомлари кўча бўйидаги супада қари-қартанглар билан гурунглашиб ўтиради. Асом мискар деган ғаламироқ бир қўшнимиз ёмонни яхшилаб, яхшини ёмонлаб гапиришни хуш кўтиради. Унинг маломатларини эшитганда бошқалар жимгина маъқуллаб қўйишарди. Аммо бобом, агар **у** бирон-бир одамни асоссиз мақтай бошласа, «Қўйинг, мискар! — дерди сўзини чўрт кесиб. — Оғзим бор, деб гапираверасизми? Тилни танглайга босиша ҳикмат кўп. Сиз айтган мардумни яратганига худонинг ўзи ҳам пушаймон бўлса керак. Ё анов куни садақа йўлига берган тўрт bog бедаси тилингизни шундай бурро қилиб қўйидими?» Мискар бирон одамни ноҳақ қоралашга тушганда

эса, «Гуноҳга ботишни бунча хуш кўрасиз-а, биродар? — дерди бобом бош чайқаб. — Кошкийди, ҳамма сиз айтган кишидек покдомон бўлса — дунё беҳиштга айланиб кетарди. Ё кечаги бозор қўйини арzon-гаров бермагани шунчалик алам қиляптими?»

Бобомнинг гапидан кейин даврадагилар ерга қараб қолишаарди. Шунда у қўзимга авлиёсифат кўриниб, ғуруланиб қўярдим.

Ўша бобонинг невараси бўлиб улғайдим. Мактабда директоримизнинг ясан-тусандан бошқасига нўноқроқ қизига ошириб баҳо қўйғанларида дарсдан чиқиб кетгим келарди. Энди эса — мутлақо иқтидорсиз, лекин ўзига беҳад бино қўйған маҳмадона курсдошим Бўстоннинг, ҳуснига ишонибми, бир кун шоира бўлиб қолсам ажаб эмас, деган ночор илинжда эринмай қалам қитирлатиши ғенсамни қотиради; ҳеч қачон имтиҳонга кирмай, ҳамиша аълочилар рўйхатида юрадиган чаламулла Маратнинг мансабдор отаси соясида безбетларча гердайиши ғазабимни келтиради; домлалар ортидан номатлуб жойларга ҳам шарпадек әргашиб боришдан тоймайдиган Жавлибой Мелибоевнинг хушомадгўйлиги нафратимни қўзғайди; ва ниҳоят Мадҳиддиннинг...

Мадҳиддинни ҳамма мақтайди, ҳамма яхши кўради. Биламан, уни бугун университетда мақтайдилар, эртага ишхонасида, жамоат ўртасида мақтайдилар. У эса — қарда, кимга, қайси шароитда бўлмасин — ҳамиша қўлини кўксига қўйғанча, «Раҳмат, раҳмат», деб ё илжайиб, ё ишшайиб, ё тиржайиб тураверади. Ҳатто тушида ранжитган одамидан ҳам эртаси келиб астойдил узр сўрайди.

Мадҳиддиннинг нимасидир талабалар орасида «Савлатхонов» деб номи кетган домла Зиёҳон Аҳмадхоновни эслатади. Биламан, ўқишини битиргач, у аввал албатта кичик илмий ходим бўлади, кейин албатта катта илмий ходим! Аввал амал-тақал қилиб юз эллик қофозни тўлдиради-да, фан кандидати увонига эришади, кейин

ўшангага яна икки юз бет (инсофига қараб!) қўшса ки-
фоя — фан доктори! Бир кун у қўққисдан кўзойнак та-
қиб чиқади — «Илмдан!», дейдилар; сочи тўкилади —
«Илмдан!», дейдилар; мансабу шон-шуҳрат кўйида ов-
сардек паришонхотир бўлиб қолади — «Илмдан!», дей-
дилар, «Домла, домла», деб улуғлай бошлайдилар. Қў-
лингдан нима келади — кўзидан кўзойнакни ололмасанг,
бошига қайтадан соч ўстиролмасанг... Мана, домла
Зиёхон Аҳмадхоновлар қандай пайдо бўлади!

Биламан, Мадҳиддин Салоҳиддиновнинг ошиғи олчи.
У ҳозир ювошгина талаба, эртага — таъзимкор аспирант,
индини — силлиққина фан кандидати, бир кун қараб-
сизки — салобатли фан доктори, профессор! Салобатли
Салоҳиддинов ёки оддийгина — «Мадҳиддинжон ака!»
Марҳамат, тенглашиб кўринг, қани, бўй берармикан!

Биламан, Мадҳиддин узоқ яшайди. Негаки, ҳеч ким-
га ҳеч қачон озор бермайди, ўзи ҳам ҳеч кимдан ҳеч қа-
чон озор кўрмайди; ҳар қандай қабиҳлигу олчоқликка
дуч келганида ҳам тошдек тураверади, асабини аяб,
тинчини бузмайди — нариги дунё учун!

Ҳа, Мадҳиддиннинг ошиғи олчи, узоқ яшайди. Дарво-
қе, шундай яшаса ҳам бўлади-ку: ҳеч кимни ранжитмай,
ҳеч кимдан ранжимай, тинчгина, силлиққина? Қайтага
яхши эмасми, осон эмасми?

Баъзан ўзимча: «Шу феълимни ташласам, балодек
зеҳним бор-а, улуғ одам бўлиб кетсан ҳам ажаб эмас»,
деган хаёлларга бораман. Чунки улуғликка етиш учун
теран ички осойишталик ва икир-чикирлар оламидан ба-
ландроқ туриш жуда муҳим эмиш. Буни бизга психоло-
гия домламиз Махсумов айтган. Унинг ўзи ҳам чакана
эмас — фан кандидати, ана шундай ҳикматли гапларга
тўла ёстиқдек дарслик ёзган!

Махсумов — узоқ яшашиб сирини биладиган одам; бу-
нинг учун умрни ҳуда-бехуда қисқартирмаслик лозим,
деган ақнадага амал қиласди. уни бирон-бир нарса билан
ажаблантириш, ҳайратга солиш мушкул: гўё аввэл ҳам

бир марта дунёга келгану бу гуноҳкор заминдаги бор-
буд сир-синоатни бошидан кечирган, энди эса оддий одам
боласи етолмайдиган юксакликдан қараб, бамисоли
яратганинг ўзгинаси: «Эҳ, шўрлик бандалар, ҳолларинг
шу-да», деган каби мудом виқорли нимтабассум қилиб
туради. Юз ифодаси суратда чизиб қўйилгандек — асло
ўзгармайди. Дарсда ҳам ана шундай хотиржам, оғир-
карвон; оғзидан чиқадиган гапни пойлаб эсинг кетади.

Нозикроқ бир масалада у билан мунозарага борга-
ним эсимда. Қизишиб кетиб анча-мунча ўринсиз гаплар-
ни айтиб юборганимни кейин пайқадим. Аммо у заррача
парво қилмади, юзида нимтабассум, суратдек қотиб ту-
раверди. Навбатдаги дарсида, танаффус чоғи мени четга
тортиб, соғлиғимни, туриш-турмушимни суриштириди, не-
гадир қайси рангни яхши кўришимга ҳам қизиқди. Сўнг-
ра қўлимга аллақандай дори бериб: «Мана шундан ис-
теъмол қилиб туринг, — деди сирли товушда. — Қизиқ-
қонроқ экансиз, унинг устига ҳамма нарсага норозилик
билан қарайсиз. Асабни аянг, ука, керак бўлади».

Ерлиғига «Элениум» деб ёзилган бу матаҳни меди-
цина институтида ўқийдиган собиқ синфдошимга кўр-
сатган эдим, «Ие, асабни тинчлантирадиган дори-ку,
мияси сал анақароқ бўлиб қолганларга берилади», деди
кулиб. Домланинг нияти менга биродарона бир меҳри-
бонлик қилиш эканини тушуниб турганимга қарамай,
бу гапни эшитиб ғазабландим. Ҳайтовур, калламда бир
шумлик ярқ этди-ю, кўнглим жойига тушди, ҳатто ин-
тиқом нашъасини туйгандек севиниб кетдим. Ўша оғай-
нимнинг тавсияси билан дорихонадан элениумга тескари
таъсир этувчи бир дори сотиб олдим-да, эртаси уни де-
канат томон бораётган курсбошимиз Раҳматиллага тут-
қазиб, Махсумовга бериб қўйишни тайнилладим. «Домла-
га жуда зарур нарса, — дедим жиддий ўқтириб. — Тав-
сия қофози ичиди. Ҳа, дарвоқе, айтиб қўй: у киши кунда
бир марта эмас, кўпроқ ичиб турсалар ҳам зиён қил-
майди».

Махсумов кек сақламас экан: на навбатдаги дарсида, на кейин менга бирор нима деди — юзида ўша нимтабас-сум, бир-икки марта бош чайқаб қўйди, холос. Тўғри-да, асабини бузиб, мендек телбанамо бир болага тенг бўлиб ўтирадими? Узоқ яшаш учун умрни ҳуда-бехуда қисқартираслик лозим!

Хуллас, токи шу одатим бор экан, улуғлик у ёқда турсин, жўнгина одам бўлиб юришим ҳам гумонга ўхшайди. Бу дарди бедаво нега келиб-келиб менга илашган? Бировга яқинлашай, биров билан дўстлашай дейман, аммо тарки одат — амримаҳол, беихтиёр яна севимли «кўзгум»ни ишлатиб юбораману икки кунда мендана безадилар-қоладилар. Шунда шоир Вознесенскийга қўшилиб: «О тангirim, ўзимга ўхшаган тағин бир одамни яратгин», дея муножот қиласман.

Дастлаб ўқишга келган йилим ҳам ана шу касалим панд берган эди. Тепакал, юзи қонталаш ёшгина домла имтиҳонда жавобимни эшитиб, «Яхши, тўрт қўямиз», деганида ади-бади айтишиб ғашига тегдим, «Мана сенга олти!» — дея баҳони босиб, қофозимни қўлимга тутқазди. Имтиҳондан чиқдим, Эскижўва бозорига бордим, ёғоч оёқли бир кишидан ҳуштак сотиб олдим, Хадрага ўтдим, йўл бўйидаги панжараларда мусичадек тизилганча ўтгап-кетганга ган отиб ўтирган безорибашара болалар сафига қўшилдим, кечгача ҳуштагимни чурилладим, биров ижирғаниб қаради: «Жинни бўлганми бу?», биров бепарво ўтди: «Дунёда безори камми?», ҳеч кимса «Дардинг надир?», деб қизиқмади. Оқибат — кундуз қишлоғимиз яқинидаги довонда машинадан тушиб, кечаси овлоқ кўча билан уйга кириб бордим, «Мактабда зўр ўқиган бола» бўлганим учун таниш-билишлардан, айниқса, муаллимларимдан уялиб кўчага чиқмай ётганимда ҳарбий комиссарликдан келган қоғоз мушкулимни осон қилди. Уйдагилар ҳам шуни кутиб юришгани эканми, «Шояд, болалигини ўша ёқларга ташлаб, қуюлиб келса», деган умид-илинжда мени қўшқўллаб куза-

тишди. Уч йил флотда хизмат қилдим. Уч йилнинг қанча муддатини карцерда ўтказдим — ёлғиз ўзиму бир худо билади. Гоҳ мичманга гап қайтариб жазога йўлнқаман, гоҳ яна бир бало. Хуллас, уйдагилар истагандек, «болалигимиш ўша ёқларга ташлаб» келолмадим — кўзим қиймади, яна ўзим билан олиб қайтдим. Қайтгач, ҳайтовур, бинойидек бўлиб университетга ўқишга кирдим; акаминг уйида яшай бошладим. Менга қолса-ку, ётоқхонага жойлашмоқчи эдим, аммо уйдагилар акамга: «Ўзинг қараб турмасанг бўлмайди», деб тайинлашган.

Акам фан кандидати, илмий-текшириш институтида ишлайди; обрўси жойида шекилли, тўрт хонали уйи бор; иккала жияним ҳам қишлоқда — акам меҳмонларига айтганидек, «бобой-момойнинг тарбиясида». Шундай бўлғандан кейин бу ерда — акам билан янгамнинг меҳрибон тарбиясида мен яшамай ким яшасин: кийим-кечагим доим ювилган, овқатим тайёр, беминнат.

Дастлабки икки йил акамнинг тазиёки остида «болалик қилмай», босиқ юришга уриндим. Лекин ҳануз бу ердагилар ҳам, қишлоқдагилар ҳам мендан безиллаб туришарди — тинч қўймасдим-да.

Қишки таътилда уйга бориб, тоғам хотинини ҳайдаганини эшитдим. Хотинини ҳайдагач, эртасигаёқ мўйловини олдирибди ва гарч этигини кийганча башанг бўлиб кўча айланишини одат қилибди. Қарасам, қўли орқада, кинотеатр майдонида савлат тўкиб турган экан. «Тоға,— дедим ёнига бориб,— бу-у, мўйлов кўринмайди?» «Қирдик, жиян, қирдик», деди тоғам ички мамнуният билан пягини силаб. «Нима, оқ оралаб қолганими?» «Нўғ-э! Ортиқча мўй — танга юқ, деб эшитдик». «Шундай эканими, ҳа-а. Энди бир дурбин топинг,—дедим маслаҳат бериб,— ўтган-кетган қиз-жувонни томоша қилиб юрасиз. Бўйинга оси-иб... Маза-да!» «Андишани тупуриб ташлаб, раҳматли бобонгиздек нуқул қалампир чайиаб юрасиз-а, жиян», дея истеҳзоли илжайди тоғам.

Эртаси кунини яна ўша жойда, ўша важоҳатда кў-

риб, салом берган эдим, алик олмади. Эшитишимча, онамга: «Бу кетишда ўғлингиз одам бўлмайди», деган-миш. «Беш қоракўзни чирқиратиб, хотинини уйдан қув-ган эррайим одам саналаркан-да, яшасин-э!», дедим.

Қисқаси, ўқишимнинг дастлабки икки йили ана шундай бир нав осойишта ўтди. Сабаби — мен бошқаларга эмас, бошқалар менга анча мослашишган эди. Курсдошларим-ку қаршимда худди башарасига бехосдан мушт тушиб қоладигандек ҳадиксираб, типирчилаб туришарди.

Бироқ учинчи йили андишасизликни ҳаддан ошириб юбордим. Оширишга оширдим-у, кейин ўкиндим — бу галгиси хийла қимматга тушган эди.

Гап шундаки, мен адабиёт тарихи имтиҳонидан ўтмай туриб муҳаббат дардига мубтало бўлдим. Оқибатда на имтиҳондан ўтдим, на у дардга даво топдим. Энди ўйлаб кўрсам, имтиҳондан эсон-омон қутулган тақдиримда ҳам унга даво топишим гумон экан. Қолаверса, уйланиш фикри ҳали-вери хаёлимга келмасмиди...

Муҳаббат кўчасига кириб, мен у зотни бир йил сездим. Бир йил орқасидан соядек пошудларча эргашиб юрдим. Бир йил ўқишини йиғишириб, ёлгиз муҳаббат девоналиги билан машғул бўлдим. Йўқ, дарвоҷе, яна кўп бемаъниликлар қилган эканман: француз тилидан дарс берувчи дилбаргина муаллимамизниң дилига озор стказиб, деканатда танбеҳ эшиздим; севги ўтида қоврилиб, дарсга қатнамай қўйганимда, «Нега Мадҳиддиндек эмассан?», деб койнгани учун курсбошнимиз Раҳматилланинг юзига китоб отиб, ҳайфсанга эга бўлдим; бекатда бир қизни уялмай-нетмай телбаларча ўпиб олдим; жўжажўрзлигим эвазига кинотеатр биқинида безорилардан ўлгудек калтак едим; энг фожиалиси — домланинг юзига андишасизларча «кўзгу тутиб», адабиёт тарихи дарсига қатнашишдан маҳрум этилдим ва ҳоказо.

Мана энди, оқибати — ёзги таътил бошланиб, ҳамма ҳар ёққа тарқаб кетган бир пайтда кўр бўлиб кутубхонада

нада ўтирибман. Курсдошларимдан Эшқобил, Шаҳоб, Нурмамат ва Рустам қалб амри билан студентлар зарбдор қурилиш отряди сафида Қорақалпоғистонга кетишган — давримизнинг улкан иншоотларидан бирини бунёд этишда қатнашгани (пул ишлаб келиб бойваччалик қилгани); Самад, Жўра ва Назар қишлоқларига — «бойбой-момой»ларига кўмаклашгани (бултур ўзлари бориб тиклаб келган деворни қулатиб, қайтадан кўтаргани); Эльвира, Арофат ва Барно соғломлаштириш лагерига — паҳтадан ҳам оқ баданларини жиндак бўлса-да қорайтиргани (ўқиши бошлангач, танаффус пайти йўлакда «шоколадранг тери» ҳақида қизғин баҳслашгани). Мен эса м, мен Навоий номидаги кутубхонада ўтирибман... адабиёт тарихидан қайта имтиҳон топширгани! (Отойининг туғилган йилини аниқлаш учунгина эмас, албатта!)

Ташқарида — гуркираган ҳаёт, ичкарида — ёш-ёш, тепакал, бир юз неchanчи модданими, бир минг неchanчи юлдузними, худо берган бедаво дардга шифоми топиш илинжида умрини гоҳ бесамар, гоҳ басамар ўтказаётган аксар фидойилар, аксари унвонпарасту чаламуллалар давраси...

Машрабнинг оти нега Машраб? Қим билади? Энг олдинда домланинг оғиздан кўз узмай, иложи бўлса унинг томоқ қирганини ҳам дафтарига ҳафсала билан ёзиб олишга шайланиб ўтирадиган Бўстон билади! У биргина шу саволга «Онасининг қорнида йиғлагани учун», дея жавоб бердию имтиҳондан ўтди-кетди.

Башарти курсдошларни танлаш ҳуқуқи берилганда мен Бўстон билан ўқишдан қатъиян бош тортган бўлардим. Ў билан бирга ўқиётганимни ўйлаб доим уялиб кетаман, келажакда ҳам эсимга тушса, ўзимни кечирмасам, номус қилсан керак. Қачон қараманг, телевизордаги «Қизлар давраси»да ишшайиб ўтиради. Гоҳида конфет шимиб ёзган шеърларини ўқиб берса, гоҳо ҳеч нарса қилмайди — шунчаки, ўзини кўрсатиш учун чиқади. Биламан, келажакда бир кун менинг омадим юришмайроқ

қолганини эшитса, у албатта: «Ҳа, уми, бошдан ҳам аҳмоқ эди», дейди эслагиси ҳам келмай, бурнини жийириб. Бордию худо ёрлақаб тузукроқ одам бўлиб кетсам, у: «Бирга ўқиганмиз, бошдан ҳам зўр эди», дейиши турган гап. «Бўстон, худо ҳақи, айт, сени қандай она туққан ўзи? — дейман баъзан ичимда нафратланиб ва негадир у осонгина жавоб топиб, истаган имтиҳондан ўтиб кетиши мумкин бўлган саволларни ёғдира бошлайман: — Машрабнинг оти нега Машраб? Отойи нечанчи йилда туғилган? Дурбекнинг қандай романлари бор? Саккокий нечта драма ёзган? Лутфий нега юз йил эмас, тўқсон тўққиз йил умр кўрган?..»

Олдимда даста-даста китоб, дарслик; теварагимда — бири илм учун яшаётган, бири яшаш учун илм олаётган кимсалар; ташқарида эса ҳаёт аталмиш беқиёс мўъжиза: чарақлаган қуёш, тип-тиник осмон, топ-тоза ҳаво, кўзни қамаштирувчи атлас кўйлаклар — барно қизлар, ўйноқи фавворалар, хушнағма қушлар... Уларни айнан ҳозиргидек намойишда кўриш менга ҳеч қачон насиб этмайди. Улар ҳаёт отлиғ мўъжизага айланганча учқур хаёллару шўх шамолларга, автобусу трамвайларга қўшилиб аёвсиз ўтиб бормоқда. Ҳеч қачон қайтариб бўлмайди! Атрофимдаги, чидам билан ҳарфларга термилган кўйи ғафлатда умр ўтказаётган кимсаларни чўчишиб, сескантириб, «Тўхтанг!», дея бақириб юборгим кела-ди.

Мени имтиҳондан домламиз Аҳмадхонов эмас, ўзимнинг собиқ дўстим, курсбошимиз Раҳматилла йиқитди, деб ўйлайман. («Бўйнингизга олинг, Асқар, домланинг дарсларига қатнашмагансиз».) Ҳолбуки, уни курсбошиликка шахсан ўзим сайлаганман десам бўлади. «Ўртоқлар! — дедим курс мажлисида Америка очаётгандек тантана билан. — Бу болани ҳаммамиз яхши биламиз. Сурхондарёдан, ҳа, олис Сурхондарёдан келиб, кўз ўнгимизда барча имтиҳонлардан беш баҳода ўтди. Аълочи.

Камтарин. Одобли. Меҳрибон. Оқибатли. Қелинглар, шуни сайлайлик!» Аммо Раҳматилла мен кутгандек оқибатли чиқмади. Дарсга кеч қолсам — хўмраяди, аразлагандек саломлашмайди, бирварақай келмай қўйсам — мажлисда пўстагимни қоқади. Энг қизиги — дарсга тузук қатнамаганим ҳолда имтиҳонлардан яхши баҳо олиб чиққанимни кўриб ажабланади, менга қўйилган баҳо ёнидан кетгандек ачинади, ошкора хафа бўлади. Ниҳоят, адабиёт тарихи имтиҳонида бошқача йўл тутиб, аламидан чиқди. Аҳмадхонов давоматимни текширмоқчи бўлиб ундан сўраганида ўша гапни айтди: «Бўйнингизга олинг. Асқар, домланинг дарсларига қатнашмагансиз».

Ҳа, имтиҳондан мени домла эмас, Раҳматилла йиқитди. Қалтиқ йиқитди!

Йўқ, мени имтиҳондан Раҳматилла эмас, думбул муҳаббатим йиқитди. Адабиёт тарихи имтиҳонидан ҳам, муҳаббат имтиҳонидан ҳам ўтолмадим.'

Муҳаббат... Унинг ранги, тузи, таъми қандай? Билмайман. Ким билади? Тўғри, мактабда ўқиганимда Сабоҳат деган синфдошимни кўрсам ўз-ўзимдан қувониб кетардим. Ҳатто якшанба кунлари ҳовлилари атрофида девонавор кезиб юрардим; олисдан сувга чиққанини кўриб, қўлидаги нақир бўлгим (қўлидаман-да!), қайтишида дарвозалари тагидаги гужумга айланиб қолгим (домим ёнимдан ўтади-да!) келарди. Муҳаббатими бу? Билмайман. Муҳаббат бўлса... Эҳтимол, ҳозир унинг ўрта ҳисобда учта боласи бордир. Эҳтимол, ҳозир у бир пайтлар мен билан ўқиганини, умуман, ўқиганини ҳам унтиб юборгандир. Эҳтимол, ҳозир тўнғич ўғлини мактабга жўнатиб, кенжа қизини чирқиллатиб кийиптириш тараддуидадир... Бир кун у мени кўчада тасодифан кўриб қолади ва танишроқ бирёвга ўхшатиб, «Ким билан ўқиган эди бу бола — опам биланми, синглим билан?», дея ўйга толади. Мен ҳам уни танимай, кичик холаларим-

дан биронтасини эслаб, «Хола!», деб юборсам ажаб эмас.

Уша туйғунинг номи нима; уни нима-деб аташ кепрак — билмайман.

Бултур ёзги таътил чоги қишлоққа борганимда бирлайтлар мактабимиз юлдузи ҳисобланган, ҳозир касаллонада ҳамширалик қилаётган собиқ синфдошимни сўлгин, бола кўтарган ҳолда кўриб: «Нега эрга тегдинг? Чакки қилибсан-да», дея койидым. У ерга боққанча кулимсираб тураверди. Мен уни тушундим: «Сен уйланмаганингдан кейин...»

Уйланиш... Онам доимо тоғлик ошнамизнинг қизини тилдан қўймай мақтайди, «Икки юзи қип-қизил, олмадек. Үзи оёқ-қўллигина. Гурсиллаб хизматимни қилса», дея орзуга берилади. Мен эса икки юзи қип-қизил олмадек қизларни ёқтирумайман. Назаримда, улар фақат гурсиллаб хизмат қилиш учун туғилганга, бошқа нарсага ярамайдиганга ўхшаб туюлади.

Шу йил қишки таътилдан қайтаётиб поездда бир қиев билан учрашиб қолдим. Буни қарангки, ҳамқишлоқ эканмиз, мени яхши таниркан, «Гулсаранинг акасисия», деди — демак, синглизмнинг синфдоши. Чет тиллар институтида ўқирмиш, ўзи ҳам кела-келгунча инглизча гапириб безор қилди. «Олмани бундай дейди, анорни бундай...» Гейин кимдандир, синглизданми, адресни суриштирган шекилли, уйимизга тез-тез келадиган бўлиб қолди. Сезишмича, у менга энди чет тилда муҳаббатнинг нима дейилишини ўргатмоқчи эди. Янгам ҳам шунни тасдиқлади: «Ҳар ҳолда қиз бола, дилини оғритманг». Бир гал келганида даҳливга олиб чиқиб: «Менга чет тилингнинг қизиги йўқ, синглиз, ўзбекча гапир. Қолаверса, сен инглизча айтмоқчи бўлган гапга менинг ўзбекча жавобим шундай: мен сени яхши кўрмайман, ўзигни алдаб овора бўлиб юрма. Хайр! — Оревуар!» дедим сўзимни французча хотималаб.

Муҳаббат... Уннинг ранги, тузи, таъмин қандай — бил-

майман. Қизлар... Ота-оналари ҳисобига яшайдиган боқибекам, сип-силлиқ, олифта йигитчаларни ёқтирадиган қизалоқлар! Биринчи кўришдаёқ менга бошдан-оёқ разм солиб чиқади: «Юрса арзийдими? Отаси қаерда ишларкан? Машиналари бормикан? Туфлисининг тагчарми баланд — импортний, ничего; кўйлаги — чидаса бўлади; фу, шум шим эканми, беш сўм ҳам турмаса керак!» Уларнинг муддаоси шу, кўзлари шундан бошқа нарсани кўрмайди! Мен балки газ-сув сотарман, балки бозорда «свежий» гўшт кўтариб юрадиган чайқовчитирман, балки тўйма-тўй сангийдиган отарчириман, балки ўтакетган қаллоб, товламачидирман, балки «Олтин Орфей» мукофотини қўлга киритиб, сопотлик шинавандалар кўнглида ғулғула қўзғаган келажаги порлоқ, хушбахт қўшиқчириман, балки Тошкент отчопаридаги пойгаларда томошабинларни ҳаяжонга солиб, олқиши қлган учқур чавандоздириман ёки Арабистонга бориб келган амаким менга тилла гардишли қўзойнак, Мартинес исмли ажнабий дўстим қимматбаҳо антиқа шим совға қилишгандир-у, қизларни синаш учун бугун атай одмироқ кийиниб чиққандирман — бу билан заррача ишлари йўқ, пиманики кўриб турган бўлсалар, шунгагина ишонадилар. «Ажойиб жинс»га хос ажойиб хусусият! Орқасидан неча кун сарсон бўлиб зўрга танишасан: «Менинг отим Эшқобил ёки Жонқобил». «Менинг исмим Жанна ёки Матильда — ойим бундоқ деб чақирадилар, дугоналарим бундоқ деб чақиришади». Эртаси куни минг ҳийла-шайранг билан кинога олиб тушасан. Шу тариқа хотимаси мавҳум симфония бошланади. Индини — қаҳвахона, хилватгина хиёбон... Тишинг оғриб турганига қарамай, унга қўшилиб музқаймоқ ейсан. (Баттар бўл!) Сўнгра ундан-бундан валақлашасан. Суҳбат қаҳрамонлари — сен ва у. У — энг гўзалу энг дилбар, энг бокираю энг садоқатли. Сен — энг жўмарду энг қатъиятли, энг билимдону энг олижаноб. Кейин унинг отаси, сенинг отанг, кейин — онаси, онанг... Кейин... нари борса, чала-ярим

ўяишга улгурсанг улгурганинг, бўлмаса, худонинг бир куни башараси хўроз тожидек қип-қизил, кўзлари бежо, тилла тишу мўйловли, бақалоққина бир йигит осмондан тушгандек йўлингни тўсади. Ясама таомилга кўра, аввал чап қўлини жигарига қўйганча сузмоқчидек бўлиб кўришади, сўнг секин четга тортиб дағдаға бошлайди: «Нега менинг қизимга анақ қиляпсан?» Баъзан, айтишича, бу шахс қизнинг ҳаммаҳалласи (кўпинча эса ё аммасининг, ё холасининг ўғли) бўлади: «Нега маҳалламнинг қизига анақ қиляпсан?» «Нима, сен маҳаллангнинг қизларига хўжайинмисан?», дейсан ҳайрон бўлиб қўрқаписа. «Нега анақ қиляпсан, дейман?» «Нима қилибман, тушунтириб гапирсанг-чи!», деганинг заҳоти боплаб жағингга туширади. Севгилиниг олдида томоша бўласан. Ана кейин... алвидо! Алвидо, Диля, Гуля, Зуля, яъни — Дилдора, Гулнора, Зулфия! Алвидо, муҳаббат!

Тасаввур қилинг: зим-зиё тунда кўзингизга бир шуъла чалингандек бўлди, умидбахш шуъла. У милтиллаб ўзига чорлагапча, сирли нарсалар ваъда қилганга ўхшади. Энтиканча унга қараб чопдингиз, аммо етай деганингизда у фойиб бўлиб қолди. Кейин бошқа бир жойда кўриниб, тағин сеҳрлагудек имлашга тушди. Яна юрак ютиб югурдингиз, бироқ яна доғда қолдингиз. Яна, яна, яна...

Бизнииг муносабатимизни ана шунга қиёсласа бўларди.

Мен у билан тузукроқ учрашганимни ҳам, гаплашганимни ҳам эслолмайман — нуқул бир хилда кийинадиган, эгизакдек бир-бирига ўхшайдиган дугоналари қуршовида юрардн. Улардан утасинингми, тўрттасининг оти Раъно, утасинингми, тўрттасиники Барно эди. Улар сайилга кетаётгандек виқор билан тўдаланиб ўтишаркан, гўё ўртадаги сирдан боҳабару нимадир ваъда қилмоқчидек менга қараб маъноли илжайиб қўйишар, сўнг бир-бирларига гал бермай ўғри мушук сингари

у и н г қулогига энгашиб алланимани уқтиришар эди. Буларни эшитаркан, у мен томон лоқайдигина бир назар ташлаш билан кифояланарди. Шу пайт дўгоналаридан бири — исми Назирамиди, Вазирамиди ёки Манзуратиди, ҳозир ҳам билмайман, ҳаммалари уни негадир расмий, таштанавор қилиб Акбарова деб чақиришарди — тўдадан ажраб, чопқиллаганча олдимга келарди.

Акбарова бошқалардан бир погона ўтказиброқ кийинпар, доим ялтираб юрар, қўлидан гул тушмас, ҳар ишга ҳаммадан олдин етишга ошиқаётгандек таассурот уйғотар эди. Мен уни ҳар кўрганимда, бугун туғилган куни бўлса керак, деб ўйлар, қаршисида кўзларим қамашиб, кўпинча гапимни ҳам йўқотиб қўяр эдим.

Ялтироқ Акбарова тўдасидан ажраб, чопқиллаганча олдимга келгач, аввал ўзаро ҳазиллашиб қўярдик. «Ажабо, кейинги пайтда сизни танимай қоляпман,— дердим кулиб.— У илгари бошқа бир қиз билан юрарди. Сариқроқ қиз эди, соchlари ҳам сап-сариқ». «Ўша мен эдим», дейди Акбарова эркаланиб. «Сиз қорачароқ-сиз-ку, у...» «Ўшандада сариқ эдим-да,— дейди Акбарова ўпкалагандек бўлиб,— соchlарим ҳам сап-сариқ...» Сўнгра лийдиёсини бошлайди: «Матлуба ундоқ деяпти, Матлуба бундоқ деяпти...»

Энди ўйлаб кўрсам, Матлубанинг ўзига нисбатан Акбарова билан кўпроқ учрашган, кўпроқ гаплашган эканман. Унда-бунда дуч келиб қолганимизда ҳам мен сўзларканман, Матлуба одам кўрмаган каби юзимга ғалати бир ҳайрат билан тикилиб турар ва назаримда, қочиб кетишга шайланётганга ўхшар эди.

Хуллас, бемақсад бошланган муҳаббат бесамар якунланди. Матлуба билан нохушроқ ўтган кейинги учрашувимиз, энди билсам, шунга бир ишора, шунга бир хотима экан.

Бундай бўлди:

Бир куни дарсдан қайтаётиб «маршрутка» бекатида Матлубани кўриб қолдим. (У мендан бир курс қуий

ўқирди). Кўрдиму ажабландим: у ёлғиз эди! Бир хилда кийинадиган, эгизакдек бир-бирига ўхшайдиган, бир-бirisiz туролмайдиган раъною барнолар, бир дақиқа ҳам ёнидан ажрамайдиган жонажон дугонаси — ялтироқ Акбарова қани?

Қулай фурсатдан фойдаланиб аста олдига бордим. Саломлашдик.

— Нима қилиб турибсиз бу ерда? — деб сўрабман бемаъниларча.

— Сизни пойлаб! — дея у ҳам боплагудек жавоб қайтарди.

— Бошқалар... Акбарова қани? (Топган гапимни қаранг!)

— Дарсда. Мен жавоб олдим. Ишим бор эди.

Шу тариқа сўз-сўзга қовушмай турганида Матлуба:

— Табрикламайсизми? — деб қолди тўсатдан.

— Сизнми? Нега? Нима билан?

— Мана буни кўряпсизми? — У қулоғидаги оппоқ мунчоқлар қадалган ҳалқасимон зиракка ишора қилди.

— Ҳа-а, — дедим мулзам тортиб. — Муборак бўлсин!

— Неча пул деб ўйлайсиз шуни?

— Йигирма-ўттиз сўм бўлса керак,— дедим кўнгли учун нархини кўтариброқ.

— Нима-нима? Йигирма-ўттиз сўм?! Тўрт юз сўм турди! Торам совға қилдилар.

Суҳбатимиз бу қадар майдалашганидан кўнглим ғашланди. Келаjakда мен тоғасига ўхшаб унга тўрт юз сўмлик зирак эмас, совуқ қор уриб турган палла бир даста гул ҳадя этсан, у: «Вой, қандай яхши, қирчиллама қишида-я?» деб севиниш, ҳаяжонланиш ўрнига, «Неча пулга олдингиз?» деб сўраса... нима қиларканман?

— Кечирасиз,— дедим ўзимни тутолмай,— тоған-гиз савдогармилар?

— Вой, нима деяпсиз? — Матлубанинг жаҳли чиқиб, кўзлари совуқ йилтираб кетди.

— Йў-йўқ, тўрт юз сўмга... шартми шу, дейман-да?

— Ҳо-о, дур бу! Чифаноқнинг ярасидан бўлган, денгиз чифаноғининг ярасидан!

— Денгиз чифаноғининг ярасини... тўрт юз сўмга сотиб олиш мешчанлик-ку!

— Ҳо-о, емай-ичмай кийинадиганлар бор-а!

— Биламан, томогидан уриб, эгнини ўйлайдиганлар соғ тишини суғуртириб, ўрнига тилла қўйдирадиганлар йўқ эмас, кўп. Юзимга ажин тушмасин, деб кулмайдиганлар ҳам бор. Ҳаммаси аҳмоқ!

Шунда Матлубанинг оғиздан чиққан гап икковимизни энди юзқўрмас қилиб икки қирғоққа улоқтириб юборди:

— Ҳар ҳолда ўша аҳмоқлар нима яхшию нима ёмонлигини сиздан кўра тузукроқ билишса керак!..

Хайрнят, шу пайт «маршрутка» келиб қолди...

Биз у билан дўстона саломлашиб, ана шундай адоваратли, бегоналарча хайрлашдик.

Дарди дунём қоронғи бўлиб, ўша куни кўчада узоқ тентираб юрдим. Устим юпунроқ эди, кечқурунги изғиринда шамоллаб қолибман. Бир ҳафтача алангани оташ бўлиб уйда ётдим. Бир нав ўзимга келиб, дарсга борган куним йўлакда Акбаровани учратдим. У негадир: «Бу ёққа юринг», деб аудиторияларига бошлади. «Бирор гап бўлса керак», деган хаёлда индамай унга эргашиб кирдим. Заиф, ноаниқ бир иллинжда атрофга кўз югуртираётган эдим, эшикда паст бўйли, кўзлари чақчайган домла пайдо бўлиб, салом-аликсиз бирдан дарсни бошлаб юборди. Акбарова шошиб олдинга ўтиб кетди. Мен саросимада нима қилишимни билмай, дарсда ҳам дўпписини бошидан қўймаган дастурхончинамо бир йигитнинг ёнидан жой олдим. Ён-веримдагилар менга бегонасираб, ажабланган каби бир-икки қараб қўйишидию домланинг буржуа адабиётига тегишли аллақайси зарарли оқим ҳақидаги маъruzасини тинглай бошлашди.

Аудиторияда Матлуба кўришмасди. Олдинроқда ўтирган, бўялаверганидан қош-кўзи чаплашиб кетган икки қиз дам-бадам ўгирилиб менга назар ташлаб қўяр, ке-

Йин бир-бирига энгашганча пичирлашишга тушар эди.
Нимадандир кўнглимда гашлик пайдо бўлди.

Бир пайт бояги қизларнинг тамапнороги орқада ўтирган йигитга аллақандай қофоз узатиб, мен томонга ишора қилди. Йигит қофозга кўз югуртириб кулимсираб қўйди-да, елкаси оша бошқа қизга берди. Қиз ҳам ўз навбатида уни олиб қарагач, ёнидаги шеригига кўрсатиб нимадир деб пиқирлади, сўнг бурилиб, қувлик билан илжайганча: «Сизга экан», дея қофозни менга тутқазди. Қофозга назар ташладиму муғамбир ари ёмон жойимдан чақиб олгандек ўрнимдан сапчиб туриб кетдим.

Қофозда ручка билан ажи-бужи қилиб ҳарир фатали қиз ва салла ўраган йигит расми солинган бўлиб, тепасига «Тўйлар муборак!», деб ёзилган эди.

Фирибгар Акбарова! Мени бу ерга «тўй муборак»ка олиб кирган экансан-да!

Қоним қайнаб, шиддат билан эшик томон юарканман, домла қайси бир ғоявий мухолифимизни фош қилишдан тўхтаб:

— Ҳа, оғайни, йўл бўлсин? — деди: афтидан, у мени шу курсда ўқийди, деб ўйлаган.

— Узр. Давом этаверинг! — дедим қўл силтаб ва эшикни урганча ташқарига отилдим. Йўлак охирига бориб, лабимда ямланган сигарета, у ёқдан-бу ёққа асабий юра бошладим. Тезроқ танаффус бўлишини, тезроқ Акбаровадан бор гапни суриштириб олишни истардим.

Ниҳоят, қўнғироқ чалиниб, йўлак ғала-ғовурга тўлди. Эшикдан чиқиб, у ёқ-бу ёққа аланглаган Акбарова мени кўрдию чопқиллаб олдимга келди.

— Нега унақа қилдингиз? — деди ҳансираб. — Домламиз...

— Домлангизни қўйинг! — дедим зарда билан. — Дугонангиздан гапиринг!

— Нимасини гапирай? — деди ялтираган бечора Акбарова оғир аҳволда қолгандек жонсаракланиб. — Тақдир экан... Ҳафа бўлманг, яхши қизлар кўп... — У ҳам-

дардлик билдириб, кафтини меҳрибонларча қўлимга қўйди.

— Таъзияга муҳтож эмасман! Айтинг, ким экан у валламат?

— Сизга бари бир эмасми?

— Ахир у севмасди-ку!

— Тўғри, ўзининг унчалик кўнгли йўқ эди. Орага нозикроқ одамлар аралашибди. Тоғаси. Куёв аспирант экан. Ҳар ҳолда келажаги бор, деб...

— Шошманг-шошманг, шунисига учибми?..

— Начора, шунаقا,— деди у баттар ғашимга тегмоқчилик.

— Илойим йўлингизни бериб, сизга ҳам бирорта ўшанақа чаласавод тепакал учрасин! Чапаклар! Давомли!— дедим жазавам тутиб заҳарханда билан.

— Ўзингизни босинг.

— Айтиб қўйинг, дугонангизни кўргани кўзим йўқ!

— Хўп, айтиб қўйман,— деди Акбарова мендан тезроқ қутулишнинг эвини қилолмай.

— Сизни ҳам!

У қўлларини кўксига қўйганча «Бўпти, бўпти», дея орқасига чекиниб, нарироқда бизга тикилиб турган эгизаксимон дугоналари даврасига бориб қўшилди. Дугоналари дон талашган капитарлардек унга ёпишиб пичирлаша кетдилар. Нафрат билан юзимни четта бурдим. Дераза оша пастда, чойхона яқинидаги садақайраюч тагида турган йигит билан қизга кўзим тушиди. Қиз ҳарчанд тавалло қилиб йигитга ниманидир тушунтироқчи бўлар, йигит эса бошини чангллаганча ердан кўз узмас эди. «Ёлгон, ёлғон! Ишонма!», дедим титраб ичимда.

Ҳозир бу аҳволда уйга ёки бошқа жойга боришдан маъно йўқ эди — гангиган кўйи судралиб дарсга кирдим. Адабиёт тарихи дарсининг иккинчи ярми бошлиди. Домламиз Аҳмадхонов одатдагидек кафедрага суюнган ҳолда сочини бармоқлари билан тараб, шанғимллаганча дафтаридагини ўқиб беришга, курсдошларим эса унинг

сўзларини биттама-битта ёзиб олишга тушдилар. Мен, муҳаббати шармандаларча чиппакка чиққан ошиқ сифатида, манглайимни кафтимга тираб дардимга берилдим.

— Хў ука, қандай тушлар кўряпсиз? — деб қолди бир вақт домла.— Биз ҳам билиб қўяйлик, агар мумкин бўлса...

Чўчиб бошимни кўтардим.

— Ҳа-ҳа, сиз! — деди у менга қўлини бигиз қилиб.— Нега лекцияни ёзмаяпсиз?

Эран-қаран жойимдан турдим. Ниҳоят, кўпдан бери ҷоғланиб юрганим — бу одамнинг нўноқ башарасига «кўзгу тутиш» мавриди келган эди.

— Кечирасиз, домла,— дедим совуқон оҳангда,— дарсликда бор гапларни кўчириб ўтиришга одатланмаганман.

— Нима?! Шундайми, ҳмм...— Аҳмадхонов кутилма-гаида бўшашиб, шаштидан тушди ва бир лаҳзадан сўнг босиқ, насиҳат маромида деди:— Лекцияни ёзмас экансиз, дарсда ўтиришингизнинг ҳожати ийқ, менингча.

— Менингча ҳам шундай. Рухсат этсангиз...

— Марҳамат, марҳамат,— деди Аҳмадхонов шубҳали мулойимлик билан.

Бош кўтармай лекция ёзиш мashaққатидан бирпастги-на қутулган боёқиш курсдошларим можаронинг узоқроқ чўзилишига умид боғлагандек бизга мўлтираб туришарди.

— Шошманг, оғайни! — деди Аҳмадхонов эшик томон қадам босганимда кўрсаткич бармоғини тепага ну-қиб.— Бундан бу ёғига менинг дарсимга кириб овора бўлиб юрманг! — Сўнг у Раҳматиллага юзланиб тайинлади:— Бу кишининг исми шарифларини дафтариғизга белгилаб қўйинг.

— Начора, ихтиёрингиз,— дедим қўлимни кўксимга босиб.

Университет биносидан чиқарканман, онамнинг дои-

мий ўгитини эсладим! «Андишасизлигингни ташла, жон болам, бу одат ҳеч кимга яхшилик келтирмаган. Шарта-кининг косаси оқармайди. Домлаларингга қаттиқ гапирма». Теракзорга яқинлашиб, онамга хаёлан нола-ҳасрат қйлдим» «Иложи йўқ, онажон. Ўзингиз мени шундай туқ-қансиз, «Бошингга қилич келса ҳам ёлғон сўзлама», деб ўргатгансиз. Мана, эҳтимолки, кўнглимдагини яширмай, ростини айтганим учун суйган қизим ташлаб кетди, дарсдан шармандаларча қувилдим. Нима қиласай, онажон?..»

Бугун фақат чиройли қизлар қўчага чиқкан экан. Бугун мен бадбин кўзойнагимни қаншаримга илиб, Мат-љуба учун улардан аламзадалик билан ўч олишга аҳд қйлдим.

Бекатга яқин ётоқхона ёнидан ўтишда учинчи қавагдаги айвонча панжарасига суюнган кўйи қўчага қараб хаёл суриб турган оқ кўйлакли қизга гап отдим:

— Бир йигит бор, ўзи аспирант, келажаги зўр, орага нозик одамлар ҳам тушади — ўшанга тегмайсизми?

- А-а? — деди у кафтини қулоғига карнай қилиб.
— Бэ-э-э! — дедим.

Демак, эшитмабди. «Аспирант» сўзики қулоғига кирмабди, яхши қиз экан, эшитмагани маъқул.

Бекатда турган бақ-бақалоқ қизга яқинлашиб секингина сўрадим:

- Зерикмаяпсизми?
- Йўқ, трамвай кутяпман, — деди у ҳайрон бўлиб.
- Мен эса зерикяпман, — дедим ҳасратли товушда.—

Юринг, айланамиз. Мен сизга бир қиз ва бир аспирант фожиасини айтиб бераман.

Қиз фожиа эшитгиси келмадими, «фожиа» сўзидан чўчидими, бекатнинг нариги бошига қараб йўл олди. Эргашмадим — начора, ўзидан кўрсин, ажойиб фожна эди-я, бир кун асқотиб қоларди, дунёда аспирант камми!

Қўлида гулдор шамсия, лабини қип-қизил қилиб бўя-

ган ёшгина қизнинг ёнига бориб, молиявий аҳволи билан қизиқдим.

— Кечирасиз,— дедим,— тоғангиз сизга денгиз чига-
но, гининг ярасидан ясалган түрт юз сўмлик зирак совға
қилмадими?

У жиркангандек мендан нари кетиб, энди қўзғалмоқ-
бўлиб турган автобусга шоша-пиша чиқиб олди.

Кейинги бекатда трамвайдан тушиб, сочини ҳурпай-
тириб турмаклаган қиздан телбалик билан аҳвол сўра-
дим:

— Ҳаяжонланмаяпсизми, яхши қиз?

— Нима-а? — деди у энсаси қотиб. — Нега ҳаяжон-
ланишим керак экан? — Тили аччиққина кўринади касо-
фатнинг.

— Тўғри қиласиз. Кўп ҳаяжонланиш юракка заар. Тўнгакдек бўлиб яшайверинг! — дедим мен ҳам ачитиб.

— Аҳ-мо-оқ! — деди у кетимдан. Жавоб қайтариб ўтирамадим: бари бир ҳаяжонланмайди, тўйгунча ҳая-
жонланиб бўлгац, ортиқчаси юракка зиён эканини яхши
билади.

Навбатда бекатда қорачадан келган, кўзлари қўв-
ноқ қўғирчоқникига ўҳшаш қизга таклиф қилдим:

— Акам докторлик диссертациясини ёзяпти, ўзим
яқинда кандидат бўламан, келажагим зўр — менга тег-
майсизми?

Қиз шундай маъсумона анграйдики, ўқим бу гал
хато кетганини фаҳмладим.

— Мени кечиринг, сингилжон, — дедим мулзам бў-
либ, қўлимни қўксимга қўйганча.— Сизни бирорвга ўх-
шатибман...

Ниҳоят, бу эрмак жонимга тегди, бошқаларнинг ҳам
жонига тегишини истамадим — ўзимдан нафратим қўзиб,
биринчи дуч келган автобусга чиқдим. Рўпарамдаги
ўриндиқда мўйловини бўяган, сўхтаси совуқроқ бир
йигит ёқимтойгина қиз билан ўтиради. У орқа-олдига
қарамай алланималар деб лофт уряпти, қиз эса беғубор

кўзларини унга тикканча анқайиб маҳлиё бўлиб қолгани, дам-бадам жилмаяди. Чамаси, зиёлироқ оиласдан, «Дунёда ёмон одам йўқ», деган олижаноб руҳда тарбияланган некбин қизга ўхшайди. Бунақаларга: «Қишдан кейин баҳор келади», десанг ҳам, «Вой, ростданми?» ~~дек~~ чинакамига ҳайратга тушади.

Иигит кўзимга танишдек кўринди. Эсладим: ўйин кунлари «Пахтакор» стадионига кираверишдаги майдонда сомса сотарди. Бошида пақирдек оқ қалпоқ, эгнида чўнтакларининг оғзини мой босган яғир халат, олдида аравача — «Кепқоли-инг, думбали сомса!..»

Сайра, қўбизим, сайра!

Башарият ақл бобида ўз аждодларидан илгарилаб бормоқда; инсон юраги билан иш кўриб жумлаи жаҳонни ҳайратга солган машҳур жарроҳ Кристиан Барнард қўллари бодга чалинганига қарамай ҳамон ана шу нозик аъзога йўл изламоқда, жамиятга кўпроқ наф келтириш мақсадида бадиий ижод соҳасида ҳам куч синамоқда; ер юзида беш миллион одам очликдан азоб чекмоқда; урушда иккала оёғидан ажраган бир киши тракторга ўтириб буғдой экмоқда — ризқ-рўз яратмоқда; Лондондаги Гайд паркида истаган жаноб истаган мавзуда вайсамоқда; чикаголик қора танли аёл бирвлар эшигида оқсочлик қилиб болаларини коллежда ўқитмоқда, ўзининг бир умрлик орзуси — пианино чалиш, қувноқ куйлар басталаш ва негрлар тарихидан китоб ёзиш; аллақайдаги қаҳвахонада официантлик вазифасини маймун бажармоқда; Токио минораси юксаклик жиҳатидан ўз салафларини ортда қолдирган — дунё обидаларининг энг пурвиқори Эйфель йилдан-йилга чўкмоқда; Лос-Анжелес, Буэнос-Айрес, Аддис-Абеба, Рио-де Жанейро сингари доим гаройиб ҳодиса-ҳангомалар содир бўлиб турадиган жойларда ақлни шоширадиган не-не турфа гаплар кечмоқда. Бу эса... «Кепқолинг, думбали сомса!» — шундан бошқасини билмайди, қизиқмайди, ўйламайди. Сомса сотади, башанг кийинади, жирканч лофт

лари билан содда-баёв қизларнинг бошини айлантиради — қиласиган иши шу. Азза-базза шунинг учун дунёга келган!

Лақма қиз! Ишонавер! Бир кун бу соддалигинг бурнингдан чиқади, ана ўшанды ўзим салом бергани келман.

Бўлмади, автобусдан тушдим. Ўйга яёв жўнадим.

Бугун фақат чиройли қизлар кўчага чиққани рост эди.

Қизлар! Келинглар, мен сизларга ҳали ҳеч кимдан эшитмаган нарсаларингиз ҳақида сўзлаб берай. Эҳ-хә, Ҳинд океани бўйлаб сафарда юриб не-не жойларни кўрмадим! Сизларнинг тушингизга ҳам кирмагандир у манзиллар: Бўмбай, Сомали, Яман, Ироқ, Маврикий...

Ҳиндистанда икки километр узунликдаги Леди-стрит, яъни Хонимлар кўчасидан ўтганимда, «Бу ерда бўлган шоир зоти аёллар шаънига шеър битишга қайтиб рағбат сезармикан?», дея ўйга толдим;

Асли тожик, ўзи беш тилни биладиган Бўмбай штатининг губернатори денгизчилар шарафида берган зиёфатда қатнашиб, унга: «Аз замини падаратон саломи гарму жўшон!», дедим ва соҳибжамол қизининг таклифига кўра, у билан қадаҳ чўқишириб кока-кола ичдим, рақсга тушдим;

Экваторда жойлашган жаннатмисол «Ўйинчоқ ороллар»да бошим узра чарх урган беҳишт қушларини кўриб ҳайратдан ёқа ушладим;

Сомали бананзорлари ўзимизнинг тўкин куз пайтидаги ажаб боғларимизни эсимга солди;

Ироқ гўзалларига суқ билан боқарканман, ўзимни «Минг бир кеча»даги Шаҳризод эртаклари замонида яшаётгандек ҳис этдим...

Дунёда мана бундай гаплар ҳам бор, жон қизлар! Сизлар, ҳойнаҳой, бугун оқшом орангиздан кимнингдир туғилган кунини нишонлаш учун бир жойга тўплана-сизлар ва ўша дугонангизга сахийлик билан кўпдан-кўн

бахт тилаб қадақ күтараётганда дафъатан ўйга толасизлар: «Бахт ўзи нима?» Кейин: «Эҳ, дунёда киройи йигит ҳам қолмади-да», деб ботинан оҳ урасизлар. Илтимос, бир нарсани унутманглар: айни шу дамда қаердадир бир давра йигит ўтирибди, ҳаммаси сизлар орзу қилгандек «киройи». Улар ҳам қайси бир дўстларига омад тилаб қадақ күтаришаркан, сизлар сингари: «Эҳ, дунёда яхши қиз қолмади-да», деб надомат чекишлоқда. Нега бундай — сизлар у ёқда, булар бу ёқда?.. Сизларни учраштирадиган, қовуштирадиган йўл қайдо? Билмайсизлар. Мен ҳам билмайман. Билганимда...

Кўнглида ардоқлаб юрган нарсаси пуч эканини сезиб қолса, одам қандай аҳволга тушади? Бирор қайтуравериб чўпдек озиб кетади, бирорнинг дунёдан бутунлай кўнгли совийди, бирор аламзадалик йўлига ўтиб, ҳаммадан баравар ўч ола бошлайди, бирор эса қалам йўниб, тушкун шеърлар ёзишга тутинади. Мен на қайғудан чўпдек оздим, на дунёдан кўнглим совиди, на аламзадаликка ўтиб, бирордан ўч олишни ўйладим, на шеър ёзишга тушдим — бошқача йўл танлаб, эгаси тарк этган ҳовлидек ҳувиллаб қолган юрагимга қайтадан юпанч бағиашлаш, яъни кимнидир чинакамига севиш ҳақида ўйлай бошладим. Аммо энди севолмасам керак: ҳақиқий муҳаббат ҳаётда бир мартагина насиб этади, дейдилар-ку!

Дарвоқе, Матлубага бўлган муносабатим ҳақиқий муҳаббатмиди? Севги донишмандларидан бири: «Чинакам муҳаббат — икки қалбнинг бир-бирига талпинишигина эмас, балки уларнинг бир томонга қараб баҳамжиҳат интилишидир», деган. Демак, мени олдинда ҳали катта муҳаббат кутмоқда! Демак, сабр қилиш лозим, бахт ўзи кулиб боқмаса, уни жилмайтириш ҳам қийин. Демак, мен излаган, мен истаган қиз қаердадир яшамоқда — мен учун, мени бахтиёр қилиш учун! У эртакдаги-дек фаройиб бир куни ҳаётимга ўз оёғи билан кириб ке-

лади ва мен унинг нозик қўлчаларидан авайлаб ушланча, доғда қолдириб кетган Матлуба, ялтироқ Акбароваю уларнинг фисқ-фасодга ўч дугоналари кўз ўнгидан намойишкорона олиб ўтаман. Ўшанда улар афсус ва надомат билан соч юлиб қолишидади, мен эса қайрилиб ҳам қарамайман. Манзилим — арши аълонинг ўзгинаси! Ана шундай бўлади!

Бироқ мен бу орзумга етишга улгурмасдан Акбарова павбатдаги ахбороти билан осмонимни яна аламзадалик булутига кўмиб юборди. Бир-бир ярим ой давомида кўринмасликка тиришиб, уларнинг аудиториясини четлаб юрганимда қаёқданdir қаршимда аввалгидан баттарроқ ялтираб кेटган Акбарова пайдо бўлди. Бўйнидаги алвонранг дурранинг бир учи ҳавода чарх ураётган қалдирғоч қаноти мисол тиккайган — гўё кифтига қалдирғоч қўниб олгану бир зумдан сўнг ўзини ҳам кўтариб учиб кетадигандек. «У энди яқинимга ҳам йўламаса керак», деб ўйлардим, йўқ, орадан ҳеч гап ўтмагандек, одамни эритиб юборадиган дараҷада жилмайганча келиб қўл узатди, ҳол-аҳвол ва ўқишлиаримни сўради. Афтидан, у менга, менинг Матлубага бўлган муносабатимга жиддий қарамасди. Бўлмаса, нега орамизда чопқиллаб гап ташиб юрарди? Ким билсин, балки бошқа эрмаги йўқдир. балки шундан завқ, лаззат олар. Жоду кўзли жодугар Акбарова!

— Кўрсангиз танимайсиз, оғзи тўла тилла тиш! — дея у, ҳеч ким сўрамаган бўлса-да, Матлуба ҳақида ахборот беришга тушди.

— Бундан чиқди, эри аспирант эмас, магазинчи ёки қассоб экан-да? — дедим ўзимни лоқайд кўрсатишга тиришиб.

— Йўқ, нега, аспирант... — деди феълимга хийлагина кўникиб кетган Акбарова хотиржам оҳангда. — Яқинда машина олишармиш...

— Суриштириб кўрмадингизми, қезон самолёт олишаркан? — дедим унинг кўзига ғазаб билан тикилиб ва

жавоб кутмай гапни калта қилдим: — Кечирасиз, сиз би-дан ортиқча валақлашиб ўтиришга вақтим йўқ. Илойим сизга ҳам бирорта ўшанақа магазинчи ёки қассоб учра-син! Бўйти, хайр!

Ялтираган Акбарова туси ўчганча қолди, мен кескин бурилиб кетдим.

Бундай ўйлаб қарасам, Матлуба эсли қиз экан, мен-га тегмай тўғри қилибди. Текканида икки бошдан ҳам мендек ношуд билан келажакда хор-зор бўларди. Неча йил уйма-уй ижарада яшавериб сарсони чиқарди. Неча йил келинлик сарпосидан бошқа лиbos кўрмасди. Уша-нинг ақлига балли, менга тегмай ажаб қилган. Ҳозир оғзи тўла тилла тиш, ярақлайди, эртага дуру гавҳар, ёқуту марваридга кўмилади. Яқинда машина олишар-миш! Қейин самолёт олишади, кейин Ойга учишади, Ой-дан туриб менинг гариб рўзгориму аброр аҳволимни то-моща қилишади.

Ха, Матлуба эсли қиз экан. Бироқ, ўйлаб кўрсам, мен ҳам унча аҳмоқ әмас эканман — унга уйланмай тўғри қилибман. Уйланганимда бари бир кимдир таш-лаб кетарди: ё мен уни, ё у мени...

„Бултур баҳорда томоғимдаги муртак безни олдириш учун бир ҳафта касалхонада ётдим. Эртага чиқаман де-ган күним тушлиқдан сўнг қуюқ олмазор ичидаги ший-пончада китоб ўқиб ўтирган эдим, кимдир чақирди. Қа-расам, ҳамхонам — Мираҳмад исмли ҳазилкашроқ йигит; «Бу ёққа келинг», дегандек имляяпти. Ёнида — доим оғришидан шикоят қилиб бошини боғлаб юрадиган қўшни палаталик қоқсуяқ киши ва нима учун ётганини ўзи ҳам билмайдиган, қўлтиғидан шахмат таҳтаси туш-майдиган ҳовлиқмароқ Эшон ака. „

Улар дараҳтзор этагидаги бир қаватли қизғиш бино— ҳаммом эшиги олдида туришарди. Қўлларида сочиқ, ювинишмоқчи. Аммо бир-бирларига навбат бермай ён-

бош бўлиб эшикка қулоқ тутишган. Мираҳмад чалани-
часига кўз қисиб, менга эшик томон ишора қилди.

Эшикда «Санитария куни» деган ёзуви шиша лавҳа
осиқлик бўлиб, ичкаридан аёл кишининг кулгиси эши-
тиларди. Эркак овози ғўлдираб бир нима деган эди, аёл-
нинг кулгисига истиғноли оҳанг афалашди, у баттар
қиқирилай бошлади. Бу товуш ҳаммоминиг тош сажни
бўйлаб хийла муддат қанот қоқиб турди.

— Ўл-а, бошқа жой қуриб қолган экан-да... — деб
тўнғиллади бошоғриқ.

— Бу қандай гап, ахир? Қасалхонада-я! Одам ча-
кириш керак! — деди шахматчи эшикдан қулогини ол-
май. Декин ўлақолса бундай лаззатни ташлаб кеттиси
йўқлигига башарасидан аён эди.

Ичкарида нимадир шалоп этди, сувнинг саҷрагани
эшитилди, яна ўша кулги... Шунда ҳамманинг хаёлидан
кечган гапни Мираҳмад айтди-қўйди:

— Ана, бошлашди! Бу ер қулай-да, сув қидириб ово-
ра бўлмайсан...

Беҳаёлик билан айтилган бу гапга ичимда ижтиреан-
ган бўлсам-да, ичкаридаги сирга мен ҳам қизиқиб қол-
дим; узоқ ётадиган баъзи беморлар тўгрисида шунақа
мишмишлар қулогимга чаалинган эди.

— Балки врачлардан бирортаси ҳамшира қўйи билан...
Давай қараймиз, — деб қолди Мираҳмад менга. — Орқа
томонда дераза бор.

Дарҳақиқат, бинонинг орқа томонида дераза бор
екан, бироқ у одам бўйи етмайдиган башандлинида, бу-
нинг устига оққа бўяб қўйилган эди. Ҳафсаламизв пир
бўлиб изимиизга қайтдик.

«Пиистирма»да бошоғриқ билан шахматчи ҳамон
эшикка чакка тираганча тин олмай туришарди. Бошоғ-
риқ бош оғригини, шахматчи шахматни унутган. Жир-
каниб кетдим, лекин қизиқиши ҳисси яна устун келди.
Ахир, ростдан ҳам, шифо төпини учун келган одам, қу-
лай фурсат — санитария кунидан фойдаланиб, куппа-

куйдузи, касалхона ҳаммомида, тоза, озода бўлиш учун кириладиган жойда... Инсон нақадар тубанлашиши мумкин-а!

Бошоғриқнинг бош оғриғи тутдими, бирдан эшикни муштлай кетди:

— Эй бўлгандир энди? Чиқларинг, бўлмаса ҳозир одам чақирамиз!..

Шахматчи уни тўртди:

— Кўйинг, биродар, бир банданинг майшатини бузиб гуноҳга ботиб нима қиласиз?

— Бўпти, — деди бошоғриқ шаштидан тушиб. — Чарқишишар-ку ахир, шарманда бўлишар-ку! — У чордана қурганча тош зинага ўтириб олди. — Шармандаларнинг кимлигини кўрмай бу ердан жилиш йўқ!

Ичкарида сувнинг шилдираши тинди. Овозлар энди аниқроқ эшитила бошлади — шармандалар эшикка яқин келишган эди. Кийинишмоқда. Биз содир бўлажак манзарани кутиб, нафасимизни ютганча, негадир нарироқ-қа — дараҳтзор тагига бориб турдик: бари бир кўрамиз, чиқишишади-ку! Бошоғриқ ҳам шуни ўйладими, жойидан қўзғалиб, халати барини қоқа-қоқа келиб сафимизга қўшилди.

Ниҳоят, занжири шиқирлаб, эшик очилди. Ёшгина, навниҳол келинчакни даст қўтариб олган норғул гавдали йигит кўринди. Келинчак бошдан-оёқ оқ кийимда эди: эгнидаги ~~беморлик~~ ёбоси ҳам оқ, дурраси ҳам оқ. Кулчадеккепа юзи, ингичка билаклари ҳам оқ, оппоқ. Қошкўзину бир ўрим қоп-қора сочи бу уйғунликни чандон бўрттириб турғандек... У озғин қўллари билан йигитнинг бўйнига маҳкам чирмашиб олган эди.

Қайси бир кун қулоғимга узуқ-юлуқ чалиниб қолган гапларни эсладим: «Турмуш қуришганига бир йилгина бўлган экан. Ўз-ўзидан сўёклари ишламай, шол бўлиб қолибди. Мана, энди олти ойдан бери шу ерда. Дарди оғирмиш, дўхтирларнинг гапи! Эри эртаю кеч ёнида, бир қадам жилмайди. Шўрликлар, кўриб одамнинг раҳми ке-

лади. Бир-бирига шундоқ муносиб, шундоқ меҳрибои.
Энди дунёга қадам қўйиб...»

Дамимиз ичимишга тушиб кетди. Бир дақиқагина аввал тантана қилишни ўйлаб турганларнинг аҳволини кўргани энди томошабин керак эди!

Улар биз томонга қарашмади, ўғирилиб ҳам қарашмади. Хайрият!

Бизни кўришганида нима бўларди? Ҳеч нима! Парво ҳам қилишмасди. Нега?

Йигит қўлларидан тушиб кетишидан қўрқсан каби келинчакни бафрига босганча авайлаб кўтариб борарди. Келинчак ундан кўз узмайди, қўллари бўйнига чирмашган, бир ўрим қоп-қора сочи чулғаниб кетмоқда.

Улар баҳтиёр эдилар! Уларнинг кўзи ҳозир ҳеч кимни, ҳеч нарсани кўрмасди!

Улар бизни кўрмасликлари керак!

Шундан кейин жиловим яна бўшашди — янги саргузаштларим бошланди.

Бир оқшом кинога бориш учун бекатда автобус кутиб турсам, кимдир менга тикилаётгандек бўлди. Бурилиб қарадим: билагида сумка, иккинчи қўлида эса сиртига қозондек шляпали серсоқол ажнабий сурати солинган кулранг халтacha кўтарган хушрўйгина қиз. У шаҳодат бармоғи билан чап қовоғини ишқаган кўйи менга тикиларди. Шўхлигим тутди, мен ҳам қараб-қараб қўявердим. Нигоҳларимиз тўқнашавериб анча яқин бўлиб қолдик. Қаердадир учратган каби у энди кўзимга иссиқ кўрина бошлади. Таажжуб, бир пайт қовоғини ишқайишқай кулимсираганча ёнимга келди-да:

— Кечирасиз, бир нарса тушибдими, кўзим ачишяпти, қаранг-чи... — деди.

— Жоним билан. Пуфлаб қўяйми? — дедим ҳазилашиб.

— Майли,— дея у негадир дарров кўна қолди.

— Четроққа ўтайлик.

Бекатдан нарида, ўрнатилмай бетартиб қалашиб турған сув будкалари панасига ўтдик. Мен унинг юзини дадил кафтларим орасига олиб, кўзига пуфлай бошладим ва... шайтон йўлдан оздирдими... лабимни лабига босибман! (Шу вазиятда йигит киши бошқача йўл тутишига ишонмайман.) Қиз қўлидаги қўш халтаси билан биқинимга бир туширди:

— Уятсиз! Безбет экансиз!

— Тўғри, — дедим нафасим тиқилиб ва шоша-пиша ўзимни оқлашга киришдим: — Хафа бўлманг, илтимос. Мен мутлақо... ўзим ҳам билмай қолдим. Ишонинг, худо ҳақи, бундай ниятим йўқ эди. Шунчаликки бўлди, келинг энди, танишайлик. Менинг отим Асқар.

У араз билан қўл узатди:

— Света.

— Ўзбекчасини сўраяпман.

— Равшаной. Ўзимга унча ёқмайди.

— Нега энди, чиройли исм-ку: Равшан-ой! Таржимаси чатоқроқ экан-да. Мана, танишиб ҳам олдик. Кўзинг из тузук бўлдими ёки яна?..

— Йўқ-йўқ, — деди у чўчиб, ўпкалагандек жилмайганча. — Ачишмаяпти энди.

— Юринг, кинога кирамиз. Танишиб олдик, бу ёфи...

— Ўйга боришим керак-да, — деди Равшаной ачингандек. — Кеч бўлнб қолди, ойим пойлаб ўтирадилар.

Бир зумда аразн тарқаб, мен билан кинога боролмаслигига ҳатто ачинаётган бу қизга таажжубим ортди. Қизиқсиниб ҳужумда давом этдим:

— Бўлмаса, кетдик, бир-нкки бекат пиёда юрамиз. Бари бир автобус келмаяпти-ку. Баҳонада яқинроқ танишиб оламиз.

Бу гал ҳам у мени ҳайрон қолдириб индамай рози бўлди, олдимга тушиб кетаверди.

— Хў-ўш,— дея терговни бошладим,— ишлайдиларми, ўқийдиларми?

— Ҳам ишлайман, ҳам ўқийман,— деди у ғурурини яширмай.

— Ажойиб, ажойиб. Серфайрат қиз экансиз. Қаерда ишлайсиз?

— Үзингиз-чи? Аввал сиз айтиңг,

— Магазинчиман.

— Қанақа магазинда — продмагдами?

— Продмагда, культмагда, ҳозмаг, парфюмерия, галантерия... Ноёб икра, бальзам, өумин гарнитури, япон зонти, чех пойабзали, француз атири, шемис совуни, қозон-товоқ, күмнр, туң, ших, пашара, пайпоқ, қалпоқ... Кулманг! Қаерда ишлайсиз?

— Алдаяпсиз. Тұғрисини айти-инг,

— Тұғриси — спортчиман. Маҳалла чемпиони, спидвей бүйича! Қаерда ишлайсиз?

— Редакцияда.

— О-о, редакция, зёр-ку!

— Йүқ, унақа катта ишдамас — секретаркаман.

— Ҳа-а, демек, ёшлигингиздан секретарликка ҳавас қўйгансиз, шундайми?

Равшаной тушупмагандек ҳайрон бўлиб қаради. Умуман, менинг гапларимга ажабланаётгани сезилиб турарди.

— Йўқ, мабодо сиз ҳақингизда газетага ёзишса, шундай деб бошлашади-да: «У ёшлигидан...»

— Ҳа-а,— деди у ниҳоят гапнинг тагига етиб.— Лекин мен кечкида ўқийман ҳам-да. Бугун дарсимиз йўқ эди, шунинг учун эрта қайтяпман. «Балки кейинроқ шеър-пеър ёзиб кетарсан», дейдилар Самариддин акам, редакторимиз. У киши қариндошимиз бўладилар. Тұғрида, ўқишини битирсам, ёзиб кетарман, а, шундай эмасми?

— Ҳа,— дедим маъқуллаб,— роман ҳам ёзарсиз!

Шу ерга етганда бу қизга қизиқниш мутлақо сўнди. Кўнглим ғаш бўлиб, ундан ҳам, ўзимдан ҳам ҳафсалам совиди. Масалани чигаллаштирмай, ҳозироқ хайр-маъ-

зур қилмоқчи эдим-у, аммо — тавба, ғалати қиз экан бу!— ҳеч ким сўрамаган бўлса-да, ўз-ўзидан таржимаи ҳолини айтишга тушди: нимага қизиқади, нимани яхши кўради, нимани ёмон кўради...

Айтишича, оиласа атиги икки фарзанд эканлар — биттагина укаси бор экан (демак, мени уролмайди, акаси бўлганда бошқа гап эди!); ўзи ёлғиз қиз — эрка қиз экан — «Адам нима сўрасам олиб берадилар» (демак, сен ҳам олиб беришинг, қозон-товоқни ўзинг қилишинг керак!); адаси асфалт заводининг директори экан (демак, асфалт керак бўлса — марҳамат!); буни қаранг, машиналари ҳам бор экан — «Яп-янгигина турибди, ҳеч ким ҳайдамайди, адам «Движение катта», деб қўрқадилар!» (демак, бемалол, асфалтларнинг титифини чиқариб, бемалол минаверасан!); дарвозахоналарида эса уйларини ва ўзларини қўриқладиган каттакон бир олазпарлари бор экан (демак, у ҳам кирган-чиқсанга таржимаи ҳолини айтиб бераверади!)...

— Сиз ҳам гапиринг,— деди у тўсатдан хатосини, энг муҳими — менинг эшиштаётганимни пайқаб.

Мен шартта тўхтадим. Равшаной ҳам тўхтаб менга тикилиб қолди.

— Оиласа ўн бир боламиз — ўнта укам бор, каттаси ўзим. Отам — қоровул, онам уйда ўтириб укаларимни боқади. Шу керакми сизга?! Қелинг, энди хайллашайлик!

— Вой, нега?..

— Негалигини ўйлаб кўринг. Хайр!

Равшанойнинг қарғишига қолдиммн, эртаси куни кечқурун кинотеатр олдида безорилардан ўлгудек калтак едим. Очиги, ўзимдан ўтди — жўжахўрозлик қилмаганимда ҳеч кимнинг мен билан иши бўлмасди.

Билет учун навбатда турган эдим, соябони энли қалпоқ кийган, кўйлаги ёқавайрон бир бола турнақатор тизилган одамлар сафини ёриб ўтди-да, орқа-олдига қара-

май ғриб касса туйнугига бошини тиқди. Атрофдагилар ҳаіхайлашди-ю, жиддийроқ бирон гап айтишмади. Шунда мен боя күрганимдаёқ важоҳати ғашимни келтирған бу болага қараб:

— Ҳў совуқ! — деб бақирдим. — Навбатда туриб олсанг ўласамни?

У орқасига ўгирилиб мени кўрди ва негадир индамай бошини яна туйнук томон бурди. Билетни чўнтағига ғазуржга жойлагач, беписанд юриб олдимга келди.

— Сенмидинг? — деди енгимдан тортиб. — Мана бу ёққа бир ўтайлик.

Ен-веримда қараб турган қизларга изза бўлгим келмай, ўзимнинг ҳам жўжахўролигим тутиб:

— Ўтсак ўтдик, — дея унга эргашдим.

— Нега олифтагарчилик қиляпсан? — деди у кўприкдан наридаги кенгроқ жойга етгач. — Қаерликсан ўзи?

— Қаерлик бўлишимнинг нима аҳамияти бор? — дедим паст тушмай.

— Шаҳарликка ўхшамайсан...

— Сендақа шаҳарликка ўхшашни ҳам истамайман.

— Қаерликсан, деяпман?

Мен қаерданлигимни айтдим.

— Чўлдан, деб қўя қолмайсанми!

— Оббо, — дедим энсам қотганини яширмай, — географиядан ҳам ўзимиз қатори эканлар-ку, ошиам! Билсанг, мен айтган жой денгиз сатҳидан уч минг метр баландда, ҳавоси мана бундай! — деб бошмалдоғимни ниқтаб кўрсатдим.

— Бари бир қишлоқ-да! — Афтидан, у жанжалга арзирлироқ бошқа важ тополмай қийналарди. — Бари бир қишлоқисан-да!

Унга раҳмим келди, важ топишда кўмаклашиб, тикка боришга қарор қилдим:

— Ҳўп, ана, қишлоқиман. Гапир, нима дейсан?

— Ана шунаقا! — деди у тилла тишини кўрсатғанча

тиржайиб. — Қишлоқдан келиб олифтагарчиллик қиляш
ман, дегин?

— Аҳмоқ!

— Қим аҳмоқ?

— Сен ҳам, мен ҳам!

— Сен қишлоқисан! — У албатта яна ҳеч балони
тушунмаган эди. — Қишлоқи!

Бу гапдағ мантиқ топиб күринг-чи! Мантиққа тап-
қислик сезилган жойда жисмоний күчга әхтиёж туғила-
ди. Йўқ, у мени ҳақорат қилмоқчи бўлгани учун эмас,
бу қадар нодон, сурбет бўлгани учун... жағига солиб
юбордим. Ана кейинги томошага одам керак. Ердан чиқ-
дими, осмондан тушдими, билмайман, кўз очиб-юмгунча
гирдимни беш-олти бола ўраб олди. Ҳаммасининг боши-
да кенг соябонли қалпоқ, бири мўйловли, бири мўйлов-
сиз, бири тилла тишли, бири тилла тиҳсиз, лекин барин-
нинг кўзи бир хил — бемаъно. Аввал ўзбек тилининг бой
имкониятларидаи фойдаланганча роса чангитиб сўки-
нишди; кейин — бош бурганимни биламан, мушту тепки-
нинг остида қолдим.

Улар мени қишлоқи бўлганим учунгина эмас, «Ҳа,
қишлоқиман!», деб кўкрак керганим учун, «Ҳа, қишло-
қиман!», деб кўкрак керганим учунгина эмас, қишлоқи
бўлганим учун ёки, шунингдек, шаҳарлик бўлмаганим
учунгина эмас, қишлоқи бўлганим учун, қишлоқи бўл-
ганим учунгина эмас, шаҳарлик бўлмаганим учун... дўп-
послашарди. Лекин аҳмоқликда бир-биримиздан қолиш-
масдик: мен улардан, улар мендан...

Бир пайт қаёқдандир милиция кийимидағи ёшгина
йигит найдо бўлдию калтакдан қутулдим. Рақибларим
тумтарақай қочиши ўрнига, негадир нарироққа бориб саф
тортганча пинак бузмай туришарди. Милиционер ме-
нинг ёнимга келиб:

— Нима гап, нима гап? — дея билагимдан ушла-
ди.

— Ҳеч гап эмас, — дедим қўлимни бўшатишга ури-

нарканман ва билдириштагишини нишими суқиб олдим:—
Сизга иш қолмади.

У бир лаҳза афтиимга тикилди-да, сўнг:

— Э, менга деса бир-бирингнинг этингни емайсанми!— дея қўл силтаганча кинотеатр томон ўтиб кетди.

Чамаси, у милиция ишига тасодифан кириб қолган ёки ановилар билан тили бир — уларга чурқ этмади-ку. Бу кетишда ундан ҳақиқий милиционер чиқиши гумон. Шўрлик, умр бўйи погони юлдуз кўрмай ўтади.

Уст-бошимни қоққач, оғриқдан, тўғрироғи, уят ва аламдан юзимни чангллаганча автобусга қараб юрарканман, кимдир келиб «Ўв, шошима!», дея енгимдан торти. Қарасам — рақибларимдан бири — боя бошқалар қатори мени ўраб олган, лекин негадир муштлашувга аралашибай, бир чеккада томошабин бўлиб турган найновроқ бола. Тағин бирон кор-ҳол юз беришини ўйлаб сесканишдан кўра кўпроқ ажабландим. Энди уларнинг менда қарзи қолмаган эди. Мағлуб томонга қайта ҳужум қиласидиган қўшин... рўмол ўраган эркаклардан ташкил топган бўлиши керак.

Томошабин рақибим мени бекатдан четроққа бошлиди.

— Битта ош қилемаймизми? — деди ҳовлиқиб, томдан тараша тушгандек.

— Ош?! Қанақа ош?

— Қишлоқи бўлсанг ҳам-чи, аммо-лекин мард экансан, ҳамма беш кетди сенга. Қойил. Ануvdan хафа бўлма, ўзи ёнр оз анақароқ. Хоҳласанг, битта ош қилсак-да, ярасак. Болалар шунаقا дейишияпти. Ана, ўзлариям туришибди. Шанба куни соат иккиларда Пушкин паркида тўплансак. Ҳайкални биласанми, ўртадаги-чи? Ушанинг тагида. Калтаклаган бўлишсаям-чи, аммо золотой болалар ҳаммаси. Сени жа-а ёқтириб қолишибди. «Ўғилбона экан», дейишияпти.

Ёқтириб қолпшганмиш! Олдин ўлгудек калтаклаб,

кейин ёқтириб қолишибди! Қишлоқи бўлсам ҳам мард, ўғилбола эканман. Энди ош қилиб ярашарканмиз...

— Ош есак... ярашамизми? — дедим меровланган-дек.

— Кўрқяпсанми? Энди сени ҳеч ким чертмайди.

— Анови милиционер ҳам бўладими?

— Мелиса нима қилади ошда?! Ҳа-а, тушган экансан-да? Ростдан ҳам хўроzга ўхшайсан,— деди у ўзича тусмолини таъкидлаб.— Ҳўш, келасанми?

Анойингни топибсан!

Хайр-маъзурни йифиштириб, индамай автобусга чиқдим.

— Аммо келсанг ўзингга яхши бўларди-да, — деб қолди у орқамдан. — Ҳаммаси золотой болалар.

— Тилла болалар, десанг-чи, биродар! — дедим автобус деразасидан бошимни чиқариб. — Бориб айт ўша оғайниларингга: мен ўз ҳузурини ўйлаб юрган одам өмасман!

Шу тобда бирор афт-башарамни кўриб нима бўлганини сўраса, «Ёлғиз ўзим олти безорини уриб дабдаласини чиқардим», дейишим муқаррар эди.

Уйга келгач, даҳлиздаги тошойнага қараб қўрқиб жетдим. «Энди уч-тўрт кун уйдан чиқолмайсан», деб аҳволимдан кулгандек бўлди у. Афт-ангоримни кўрган янгам ҳам хавотирланиб нима гаплигини сўради.

— Ҳе, безори болалар бир қизга тегажоғлиқ қилишаётган экан, бориб аралашдим. Кўпчилик бўлиб кетишиди, — дедим.

— Яшанг, ҳақиқий жентльменсиз! — деб у мақташга тушган эди, ичкаридан акамнинг тўнғиллагани эшитилди:

— Қаерда жентльменлик қилишини билиш керак!

Янгам «Парво қилманинг», дегандек менга кўз қисиб қўйди.

У музейда ишлайди, санъатшунос. Бундай пайтларда ҳамиша ёнимни олади. Бошқа янгаларга ўхшаб қовоқ

уйганини эслолмайман, доим жилмайиб туради. Ўзига ўхшаган синглиси бўлганда иккиланиб ўти́рмасдим...

... Бир куни китоб дўконидан қайтаётиб, бекатда таниш шоирни учратиб қолдим. Ўтган ой университетда уюштирилган мушоирдан кейин сўзга чиқиб, унинг «Мени сев!», дея маъшуқадан меҳр-шафқат тилаб ёзган шеърини йигит кишига номуносиб йиғлоқиликда айблаб роса танқид қилган эдим. Учрашувдан сўнг у мени четга тортиб: «Самимий фикрларнинг учун раҳмат, дўстим. Қанийди, танқид доим ҳам шундай ҳалол, холисона бўлса. Учрашиб турайлик», дея ўзи ишлайдиган журналга боришимни тайнинлади. Аммо мен унинг шаънига айтгани нордон гапларим учун хижолат чекиб, у ерга боришини хаёлимга ҳам келтирмаган эдим.

Шоир бир тўп улфатлари даврасида туради. Менга кўзи тушдю:

— О-о, дўстим, қайларда юрибсиз? — дея эски қадр-донлар каби қулоч ёзиб хитоб қилди. Шерикларига мени «Бирдан-бир ҳалол танқидчим», деб таништириди.

Улфатлар пича ичиб олишган, ширакайфликка хөф қизгин майл билан янги бир манзилни кўзлаб туришар эди. Вилоятдан келган барваста қоматли йигит бунга айниқса иштиёқманд, ташаббускор бўлиб, ҳаммани қаёқ-қадир қистарди. Ниҳоят, улар мени ҳам қўярда-қўймай «Зангори гумбазлар» кафесига бошлишди.

Қафеда гап аввал юксак шеърияту буюк шоирлар устида кетди: Блок, Мандельштам, Пастернак, Аполлинер, Такубоку, Неруда, Евтушенко, Вознесенский, Рубцов; сарбаст, аруз, бармоқ... Кейин турфа мавзуларга ўтилди: Ван Гог, Пикассо, Бермуд учбурчаги, Фрейд назарияси, Руссонинг тазкира ва изҳорномадари, Томас Майн хатлари, Хемингуэй, Фолкнер, Жойс, Маркес.. Мунозара бўлди: Японияда кўк чой ичиладими, қора чой?..

Шу тоифа масала талашув кафедан чиқилганидан

сўнг — хиёбоиңдаги хоразмча чўгирмага ўхшатиб кузалган пакапа дараҳтлар тагида ҳам давом этди. Ҳеч ким уйига шошилмас, гўё бундай билимдон даврани ташлаб кетиш увол эди.

Бир маҳал теварагимизда қандайдир кампир ўралашиб қолди. Уни тиланчи хаёл қилиб, ўзини саҳоватли санаған барча чўнтак қавлашга тушди. Йўқ, кампирнинг муддаоси бошқа экан. Даврадан чеккароқда у билан гаплашиб, дарди-ҳолини эшитган йигитнинг антишича, унинг яккаю ягона ўғли туҳматга учраб қамалган эмиш. Кампир, ҳақиқат қилинглар, деб узоқ бир қишлоқдан юқори идорага арз билан келибди. Бугуноқ ишини битказиб, кечки поездда қайтмоқчи экан, аммо «Қабул куни эртага, эртага келинг», дейишибди. Борадиган жойи йўқлигидан бу кеча меҳмонхонада тунамоқчи, лекин ҳеч қанақа ҳужжати йўқ экан. Бунинг устига...

Бунинг устига кампирнинг кўриниши жуда почор, фариб эди. У иркитроқ кийимда бўлиб, қўлида доғ босган тугунчак, бутун рафтори билан бу ер, бу кўркам майдонга адашиб келиб қолгандек, ясанган-тусангандан ўткинчилардан баралла фарқ қилиб турар эди.

Даврада муҳокама бошланди:

— Ишоиб бўлмайди, — деди кимдир. — Шубҳали. Ўзимиз қишлоқдан чиқсанмиз, қишлиқни яхши биламиш. Бундай пайтда наҳотки бошқа одам топилмабди?

— Ҳар ҳолда онаси, кампир киши, бирор идорага кирғандан...

— Ахир, шу замонда ҳам бунақа... Қишлоқларда ҳозир, эҳ-ҳэ... Бир гапи бор!

— Балки атайлаб шундай келгандир?

— Бекор гап! Девонароқ бўлса керак, ана, кўзини қаранг.

Кампир бир чеккада, селоб тўла кўзларини тўрвадек енги билан дам-бадам артиб, букчайганча бизга мўлтираб турарди.

— Балки ўғли ростдан ҳам айбдордир?

— Э, ўртоқлар, бундай қозибозлик қилиб ўтиrmай-лиқ, — деди йигитлардан бири. — Кўлимиздан келса, иложини топиб бирор ерга жойлаштирайлик.

— Қаерга жойлаштироқчисиз, хўш? «Тошкент» меҳмонхонасига-я? Дунёning ҳар ёғидан келган ажнабийлар бунинг аҳволини кўриб...

— Кўрса кўрап! Нима, ўшаларнинг онаси йўқми? Бу — она, жабрдийда она! Менга қолса, меҳмонхона-нинг тўри шу кампирники.

Бу ғап хийла баландпарвоз чиққан бўлса-да, ҳеч ким чурқ этиб эътиroz билдиrolмади — ҳамма алланечук сергак тортган эди.

— Тўғри-ю лекин ҳужжати йўқ-да, — деди кимдир минифирлаб.

— Энди-и шу кампирдан келиб-келиб биз ҳужжат талаб қилмайлик, оғайни!

Ҳамма жонсараклик билан кампирни ўраб олди ва икки киши икки ёнида, қолганлар өргашиб, меҳмонхона томон юрдилар.

Меҳмонхонада, қўлларида турли-туман ҳужжатлари, ҳар тарафга югуриб бош маъмурни қидиришга тушдилар. Боя чинакам юксак инсоний шеърият ҳақида узоқ гапирган йигит дам-бадам: «Шу кампирни уйга олиб кетсам-чи» деб қўяр, аммо ҳеч ким унга эътибор бермас эдн.

Бош маъмур, одатдагидек, топилмади. Шунда бу қидир-қидиру бесаранжомликни кузатиб турган эшик назоратчиси биздан нима ганилигини суриштирида:

— Э, шундоқ демайсизларми боятдан бери? Юрияг, онахон, ҳозирча анов диванда бирпас дамингизни олиб туринг, кейин битта хона бор, ўша ерга кириб ётасиз,— деди ва бизга қараб изоҳ берди: — Бунақаси бўлиб туради, йигитлар.

Кампир саргардонликдан толиққан эканми, бора солиб диванга чўзилиб олди.

Ҳамма бирдан енгил тин олди, ҳамма ўзини олижаноб сезарди.

— Энди юринглар, — деди вилоятдан келган йигит зина томон қадам босиб,— номерда муздек пиво бор. Чимкентники!

— Мен кетдим, — деди шоир кутилмаганда. — Мен бормайман!

Улфатлари унга ажабланиб қараши.

— Нақадар олижанобмиз-а! Құчада қолган бир кампирни меҳмонхонага жойлаштирилдик! Ростдан ҳам шунақа олижанобмизми? Бошда уни тиланчи деб ўйладик, гумонсирадик, ҳатто иргандик ҳам, тұғрими? Кейин бұлса бирдан меҳрибонликка ўтиб, югур-югурға тушдик. Бир-бirimizdan уялганимиздан, ҳа, хұжакүрсинга! Шундай эмасми? Нақадар олижанобмиз-а! Анов қоровул биздан минг карра одамироқ экан. Бизга үхшаб муҳокама қилиб ўтирамади, гумонсирамади ҳам, ҳужжат ҳам сұрамади. Олижаноб пасткашлар! Олижаноблик ҳам хұжакүрсинга! Сен, Сувон, уни ҳеч қағон уйингга йўлатмасдинг. Уйингга, тұрт хонали, паркет поли ярақлаб турған уйингга кимлиги номаълум, исқирт бир кампирни қандай олиб борасан?! Ким күради буни, ким билади? Айтсанг, шундай қылдым, деб жар солиб айтсанг ҳам ҳеч ким ишонмайди-ку! Тұғри қиласан, оборма! Шарманда олижаноблар! Биз нуқул гапирамиз, ҳа, гап сотишдан бошқасига ярамаймиз. Энди ўзимизни олижаноб чоғлаб, шинам номерда ялпайиб муздек піво ичамиз. Йўқ, мен кетдим!— шоир ҳеч ким билан хайр-хўш қилмай шарт бурилдию жўнаб қолди.

Афтидан, шериклари унинг феълини билишарди, «Қайфи ошди, шоир-да!», деб ўйлашди ва индамай қўл силтаб, муздек пиво ичиш учун зина томон юришди. Шунда мен ким билан кетишни билмай бир зум тарад-дудланиб қолдим.

Ахир, мени бу даврага Шоир таклиф қилган эди-ку!

Уч кун ўқишига бормай уйда ётдим. Тўртинчи куни дарсга чиқиб, тушдан кейин француз тилидан синов бўлишини эшитдим. Эшитдиму кайфиятим бузилди: «Ана энди Дилора Жўраевна мендан ўчини олади».

Дилора Жўраевна — француз тили муаллимамиз; мен билан қариб тенгқур, нари борса, бир ёш, ярим ёш каттадир. Ўзи ҳам француз фильмларидағи киноюлдузларга ўхшайди. Дарс пайти ҳаммамиз унинг оғзидан чиқаётган сўзларга эмас, ҳуснига маҳлиё бўлиб ўтирамиз. Буни сезса ҳам билмаганга олади. Умуман, унинг ҳали бирор марта жилмайганини кўрган эмасмиз — доим тўқсон яшар кампирдек қовоғини осилтириб юради. Шундай ёш, шундай гўзал қиз... жилмайишни билмайди. Ҳайронман, бундай нозанинни опаси «Хўмрайиб юрсин!», деб туққанми? У сира ёлчитиб дарс ўтмайди. Бир-икки кишидан ўтилган мавзуни наридан-бери сўрайди-да, бугунгисини тез-тез тушунтириб, сумкаласини билагига иладио ёв қувгандек жўнаб қолади.

Бир гал у сумкаласини билагига илган заҳоти, «Кечирасиз, Дилора Жўраевна, бир минутга! — дедим ўрнимдан туриб. — Сиз бизга жуда ёқасиз, сизни ҳаммамиз яхши кўрамиз, одам сифатида, аёл сифатида. Лекин, назаримда, сиз бошқа бирор соҳанинг бошини тутишингиз керакка ўхшайди...» У гаимининг давомини эшитмай, юзини чангллаганча эшикка отилди. Йўлакка чиққанимизда дераза олдида рўмолчаси билан кўзини артиб турарди. Буни кўрган курсдошларим менга қарашди. Ичимда хижолат аралаш бир ўкинч туйдим.

Раҳматилла курсбоши сифатида бу гапни ўз вақтида етказиб улгурган шекилли, эртаси куни мени деканатга чақириб роса таъзиримни беришди, «Хулқингизни тузатмасангиз, стипендиядан ўчирамиз, керак бўлса университетдан ҳайдашимиз ҳам мумкин», деб пўписа қилишибди. Мен ҳам бўш келмадим. Шу тариқа ҳазил зилга айлананаёзганда менга ҳомий курс раҳбаримиз Убайдул-

лаев орага тушиб, гуноҳимни енгиллаштири: яна бир ҳайфсан билан қутулдим.

Мана, бугун — француз тилидан синов, Дилора Жўраевна мендан боплаб ўчини олади.

Кутганимдек, у ҳаммани бир-бир чақириб синовдан ўтказгач, чиқариб юбораверди. Охирида ёлғиз мен қолдим.

— Ҳа, Шодибеков,— деди у,— келмайсизми? Ёки менга муносиброқ касб қидириш билан бандмисиз?

— Йўғ-э,— дея кулимсираганча бориб рўпарасидан жой олдим.

У юзимга синовчан боқаркан, кутилмаганда:

— Мен сизга зачёт қўйиб бераман,— деди француз-чалаб. Кейин ўзбек тилига ўтди:— Ўшандаги самимиятингиз учун! Дангалчилигинги менга ёқди. Тўғри пайқабсиз, ростдан ҳам мен бошқа соҳанинг одами бўлсан керак. Буни ўзим ҳам биламан. Э, қўйинг, бу узоқ тирих... Лекин сиз француз тилини яхшилаб ўрганишинги лозим. Бальзак шу тилда ижод қилган, Флобер, Мопассан... Қолаверса, бу муҳаббат тили...

— Муҳаббатнинг тилини билиш осон эмас-да,— дедим чала-чулпа француздечалаб.

Бу гапни эшитиб Дилора Жўраевна жилмайди, мулоийм жилмайиб қўйди. Биринчи марта!

Нега шу чоққача тишининг оқиги бирорвга кўрсағмаган одам ҳозир кулди, жилмайди? Нега-ўч олиш ўрнига менга зачёт қўйиб берди? Билимим ҳаминқадар эканини сезиб турибди-ку? Чиндан ҳам ўша дангалчилигим, шартакилигим учунми? Ажаб! Қим билсин, балки ўзи шундай гапларга зордир, бошқалардан эшитмагандир; балки шунинг учун кулмас, жилмаймас...

Аудиториядан қушдек енгил тортиб чиқдим. Мен бугун биринчи марта Дилора Жўраевнанинг жилмайганини кўрган, биринчи марта ғалабага эришган эдим! Энди у доим мени кўрганда жилмайиб юради, энди мен доим ғалаба қозонавераман!

Йўқ, ҳовлиққан, адашган эканман — адабиёт тарихи имтиҳонидан мағлубиятга учрадим..

— Менинг имтиҳон тартибим шундай, — деди Аҳмадхонов одатича сочини бармоқлари билан тарайтуриб, — дарсларга фаол қатнашиб, лекцияни мунтазам ёзиб борадиган ўртоқларга биттадан савол бераман. Шунга жавоб қайтарса — бўлди, баҳосини олади. Майдалаб сўраб ўтирумайман, ишонаман. Қолганлар билан эса маълум тартибда гаплашамиз. Шунга розимисизлар?

— Розимиз, розимиз, — дейишиди олдинги қаторда ўтирган Бўстон, Мадҳиддин, Жавлибой ва шуларга ўхшаганлар.

— Бўпти, бўлмаса бошладик. Ҳамма ўз жойида ўтиради. Қурсдоши қандай жавоб қайтаришини кўрсинг-да. Лекин, айтиб қўяй, биттадан бўлса ҳам анои саволлар эмас, — деди у огоҳлантириб. — Хў-ўш, ким айтади — Машрабнинг оти нега Машраб?

Бўстон гул-гул яшнаб қўл кўтарди.

— Марҳамат.

— Онасининг қорнида йиғлагани учун! — дея янада гул-гул яшнаб жавоб берди Бўстон.

— Ана, дарсга фаол қатнашишинг, лекцияларни мунтазам ёзиб боришнинг фойдаси! — деди домла ким-гадир шама қилаётгандек.— Дафтарчангизни беринг, синглим.

Ёпираи, бу қандай гап, бу қандай имтиҳон?! Шу ҳам савол бўлдими — «Машрабнинг оти нега Машраб?»! Аввало, унинг оти Машраб эмас — Бобораҳим, тахаллуси — Машраб. («Қуддуссан азиз Хожам Машраб отимни қўйдилар.») «Онасининг қорнида йиғлагани учун» эмиш! Ким эшитибди буни — Аҳмадхоновми ёки сенми, Бўстон?! Ахир, Машраб — ажойиб исёнкор шоир, ўтли газаллар муаллифи, оғир қисматга маҳкум этилган бахтиқаро инсон. «Машрабнинг оти нега Машраб?» эмиш! Машраб дунёга исён билан келди, ўз даврига исён бўлиб яшади,

исён билан кетди. («Дунёға келиб ранжу балони кўруб ўттум, Юз ранжу бало шиддатидин ўргулиб ўттум».) Машраб бундай ипириски, бундай бачкана эмас эди! Машраб дунёқараш бобидаги салафлари — Мансур Халлож ва Насимий изидан бориб, «Аналҳақ!» — «Мен — оллоҳман!», дея бекорга жар соглан, «Ҳафт осмонга сифмадим, леки бекорга нола қилган эмас. Баъзи бир замондошлари сингари сарой шонрига айланиб, саодатда яшаб, тинчгина ижод этиши мумкин эди-ку! («Дунё ясаниб, жайлва қилиб олдима келди, «Борғил нари», деб кетига бир шатталаб ўттум».) Нега у ҳаёт ва ижодда осон йўлни танламади? Нега рақиблари қархисида бўйин эгмади? Нега оғир қисматни танлаб, дорга осилди? Нега уни Девонаи Машраб дейдилар? Нега унинг тахаллуси ҳамон кўплаб шоирлар орасида талаш? У бизга оташин ғазаллари, мана шундай ҳақгўй, шери мардлиги билан қадрли. Биз ана шунинг учун унинг ҳаёти ва ижодини ўрганамиз. «Машрабининг оти нега Машраб?» эмиш!..

Тишимни тишимга қўйинб ўтиришдан ўзга чора йўқ эди: гуноҳкорман!

Бўстон бизга ғолибона бир назар ташлади-да, сумкачасини билагига илиб жўнади. У ҳозир уйига боради, конфет шимиб шеърлар ёзади, кечқурун телевизорга чиқиб таманно билан ўқиб беради. Уни кўриб ҳамма: «Гўзал қиз, ажойиб шоира экан», дейди.

Имтиҳон бояги йўсинда давом этарди: «Нодиранинг неча боласи бор эди? Қизи бўлганми, йўқми?», «Турдини неча марта сазои қилдилар?», «Увайсийнинг эри ким эди? Уни ким севган?..»

Мадҳиддин, Жавлибой, Арофат... бизга мағрур назар ташлаганча бирин-бирин чиқиб кетишиди. «Қолганлар», яъни менга ўхшаганларга навбат келди. Домла уларни эзиз сўрай бошлади, кўпчилигини даккию дашном билан «Кейин келасиз», дея қайтариб юборди.

Менга гал етганда Аҳмадхонов кинояли илжайди:

— Ия, ўзимнинг оғайним-ку! Келинг, келинг! Сизни ҳам кўрар кун бор экан-а, буни қаранг! — Сўнг бирдан жиддий тортиб, мулойим-хунук оҳангда маслаҳат солди: — Сизни нима қилдик энди, ука, дарсга мутлақо қатнашмагансиз-ку? Ёки қатнашганмисиз? Қатиашганиман, денг, бир оғиз — ҳозироқ, сўрамасдан баҳо қўйиб бераман.

Садақа тутқазмоқчи! Миқ этмай безрайиб ўтиравердим.

— Сиз айтинг бўлмаса, — деди Аҳмадхонов ёнида ўтирган Раҳматиллага қараб, — бу оғайнимиз печта дарсга қатнашганлар? Ҳар ҳолда курсбошисиз, назорат қилиб борсангиз керак?

Мен дарсдан маҳрум этилгунимга қадар қатнашиб юрганимни айтишини кутиб Раҳматиллага илииж билан тикилдим. Йўқ, мажлисда танқид қилганида башарасига китоб отганимни эсладими, ҳар нечук, Раҳматилла вазиятдан усталик билан фойдаланиб, аламидан чиқди:

— Бўйнингизга олинг, Асқар, домланинг дарслариға қатнашмагансиз, — деди ўша китобни қайтариб ўзимнинг башарамга отгандек.

— Ана, масала равшан! — деди Аҳмадхонов ошкора тантана билан. — Энди очиқласига гаплашсак бўлар? Айтинг-чи, оғайнини, қаерликсиз?

— Сурхондарёданман.

— Сурхондарёдек жойдан келиб бу ерда нима иш қилиб юрибсиз?

— Ўқияпман.

— Дарсларга кирмай ўқияпман, денг? Зўр, зўр! — Аҳмадхонов яна Раҳматилладан кўмак сўради: — Бу оғайнимиз бошқа фанлардан қалай? Уларга ҳам қатнашмай ўқийдиларми?

Хайрият, бу гал Раҳматилла инсоф қилди:

— Бошқаларидан тузук. Яхши ўқийди ўзи.

— Тушунарли. Хў-ўш, қани, айтинг-чи, оғайнини, яхши ўқиб нималарни ўрганяпсиз?

— Ўзбек адабиёти тарихини,— дедим пинағимни бузмай. Билмайман, нима хаёлда оғзимдан чиққани шу бўлди.

— Ҳо! Шундай денг? И-иҳм,— Аҳмадхоновнинг қошлиари чимирилди. — Унда ҳозир кўрамиз. Кўрами-из. Қелинг, оғайни, сизни қийнаб ўтирмай бундай қилайлик: мен битта савол берсам, биттагина! Шунга жавоб беролсангиз — марра сизники. Эркакча гап. Ўзи осонгина савол. Ҳар учала қисмидан бўлса ҳам майли-я? Ахир, сиз бутун адабиёт тарихини ўрганаётган экансиз-ку, шундайми?

— Кечирасиз, домла, мен Бўстон эмасман!

— Бўстон?! Қанақа Бўстон? — Аҳмадхонов сапчиб турди. Курси суюнчиғига ташлаб қўйган плаши оҳиста сирғалиб ерга тушди. Мен столни айланиб ўтиб уни ердан олдим-да бир-икки силкиб қўлига тутқаздим. У илашини шартта-шартта қоқаркан, тутақиб ўшқира кетди: — Нима деяпти бу бола? Қанақа одам ўзи бу? Мен бунга яхшилик қилмоқчи бўлсам...

— «Химчистка»га бериш керак,— дедим плашга ишора қилиб секингина.

— Маслаҳатингиз учун раҳмат! Майли, бояги гап. Мен сўзидан қайтадиганлардан эмасман.— У худди қарзи бордек юзимга иддао билан тикилди ва осонгина сенсирашга ўтиб, менга атаган саволини берди: — Қани, айт-чи, Отойи нечанчи йилда туғилган?

Бирдан шайтоним қўзиди-ю, ўзимни зўрға тўхтатиб қолдим. Энди бундан нарёғига ўтиб бўлмайди — у ёғи хавфли!

«Отойи, Отойи,— дея у ҳақда билганларимни эслай бошладим:— XV асрда яшаб ижод этган лирик шоир... Дунёвий адабиёт намояндаларидан.. «Ул санамким, сув яқосинда паридек ўлтирур», деб бошланадиган ғазали машҳур, қўшиқ бўлиб кетган.. Балхда яшаб ўтган, факирона кун кечирган. Дунёвий ишлар билан шуғулланған чифатой шоир. Қувноқ, дарвешнамо одам бўлган, Отойи, Отойи... Асл номи аниқланмаган, вафот этган

йили ҳам. Отойи, Отойи... Нечанчи йил туғилган эди? Тўхта! Нега у туғилган йилини сўради? Дема-ак... туғилган йили номаълум! Ҳа-ҳа, дарвоҷе, Хоразмий, Сайфи Саройн, Дурбек, Отойиларнинг туғилган йиллари аниқланмаган, энди эсимга тушди. Бундан чиқди, жўрттага шу саволни бериб мени майна қилмоқчи! Тушунарли. «Отойининг туғилган йили маълум эмас. Аниқлаш учун тадқиқот олиб боришаёт. Ҳаммаси маълум бўлганда сизга ўхшаганларга ион қолармиди!», десам-чи? Йўқ, «Уни сизга ўхшаганлар топиши керак!», дейман — берган саволида маъно қолмай, ўзи аҳмоқча чиқади!»

— Хўш? — Аҳмадхонов жойига бамайлихотир ўрнанашиб олган, бошини бир ёнга солганча мендан жавоб кутар эди. Негадир ўзимдан нафратланиб кетдим. Шарт бошимни кўтариб, бир лаҳза унинг кўзига тикилдим:

— Билмайман!

Шу гапни айтдиму бирдан енгил тортдим.

— Ана шундан бўлади! — деди Аҳмадхонов жавоб беролмаслигимни олдиндан билгандек ачитиб. — Билмасанг, кўтар бунингни!

Қарасам, ҳафсала билан шилдироқ қофозга ўралган синов дафтарчам остонаяда — оёқ остида ётибди. Худди бирор ўзимни шундай итқитиб юборгандек бўлдию титраб Аҳмадхоновга юзландим.

— Шунга лойиқ, — деди у киноядор бош иргаб.

— Кечирасиз, домла, олиб беринг! — дедим ловилаб.

— Нима-нима?! Нима деяпсан?

— Мен сизнинг плашингизни олиб бердим-ку!..

Аҳмадхонов кўзлари бақрайган кўйи анграйиб қолди. Раҳматилла дафтарчамни олиб келиб қўлимга тутқазди-да, тирсагимдан чимдиганча эшик томон бошлади.

— Вот герой! Вот қаҳрамон! — деди Аҳмадхонов орқамдан.

Имтиҳондан йиқилиб чиқдим, бироқ шу тобда енгилган одамга ўхшамасдим.

... — Кибернетиканинг фалсафага нима алоқаси бор?! — дея луқма ташлади кимдир. Олдинги қаторда ўтирган Юнус экан. Дарсларин қийинчилек билан ўзлаштирадиган, лекин билимга, билишга иштиёғи зўр, «Отам мени ўқишга юборган!», деб машгулотларга мунтазам қатнайдиган, ҳатто паҳтага ҳам бир чамадон китоб кўтариб борган Юнус — «Тиришқоқ Юн-Су».

Бу гапни мен ҳам айтишим мумкин эди. Ҳамма айтиши мумкин.

— Алоқаси бор, — деди домла мулоим жилмайиб Юнусга, менга, ҳаммамизга. — Бевосита алоқаси бор.

«Тиришқоқ Юн-Су» шубҳа қилмади. Мен ҳам шубҳа қилмадим. Ҳаммамиз ишондик.

Қарама-қаршиликлар кураши ва бирлиги қонуни, ишкорни инкор, сабаб ва оқибат тасодиф ва зарурят... Мана шу домла — Фозилов дарсга кирдию биз фалсафани тушуна бошладик, яхши кўриб қолдик. Фозилов, фалсафа — фанларнинг подшоси, деб бизни ишонтирган эди. Унинг дарсида ҳатто — давомати чатоқлиги учун ҳар ой бир марта ўқишдан «ҳайдаладиган» машҳур Бозор Бобожонов ҳам кўриниб қоларди.

— Агар заррача шубҳа қилсаларинг, — деди Фозилов, — жума куни дарсдан кейин теракзор олдида тўплашинглар. Бир жойга борамиз.

Жума куни теракзор ёқасида бизни каттакон бир автобус кутиб туради. Ўнга ўтириб Кибернетика институтига жўнадик. Домламиз гаплашиб қўйган экан шешилли, институтда илиқ қарши олишди. Биз бу ерда ийъжизалар оламига кириб қолгандек эдик. Машина ialiб берган музика, чизган тасвиirlар...

Экскурсиямиз охирида машҳур академикнинг қабулида бўлдик. У биз билан суҳбат ўтказди, айниқса, домламизни эҳтиром билан ёнига ўтқазиб, ҳар гапида «Шундай эмасми, Диёр Фозилович?», дея мурожаат қилгани бизга ёқди.

Университетга қайтиб келганимизда автобусни дом-

гим қоқ бўлиб кетгани эсимга тушиб, ўша томон юрдим. Сувни энди оғзимга олиб борганимда Жавлибой:

— Ҳа, бўлмадими? — деди сохта меҳрибончилик билан. Ўқрайганимни кўриб, нигоҳимга дош беролмай кўзини олиб қочди, ёнидаги қизларга юзланиб ўжмайдир дея сайрай бошлади.

У худо урган ичиқора! Доим қўлтиғида бир дастга китоб, имтиҳон бораётган хона эшигига пойлаб туради. Чиққан кишиндан дарҳол: «Бўрими, тулки?», деб сўрайди. Тулки, яъни пастроқ баҳо эканини эшитса, ҳиринглаб кулади — ошкора севинади, бўри, яъни юқорироқ баҳони эшитганида эса башараси бирданига буришади — ошкора куяди.

Жавли ёзин-қишин тоғу даштда жафо чекиб мол кетидан юрадиган («Ўғлим ўқиб одам бўлсин») чўпон отаси — отасининг қўйлари ёрдамида ўқимоқда. У ҳар таътилда домлаларни қишлоғига бошлаб боради. Отаси, кўзлари тутундан қизариб, қўллари лойдан қавариб, шаҳардан келган улуғларга — ўғлининг домлаларига югуриб-елганча тандир кабоб қилиб беради. Кейин уларга қараб хокисорона илжаяди: «Домлажонлар, Жавлиқўлнинг домлажонлари, шуни ўқитиб одам қилиб берасизлар-да энди...»

Мен биринчи марта Жавлини университетга кириш учун ҳужжат топшираётган куним кўрганман. Ўшанда нимдош дўппию фижим шим кийганчуваккина қишлоқи бола эди. Бирга келган отаси, бошида мўйнаси тўқилган ярғоқ телпак, эгнида чопон-белбоғ, афтини соқол босган, ўтган-кетганига анграйганча бир чеккада итоаткорона қўл қовуштириб турарди. Кейин эшитсам, ўшанда отабола қишлоқларидан чиққан бир домланинг уйига қўнган экан. Тасаввур қиласман: чорпояда ота домла билан Жавлиқўлнинг ўқишга кириши хусусида ийманибина музокара олиб борган, савдолашган, ўғил эса пастда — дастёрикни ўрнига қўйган.

Жавли бир ҳафта ичидаги таниб бўлмас даражада ўз-

ламиз ўз ёнидан кира қилгани маълум бўлди. Хижолэт чекиб, Раҳматиллаға пул йифиб бердик. Буни кўрган Фозиловнинг астойдил жаҳли чиқди:

— Кибернетиканинг фалсафага алоқасини ҳали ҳам тушуňмабсизлар-да! — деди у ранжиб. — Майли, байрамни яхши ўтказинглар, қолганини кейин гаплашамиз, (Май байрами арафаси эди.)

Байрамни яхши ўтказдик. Байрамдан кейин ўқишига бордигу... деканат деворида Фозиловнинг мулоийим боқиб тушган суратини қора ҳошия ичидаги кўрдик! Ногаҳенний юрак хуружи!

Ундан кейинги ҳаммаси бекор! Бу хүкъук хабарни аудиторияда ҳам эшиганимиздан ўрнимиздан туриб марҳумнинг хотираси учун бир дақиқа сукут сақлаганимизу дарсни ташлаб, бир автобус бўлиб таъзияга борганимиз, юрак-юракдан йиғлаганларимиз — ҳамма-ҳаммаси бекор, бефойда!

Бизга фалсафадан бошқа домла дарс бера бошлади. Лекин энди фалсафага тушунмай қўйдик. Бунинг сабаби нима, ниманинг оқибати эди бу? Тасодифмиди бу ёки зарурият?

Дунёда фалсафага алоқасиз нарса йўқ — билиб қолган гапимиз шу бўлди.

— Уртоқ Шодибеков!

Овоз келган тарафга қараб, қатор газ-сув будкалари олдида атрофига қуий курсларда ўқийдиган бир гуруҳ ясанчоқ қизни тўплаб, тилла тишини кўрсатганча ишшайиб турган Жавлибой Мелибоевни кўрдим.

Худо мушукни нега яратган — бандасининг йўлини қесиб, дилини хира этиш учун эмасми? Жавлибой мушукка ўхшайди.

— Бўрими, тулки? — деди у мени масхара қилмоқчилик баттар ишшайиб.

— Теват! — дедим тишларимни ғижирлатиб ва томо-

гарди, маданий қиёфага кирди: нимдош дўппию фижим чолворни ечиб бурчакка отди (отаси уларни хуржунинг солиб қишлоққа, укаларига олиб кетди) — почаси кенг, шалпиллаб юрадиган замонавий шим тикирди; қаёқ-дандир газетанинг акси туширилган олифта кўйлак топди; сочини елкасигача ўстирди; кейинроқ сўйлоғини суртириб, ўрининг тилла тиш қўйдирди; маврид-бемаврид каттакон портфель кўтариб юрадиган, оҳангдор қилиб гапирадиган бўлиб қолди. Шу тариқа кечагина қишлоқдан келган Жавлиқул «кимсан Жавлибой Мелибов»га айланиб кетди! Энди қачон қарасанг, у албатта бирор домланинг орқасидан соядек эргашиб юради, унинг орқасидан эса бир тўда ясанган-тусанган қиз... «Жавливой ака, Жавливой ака...» Бир кун у шартта домлалардан бирортасининг этагига ёпишиб, аспирантликка эришади ва шартта орқасига буриладиу отаси мансабдорроқ бирор қизнинг қўлидан ушлаб, унга уйланиб олади. Ҳозирча эса ўшанга замин тайёрлагандек сабр-чидам билан эргашиб ва эргаштириб юрибди.

Жавлибой чўнтағидан сигарета чиқариб лабига олифталарча қистирди-да (сувдан кейин сигарета!), сидаги қизга киборона бир назар ташлаб гугурт чақди. Қиз, индамасанг, шарм-ҳаёни йифишириб унинг бўйни аосилиб оладиган. У Жавлибойни камида совхоз директорининг ўғли, ажабтургина бойвачча, деб ўйлайди — тандир кабоб нималигини билмайди, Жавлининг отасини ҳам кўрмаган, фақат ўзини билади, уни севади.

Кўлимдаги сувни аллақачон ичиб бўлган эдим, аммо Жавлибойга бир найза суқмай бу ердан кетолмаслигими ни сездим.

— Жавливой,— дедим,— бу, қачон энди аспирант бўдадилар?

Жавли шўрлик гапимни жиддий фаҳмладими ёки ғазиятдан фойдаланиб қизларнинг олдида мақтангиси елдими, мўлжалини очиқ айтди:

— Үқишини битираильик...

— Ана, — дея унинг оғзидан сўзини илиб қизларга юзландим, — аспирант тап-тайёр! Бирорталаринг шартта тегиб олинглар. Аспирант-а! Бунинг устига отаси совхоз директори!..

...Ҳамон Уни эсласам, хижолатдан кичрайиб қолган-дек бўламан. Уни ёмон кўрардим, «Ёмон кўрардим», дейиш оз! Бошқалар ҳам унга ғашлик, ҳасад билан қа-рашарди. У курсимизда тўсатдан пайдо бўлди: на киришимтиҳонларида кўринди, на бошқа пайт — тўсатдан пайдо бўлди. Ўша куниёқ Унинг қўлига курс журналини тутқазиб, курсбоши қилиб тайинлашди. У ҳам ўша ку-ниёқ ис олгандек атрофида гирдикапалак бўлиб қолган Жавлибойга журнални ошириб, чеккага чиқиб кетди. Баъзи домлалар У билан алланечук қуюқ, жилмайис гаплашардилар. Аймо У буларга бефарқ, ҳеч кимга ара лашмас, доим ёлғиз юрар, лекцияларда паришенхотиј ўтирас, кўпинча дарс тугамай кетиб қолар эди. Бора бора биз Ўнга кўнникдик, «Шу экан-да», деб ортиқ У ҳақ да бош қотирмай қўйдик. У тўсатдан кўринмай қолди қандай пайдо бўлган бўлса, шундай кўринмай қолди. Биз аввалига ажаблайндик, ўзимизча қувондик ҳам. Кийинроқ Жавлибойдан Унинг гидрогеологларга қўшилини Помирга, узоқ муддатли экспедицияга жўнаб кетганин эшитдик. Жавлибойнинг айтишича, У йирик бир олим нинг ўғли бўлиб, раъийга қарамасдан ўқишига жойла қўйишиган экан. «Биламан, ҳаммаларинг мени ёмон кўрасизлар, тўғри қиласизлар» деганиш У бир гал Жавлибойга.

Ҳамон ўша собиқ курсдошимни эсласам, хижолатдан кичрайиб қолгандек бўламан...

— Аспирант бўлмоқчиман! — деб жарилладим кеп-курун акамга.

Томдан тараша тушгандек гапларимга ўрганиб кетган акамни бу янгилик у қадар ҳайрон қолдирмади.

— Аспирант?! — деди у энсаси қотиброқ. — Марҳамат, бўлгин, ким бўлма, деяпти?

— Илмий иш қиласман, диссертация ёзаман! — дедим унинг пичингига бепарво.

— Аввал диплом иши ёзгин, ўқишни битир, кейин бир гап бўлар. Уставерса, бу сен ўйлаганчалик осон иш эмас, — дея акам чени инсофу андишага чақирмоқчи бўлди.

— Нимаси қийин экан? Ёзаман, десам, баъзи бир ҷаласавод лапашангларингизга ўхшаб олти-етти йилга чўзид юрмай, икки йилда битириб ташлайман.

— Оҳ-оҳ, у сизга бўёқчининг иили экан-да,— деб шаштимдан қайтаришга уринди акам.

— Бўёқчининг иилими, иили эмасми, менга бари бир, — дедим ўжарлик эгарига маҳкам ўринашиб ва ўзим кутмаганимда дардимнинг бир чети очилиб кетди: — Аҳмадхонов деган бир домламиз бор, лекцияни дафтарига қараб ўқиёди. Тағин имтиҳонда бемаъни саволлари билан бошни қотиради, ёмон кўрганларидан ўч олади.

— Тўғри, сен айтгандакалар ҳам йўқ эмас, — дея акам муроса йўлини тутди.— Унақалар ҳамма соҳада учрайди.

— Учрайди-ку, лекин олимлар орасида бўлгани ёмонда.

— Ҳай, буни қўй, илмий иш, дедингми боя? — Сезиб турибман: у мени калака қилмоқчи. — Қизиқ, мавзу танладингми ўзи? Номи нима бўлади?

— Номи — «Отойининг туғилган йили» бўлади. Классик адабиётдан!

— «Отойининг туғилган йили?» Менингча, бу, эҳтимол, бадиий асарга кетар, лекин илмий ишга ном бўйламайди. Ўйлаб кўр.

— Бадиий асар бўлса бадиий асар-да.

Ростдан ҳам, шу мавзуда илмий иш қилсан-чи? Ахир, токай шўрлик студентлар «Отойи нечайчи йилда туғилган?» деганга ўхшаш бемаъни саволларга учраб,

мендек сарсон бўлиб юришади? Классик адабиётдаги ана шундай аниқланмаган, ҳозиргача номаълум жиҳатларни йиғаман-да, тадқиқ қиласан. Қерак бўлса, Отоининг изидан у яшаб ўтган Балхгача бораман. Ана кейин буни чинакам илмий иш, кашфиёт, деса бўлади. Үшанда Зиёхон Аҳмадхоновга ўхшаган ипириски чаламуллаларга нон ҳам қолмайди.

— Ўзинг биласан, ука. Аммо бу феълинг, бу андишасизлигу бетгачопарлигингни ташламас экансан, сендан олим чиқишига кўзим етмайди.

— Нима, олим бўлиш учун...

— Қалла керак! Лекин сенга ўхшаб, каллам зўр, деб каттаю кичикни менсимай, дуч келган жойга калла уравериш ярамайди.

— Йўқ, йў-ўқ, ака, сиз гапни бошқа ёқقا бурдингиз. Келинг, бекнимачоқ ўйнамайлик. Домлага хушомад қилиб, маврид-бемаврид тиржайиб туриш, папкасини кўтариб орқасидан соядек эргашиб юриш, шимининг почасига гард юқса, ялагудек бўлиб пуфлаш керак, денг? Иш битгунча ҳар қандай пасткашлигу абраҳимкакча бориши, доим муросаю мадора йўлини тутиш керак, денг? Шусиз ҳеч бир ишинг битмайди — сендан угина, мендан бугина, дессангиз-чи?! Тупурдим ўшанақа!..

Акам қошларини чимирганча менга тикилиб, гапларимни фавқулодда сабр-бардош билан тингларди. Буни кўриб бир оз шаштимдан тушдим. Акам нега бу қадар тантиқлигимга чидаб, миқ этмай ўтирибди? Унинг ўрнида мен бўлиб, укам шундай гапларни айтса, нима қиласадим? Дафъатан акамнинг босиқлигини англагандек бўлдим. Отам билан онам телефонда унга доим тайинлайдиган гаплар эсимга тушди: «Ўкангга эҳтиёт бўй унча-мунча гапларига оғирлик қил». Лекин бари бир оташин нутқимни бўшаштирмай якунлашга тиришиб, кўтара савдо қилдим:

— Сиз менга бир чамадон пул беринг...

— Упкангни бос! — Менинг ўз-ўзимдан тувақиб айт-

ган пурмаломат гапларимга акамнинг жавоб луқмаси шу бўлди.— Хўп, тур энди, бориб ёт. Эртага имтиҳонинг бор шекилли, а? Ия, дарвоҷе, бугун эмасмиди? Ҳмм... — У мендан кўз узиб, хонтахтага тирсак тираганча деразага боқди. Акамнинг ғалати одати бор: ўртамиизда бояига ўхшаш гап ўтса ёки жиддийроқ бирор шимани айтмоқчи бўлса, негадир юзимга қарамасликка уринади.

Шу тариқа бир-биrimizga сўз қўшмай узоқ ўтиридан. Юрагимни мов мушук таталаётгандек безовта эдим. Бир пайт акам вазмин оҳангда гап бошлади:

— Ука, ҳаётда ҳаммавақт ҳалол бўлиш керак, ўзини буни яхши биласан. Ҷезишмча, ўша домла билан ораларингда жиддийроқ гап ўтганга ўхшайди. Мен танишларим орқали баҳонгни қўйдириб беришим мумкин, албатта. Лекин сен, бояги гапларни айтган одам, биламан, бунга ҳеч қаҷон кўнмайсан. Ўзимнинг ҳам виждоним йўл қўймайди. Яқинда янганг иккаламиз Иссиқ-кўлга кетмоқчимиз, бир ойга. Қайтгуннимизча, ўша имтиҳондан ўтиб ол. Уқдингми?

Мен акамни энди кўраётгандек унга ҳайрат билан тикилиб қолдим. Ҳа-а, олим бўлиш ҳам ҳазилакам иш эмас экан!..

— Асқар жўра, эгилган бошни қилич кесмас,— деди Раҳматилла ўша айбини ювмоқчи бўлиб.— Домла Аҳмадхонов: «Келиб кечирим сўрасин, баҳо қўйиб бераман», деянитилар.

Ривоят қилишларича, Балх шаҳрининг ҳокими Маҳмуд Катагон қаландар қиёфасидаги Машрабга «илтибот» кўрсатиб таом узатганида, у Маржон лақабли итига ташлаган, бироқ ит ҳам хўжасидан ибрат олиб садақага бурилиб қарамаган экан.

— Бориб етказ ўша Аҳмадхоновингга: тушини сувга айтсин! — дедим.

Бу гапни Аҳмадхоновга бажонидил етказган Раҳматилла икки кундан кейин янги хабар топиб келди:

— Домла айтяптиларки: «Бўлмаса ўзидан кўрсин, курсда қолиб иккинчи йил ўқийди, лекцияларимга қатнашгачгина баҳосини олади».

Демак, мен курсда шармандаларча қолиб, Матлуба ва Акбаровалар билан ўқийман! Демак, энди улар менинг устимдан истаганча қаҳқаҳа отадилар. Демак, энди менинг ўша мағрур Асқар Шодибеков бўлиб бош кўтариб юргилигим йўқ. Демак, уйдагилару қишлоқдагилар, акаму янгамнинг олдида итдек изза бўламан. Демак, танаффус пайтлари Мадҳиддин, Бўстон, Жавлибой ва Маратлар ёнимдан «Баттар бўл!», дегандек ғолибона тиржайиб ўтадилар. Демак, байрамларим барҳам топди...

Ўзим пиширган ош бўғзимга тиқилган кўйи ана шундай хуноб бўлиб юрганимда «фожиам»дан хабардор Убайдуллаев бир куни йўлакда сўраб қолди:

— Ишлар нима бўляпти, Асқаржон?

— Ишлар... келаси йилга қоладиганга ўхшаяпти, домла,— деб очиғини айтдим-қўйдим.

— Ия, ия, шундайми? Чатоқ-ку. Қани, буёққа юрингчи.

У мени деканатга бошлаб кирди-да, рўпарасига ўтказиб, афтимга қарай-қарай бир варақ қофозга ниманидир ёза бошлади.

Убайдуллаев илмий ишини шу йил Бокуда ёқлас-келган. Ҳамма уни, келажакда йирик тадқиқотчи олим бўлади, дейди. Ўзи ҳали жуда ёш, ниҳоятда камсуқум студентлар олдида ҳам алланечук тортиниб, қимтиниң туради. Гарчанд, давомату келди-кетдига иши бўлмаса ҳам ҳеч ким унинг дарсини қолдирмайди. Биз у билан пахта теримига чиққанимизда яқин бўлиб қолган эдик. У кечқурун гулхан атрофидаги гурунгларимизга қатнашар, ҳали бизга нотаниш шоирларнинг шеърларидан ўқиб берар эди.

Убайдуллаев менга негадир бошқача ишонч, ихлос билан қарайди. Биз кўпинча кутубхонада бирга ўтириб

қоламиз, бирга чиқиб овқатланамиз, овқатдан сўнг чекишиб турли мавзуларда суҳбатлашамиз. «Бошқа домлалар келмайди-ку?», деб кутубхонага қатнаш сабабини сўрасам, кулимсираб, ҳазил йўсинида жавоб беради: «Улар сизлардан аллақачон ўзиб кетишган, мен эса сизлардан орқада қолмайин, дейман».

Мен унинг олдида ўзимни эркин тутиб, кўнглимдаги гапни очиқ айтавераман. Мулоҳазаларимни эшитаркан, у юзимга ўйчан тикилиб туради. Бир гал университетдаги қайсиdir эътиборли шахс ҳақида сал кескинроқ фикр билдирганимда, «Гапларингиз умуман тўғри, Асқаржон, лекин хафа бўлманг-у, сизда андак андишасизлик бор», деб подшо ва доно вазир тўғрисида нақл қилувчи машҳур ривоятни айтиб берган эди.

Подшо бир кеча алоқ-чалоқ туш кўриб, эртаси аъёнларидан таъбир сўрабди. Аъёнлари тушни таъбирлаб: «Барча қариндош-уруғларингиз қирилиб, дунёда ёлғиз ўзингиз қоларкансиз», дейишибди. Подшо уларни ўлимга буюрибди. Шунда доно бир вазири бу машъум тушни шарҳлаб: «Шоҳим, сиз ҳамма қариндош-уруғларингиздан узоқроқ умр кўраркансиз», дебди. Хурсанд бўлиб кетган подшо унга бош-оёқ сарпо туҳфа қилган экан.

Буни эшитиб, мен дарҳол тескари мазмундаги бир ривоятни айтиб берган эдим, Убайдуллаев елка қисди а: «Келинг, яна биттадан чекайлик», деди...

У ёзиб бўлди-да, қофозни тўрт буклаб қўлимга тутазди:

— Мана шуни Аҳмадхоновга олиб бориб беринг-чи.
Ташқарига чиққач, бир чеккага ўтиб қофозни очдим.
Бу — Убайдуллаевдек хайриҳоҳ одам томонидан менга ёзилгани норасмий характеристика бўлиб, унда: «Асқар Шодибеков сал қизиқон ҳамда қайсарроқ эканини ҳисобга олмаганда, энг қобилиятли талабаларимиздан. Шуни назарда тутиб, деканат ва шахсан ўз номимдан бу йигитни қайта имтиҳон қилишингизни сўрайман», дэйилган эди.

Аҳмадхоновни кўрганида шунчаки йўл-йўлакай илтпомос йўсин тайинлаб қўйиши мумкин бўлган гапни мени эринмай деканатга бошлаб кириб, қофозга азза-базза ёзиб берганига ажабландим, негадир кулгим келди. «Дарвеш,— дедим ичимда,— ўзимга ўхшаган».

Қофозни қайта бувлаб чўнтағимга солдим. Шу билан унинг умри тугади: на Аҳмадхоновга олиб бориб бердим, на бошқа бирорвга кўрсатдим — худди чаён яши-рингандек чўнтағимга қўл суқишига қўрқардим. Лекин бу менга Убайдуллаевдек кўнгилга яқин бир одамдан таскинбахш эсадалик бўлиб қолди.

... Чўлда ишлайдиган амаким бултур курортга кетаётуб йўл-йўлакай Ташкентга тушган эди. Уни кузатишга чиққанимда самолёт кечикиб, овқатланиш учун амаки жиян иккаламиз ресторанга кирдик. Кутамиз-кутамиз — официантдан дарак йўқ. Бундай қарасак, тўртбурчач устун орқасида бир тўдаси қандайдир йигитни ўртага олиб чуғурлашиб турибди. Ҳаммасининг қўли кўксиса, ниманидир уқтирмоқчи бўлиб унга таъзим-тавозе қилмоқда. Йигит эса уларга қиё ҳам боқмайди, дам-бадам «Йўқ, кетмайди», дегандек секин бош чайқаб қўяди.

Ниҳоят, ишлари пишмади чофи, официантлар бир-бирларига елка қисганча чуғурлаша-чуғурлаша ичкарига — ошхонага йўл олдилар. Ҳаял ўтмай у ердан дўпписини қошигача бостириб кийган бақалоқ киши чиқиб келди. У йигит билан қуюқ сўрашди-да, кифтига қўл ташлаб энгашган кўйи ниманидир маъни-дод қила бошлади. Йигитнинг чеҳрасида ўзгариш кўринмагач, қўлтиғидан олиб ичкарига даъват этди. Йигит жойидан қимиrlа мади. Шунда у, юзида сохта табассум, енгилгина таъзим қилди-да, лапанглаб ошхонага кириб кетди.

Бир пайт каттакон дафтарни кўкрагига босган, ясан-тусан, ёшгина бир жувон кўринди. У ҳар қандай одамни довдиратиб қўядиган бир ишва-назокат билан келиб йигитнинг рўпарасига ўтирди. Йигит унинг қўлидан да-

тарни олди, ёнидан ручка чиқарди. Жувон шоша-пиша қўш-қўш узукли бармоқлари билан унинг қўлини босди ва сеҳрламоқчидек тикилиб бидирлай кетди. Йигит унга совуққина бир назар ташлаб, дафтарга энгашди. Жувоннинг лаби лабига тегмасди. Туйқус башарасидаги ишвадан асар ҳам қолмади — йигит ёзишга тушган эди.

У ёзиб бўлиб, жувонга бояғидек ҳиссиз бир қараб қўйди-да, дафтарни узатди. Жувон дафтарни юлиб олди, гарс-тарс юрганча ичкари кириб яетди. Йигит хотиржамгина ўрнидан қўзғалди. У баробари мен ҳам беихтиёр жойимдан турдим. «Ҳа-ҳа?», деди амаким ҳайрон бўлиб. Нима деб жавоб беришни билмай қайта курсига чўқдим-ча, йигит ресторандан чиқиб кетгунча қараб қолдим.

Унинг орқасидан боргим, қўлини сиқиб қўйгим келар-ин...

Орадан бир ҳафтача ўтиб, Раҳматилла орқали кутилмаганда ғалати хушхабар эшилдим. Унинг айтишича, Аҳмадхонов: «Майли, имтиҳонлар мавсумидан сўнг, ёзда келсин,— деганимиш!— Мен шу ерда бўламан, ўқишга кирувчилардан имтиҳон оламан. Тайинлаб қўйинг, жамики асосий ва қўшимча адабиётлар бўйича тайёрлансин, ҳаммасини конспектлаштириб чиқсин, кўраман».

— Нима дердик, бўпти, раҳмат,— дедим Раҳматиллага.

— Бундан бу ёғига бирор ишкал чиқса, ўзингиздан кўрасиз, жўра,— деди Раҳматилла лоқайдгина.

— Кўрсак кўраверамиз-да.

Мана энди, ёзги таътил бошланиб, курсдошларим ҳар ёққа тарқаб кетган пайтда мен кўр бўлиб кутубхонада ўтирибман. Кутубхонада ўтирибман, атрофимда ўлик сукунат, ташқарида — гуркираган ҳаёт! Сукунат қулогимга сивизға чалади. Ана шу сивизға остида кунузун кун китоб титаман.

Кутубхонада минг турли одам! Айниқса, олдида бир даста китоб, эртадан-кечгача атрофга аланглаб ўтирадиган бир қиз эътиборимни тортид. У хунук, кўримсизги на бўлса-да, фуур-ҳавоси хийла баланд экан. Уни ҳар куни ҳар хил либосда кўраман. Сунъий. ярашмаган қилиқлар қиласди, тасодифан кўзи кўзингизга тушса, ясама истиғно билан чимирилиб қўяди. Унча-мунча артистни йўлда қолдирадиган бу серишва жононнинг чани босган китоблар орасида хор бўлиб ўтириши таажжубли эди. Унга қараб, «Илм чўққиларини кўзлаганлардан эмасмикан?», деб хавотирландим. Бироқ инсоф билан айтганда, у менинг имтиҳонга тайёрланишимга кўмак лашди, десам бўлади. Гап шундаки, мутолаадан толиқ қанимда бош кўтариб унга қарайман, қилиқлари имтиҳон баҳонасида ёд олган шеърларимдан баъзи мисраларни эсимга солади.

Масалан, у кўзларини бир нуқтага тикканча зулфи ни бармоғига ўраётганда:

«Ул пари кўйида мен девонани банд айлангиз,
Банди-бандим зулфи занжириға пайванд айлангиз»,—

деган байтни хотирлайман; бетини панжалари орқасиг яшириб турган пайтда кўзим тушса:

«Юзингни бир кўрай десам, қўлингни пардалар қилдинг»,—
дея пичирлайман; ёнидаги йигит билан шивирлашаверса

«Оҳқим, васлингда юрганларда армон бормикни?»
ёки:,

«Кўнгилдаги гапингни ағёрга айтасан»,—
деб қўяман; ён-веридагилар унга тикила бошласа-ю,
ўзини сипо кўрсатишга уринса:

«Халойиқ ичраким қўзғолди мундоғ фитналар, боис —
Ўзингининг ҳам бир оз лекин кўнгул оролигинг бордур»,—

ки:

«Зебо санамим гул юзидин парда кўтарди,
Оlam ҳама кўз бўлди — тамошо қилайин, деб»,—

атрлари ёдимга тушади; қараб турганимни сезиб, теска-
и ўгирилиб олса:

«На қилдим санга ман, ёrim, жамолингдин жудо қилдинг?»—

еган гап тилимга келади; у менга мутлақо эътибор бер-
аз қўйгач, қайта мутолаага киришарканман:

«Жонимдин ўзга ёри вафодор топмадим,
Кўнглимдин ўзга маҳрами асрор топмадим»,—

ея хаёлан такрорлайман...

Кутубхонаага қатнаш бора-бора мен учун севимли
чиёжга айланди. Адабиёт тарихига шу қадар шўнғиб
етдимки, гоҳида ўзимни ўтмиш шоири шуаро, фозилу
узалолари даврида яшаётгандек ҳис этардим. Улар
чалари тушимга кириб, алаҳлаб чиқаман. Тушларим-

Аҳмадхонов сочини бармоқлари билан тароқлаганча
ни тергов қиласди: «Машраб қайси институтни битир-
н?», «Саккокийнинг илмий унвони бўлганми, йўқми?»,
Юдира қайси журналга муҳаррирлик қилган?», «Жа-
нотин отин Увайсий билан таниш эдими?», «Отойи неча
арта уйланган?»...

Имтиҳонга рухсатнома олиш учун деканатга бориб,
мадхонов мени «Душанба куни тушдан кейин кел-
н», деганини эшийтдим. Тайёрман! Аҳмадхонов-ку Аҳ-
мадхонов, энди мендан бу дарслик, бу китобларнинг
уаллифлари имтиҳон олсинлар! Энди мен учун нега-
р имтиҳондан ўтиш-ўтмасликнинг қизиги ҳам қолма-
н, гўё ўтолмаслигим мумкин эмасга ўхшаб туюлар

Эҳтимол, пайти келиб бу саргузаштларимни ҳикоя қилиб ёзарман. Ўшанда уни ўқиб тахминан шундай деийишлари мумкин: «Хўп, ана, шартакироқ бир йигит бўларкан. Дуч келган одамга, юзингда кўзинг борми, демай мўомала қилавергани учун ҳамма ундан қочар, ҳамма ундан безор экан. Бадфеъллиги туфайли, ҳа, айнан шу туфайли, кўнгил қўйган қизи ҳам ундан юз ўгириб, бош қага тегиб кетибди. (Ажаб қилибди — нима, бу бедаве ни деб шўрлик баҳтиқаро бўлсинми?) Аччиқ устида янга шартакилиги қўзиб, адабиёт тарихи дарсидан қувилибди (баттар бўлсин!) ва, табиийки, оқибатда имтиҳонда ўтолмабди (бу ҳам оз!). Кейин аламига чидолмай тала бемаъниликлар қилибди. Хўп, ана, севгилиси ташлаб кетган бўлса (кимни ташлаб кетмаган?), бир кун бироғ шўрпешона учрар, учрамаса — садқаи сар, дунёдан мес ховдек тоқ ўтар. Хўп, ана, имтиҳондан йиқилган бўлс: (ким йиқилмаган?), бир кун амаллаб топширап, топшиг маса — садқаи сар, ўқишдан итдек ҳайдалиб кетар. Ц ҳам гап бўлдими, шуни ҳам ёзиб ўтириш керак эканм Қизиги шундаки, ҳикояда автор қаҳрамонни бемаъни қилмишлари учун жазолаш ўрнига, аксинча, ёқлади. Ё ҳам камдек, унинг ахлоқиз саргузаштларини эринма бир бошдан, тағин денг, меҳр билан тасвирлайди. Ахи, автор позицияси, асарнинг тарбиявий аҳамияти, дега гаплар бўр...»

Лекин бу масалада мен бошқачароқ фикр юритам Менингча, одамнинг ҳаётдаги ҳар қадами — синов, им ҳон; у доимо имтиҳонлар ичра яшайди. Қолаве! унинг ҳаёти ҳам кўхна дунё олдида бир имтиҳон. Бы барин, севиш, уйланиш, кимга, қандай уйланиш — ҳадаги энг қалтис имтиҳонлардан. Ў булардан қандайди — гап ана шунда. Яъни, аниқроғи, мен бунда қан йўл тутдим, тутаман? Эҳтимол, ёзилажак ҳикоям шуда бўлар, эҳтимол, шу ҳақдагина бўлмас...

Душанба куни тушдан кейин конспект дафтарларни қўлтиқлаб кафедрага кетаётган эдим, иккинчи ғ

даги касса олдида Аҳмадхоновнинг оқ соч бошини кўриб қолдим. Негадир тўхтадим, бир четга ўтиб уни кузага бошладим. У кассадан бир даста пул олди-да, девор гарафга бурилиб санашга киришди. Санаб бўлиб чўнтағига жойлагач, бошини кўтариб, нарироқда ёғоч тўсиққа сўянганча ҳиринглашиб турган атлас кўйлакли икки қизга кўзи тушди. Кўзи тушдию япалоқ бети сув очган ҳамирдек ёйилиб, улар билан қуюқ саломлашди; биритинг билагидан ушлаб, иккинчисининг кифтига қўлинни қўйганча тиржайиб алланимани гапира кетди. Қизлар унинг оғзидан кўз узмай ялтоқланиб туришарди. Негадир ҳозир, шу тобда Аҳмадхоновга кўрингим келди. Боя нечундир баланд руҳда салом бердим. Гўё кассадан боя бир даста пул олган ҳам мен, ҳозир атлас кўйлакли қақажонларга баҳузур гап сотаётган ҳам мен, шу пайт уноҳкор талабаси келиб салом берган ҳам мен эдим.

Зиёхон Аҳмадхонов эмас, мен эдим!

— Э-ҳа, шоввоз! — деди Аҳмадхонов мени кўриб. «Янг ғоятда кайфи чоғ эди. Ахир, боя кассадан бир та пул олган, ҳозир атлас кўйлакли қақажонлардан чирининг момиқ билагидан ушлаб, иккинчисининг оппоқ лкасига қўлинни қўйганча баҳузур гап сотаётган, шу тайт ўжар бир талабаси келиб алланечук баланд руҳда ялом берган мен эмас, у эди-да! — Сиз кафедрага бора-жеринг, мен ҳозир...

Аҳмадхонов мени негадир кафедрага эмас, йўлак охи-даги кимсасиз, бўм-бўш аудиторияга бошлаб кирди. Загим шув этиб, бирдан ғашланди: мен Аҳмадхоновга федрада, тирик гувоҳлар — домлалар иштирокида мойишкорона имтиҳон топширишни мўлжаллаган им.

Аҳмадхонов мен не ҳасратда қон бўлиб тўлдирган іспект дафтарларни эринчиқлик билан кўздан кечи-кан, Қўлон адабий муҳитига доир бир-иккита майдада савол берди. Мен ҳам эринчиқлик билан жавоб гардим.

— Яхши-и,— деди Аҳмадхонов синов дафтарчам ва
деканатдан берилган рухсатномани қўлига оларкан.—
Синов эдими, имтиҳон?

Бу гапни эшитиб йиғлаб юбораёздим.

Аҳмадхонов қофозларга мени икки ой сарсон қилган.
не изтиробларга солган арзанда имзосини қўйди-да, си-
новчан боқиб сўради:

— Убайдуллаев кимингиз бўлади?

— Катта холамнинг куёви,— дедим мутлақо жид-
дий.

— Ҳа-а,— деди Аҳмадхонов муҳим бир гапнинг та-
гига етгандек, бароқ қошларини чимириб.— Тузуккини
билимингиз бор экан, ука, энди унақа қайсаrlикларини
гизни ташланг.

— Менга айтяпсизми? — дедим тағии жиним қўзиб.—
Ташласам... аспирант бўламанми?

Аҳмадхонов менга таажжуб билан тикилди.

— Гапларингиз ғалати-я,— деди жиддий фаҳмла-
бир оздан кейин.— Бу ўзингизга боғлиқ, иним. Ман
бу ёғи Убайдуллаевдек...

— Раҳмат,— дедим қўлимни кўксимга қўйиб.

«Раҳмат» — қандай осон!

«Раҳмат» — қандай қийин!

Аҳмадхонов мени тушундимикан?..

Иккинчи қаватга тушгач, боя Аҳмадхоновнинг атла-
қўйлакли қақажонлари суюниб турған ёгоч тўсиққа ти-
сагимни қўйганча пастга — вестибюлга тикилдим. Вести-
бюлдан турфа кийинган қизлар, йигитлар гуррос-гурро-
утишарди.

Қизлар! Бир лаҳза тўхтанг! Бугун Асқар Шодибек
адабиёт тарихи ва яна талай тарихлардан имтиҳон то-
ширди! У сиз, сизларнинг Матлуба деган дугоналарин
гиз учун, у олчоқларча ташлаб кетгани учун... имтиҳон
дан ўтолмаган эди. Бугун ўтди! Демак, энди севс-
уйланса бўлади. Лекин қайси бирингизга кўнгил қўйиси
қайси бирингизга уйлансин? Унинг далли-девона дилин-

тушунадиган қиз топилармикан? Буни худо билади — у ҳаммангиздан, ҳаммамиздан тепада...

Юрагим ҳеч қандай ўй-туйғусиз, ҳеч қандай мақсад-хоҳишиз, бўй-бўш; ҳеч қаёққа боргим, ҳеч кимни кўргим келмас, гўё мен учун оламда ҳеч нарсанинг маъноси, қизиги қолмаган эди. Бир оғиз, бир оғизгина кечирим сўрашдан бўйин товлаганим оқибатида Аҳмадхоновнинг чакана имтиҳониу арзанда имзоси деб шунча вақт изтироб чекдим, шунча вақт одамдек яшамадим.

Лекин, муҳими — охирига қадар бўйин эгмадим. Де-мак...

МУМКИН ЭҚАН!

Университетдан чиқиб, тўғри уйга келдим. Қариб
брой ёлғиз яшаб, уй жонимга теккан эди — чор-атро-
ни олди теракзор баланд иморатлар қуршаган майдон
тасидаги шийпонга ўхшаш, доирасимон суҳбатхонага
бориб, кафтимга ияқ тираган кўйи ўйга чўмдим. Ўзимиз
шайдиган бино деразаларига боқарканман, у ердаги
идамлар ҳақида ўйлаш мароқли туюлди.

Бу бинода истиқомат қиласидиганларнинг кўпчилиги
илмга алоқадор: бири фан кандидати, бири фан докто-
ри, доцент, профессор — хуллас, мендек унвонисизи йўқ
қисоб. Дарвоқе бор экан: хув анови, деразасига йўл-йўл
шарда тутилган уйда яшовчи қиз, Рахшона. Айтгандек
унинг онаси ҳам чакки эмас — «Катта тарихчи олим,
фан доктори!», дейишади. Шундай бўлса керак: кўзида
кўшқат кўзойнак, атрофга вазмин назар солганча бир
оз энкайиб қадам ташлайди.

Рахшонанинг отаси Тельман aka — археолог; кўпин-
ча экспедицияда бўлиб, икки-уч ойда бир келади. Са-
тардан қайтганида уйлари шовқин-суронга тўлиб кета-
ди: бир ҳафта сурункасига меҳмондорчилик!

У ёш йигитлардек чаққон, серҳаракат, социда битга
ҳам оқи йўқ; белида сербар камар, доим коржомага

ўхшаш ихчам шим ва чарм камзул кийиб юради. Шунинг учунми, хотинидан анча ёш кўриши.

Янгамнинг гапига қараганда, у Рахшонага ўгай: отаси қазилма пайти тупроқ босиб ҳалок бўлгач, онаси эрининг дўсти — мана шу Тельман акага турмушга чиқкан экан.

Мен шу пайтгача ҳали бирор марта Рахшонанинг кўзини кўрган эмасман: қачон қарасанг, шилдироқ қоғозга ўралган, деразадек каттакон бир тахтани қўлтиқлаганча, қаншарида гардиши ялтироқ ҳаворанг кўзойнак, худди тилла топадигандек ер сузиб юради.

Рахшона менга ёқишини ич-ичимдан сезаман. Бироқ уни кўрсам негадир раҳмим келади. Ҳа, раҳмим! Била-ман, у менинг меҳримга, шафқатимга муҳтож эмас. Мутлақо. Лекин... раҳмим келади: алланечук шикаста, ҳимоясиз туюлади. Уни нималардандир огоҳлантириб қўймоқчи, ўзи билмайдиган, балки сезмайдиган нималардандир асрамоқчи бўламан. Ночорлигим — унинг менга дахлсизлигини ўйлаб ўртанаман. Зинапояда у билан изма-из кўтарилганда беихтиёр орқасидан эргашиб кетай дейман. Қўйса, шу йўсин арши аълога қадар ҳам чиқиб бораверишим мумкин. Аммо дарҳол ўзимни тияман. Ахир, у кимсан — фан докторининг қизи! Бунинг устига шундай сулув, шундай барно. Менга ўхшаган унча-мунча кимсаларни назарига илмас — бирон-бир амалдорнинг кечаси ҳам қора кўзойнак тақиб ухлайдиган арзандаси билан юрса керак.

Билмадим, Рахшона мендан ҳазар қиласидими ёки ҳа диксирайдими, узоқдан кўрди дегунча доим кўччанин нариги бетига ўтиб олади, зинада дуч келганимизда ҳа кўрқа-писа четланиб йўл беради.

Улар биздан бир қават юқори — худди тепамиздаг уйда туришади. У ердан кўпинча пианино товуши эши тилади. Қайси куни кечки пайт хунобим чиқиб конспек ёзиб ўтирганимда бу наъма ғашимга тегди-ю, «Э, фан доктори бўлсанг ўзингга, қулоқ-мияни тинч қўясанми,

йўқми!», дея бир боплаб қўйгим келди, тўртинчи қаватга кўтарилиб, эшик ёнидаги тумачани зарда билан қаттиқ-қаттиқ босдим. Эшикни ранги ўнгиганроқ калтагина атлас кўйлак кийган, соchlари паришон Рахшона очди. Ичкаридан баҳор чоғи гулзорни оралаганда бўладиган муаттар бир ҳид уфурарди. Негадир дафъатан оғиз очолмай шошиб қолдим.

— Кечирасиз, пианинони ким чаляпти? — дебман бўғиним бўшашганча.

— Сизга ёқдими? — деди Рахшона. Тилла сувига ботириб олинган шилдироқ қофозни ғижимласангиз қандай товуш чиқади — овози ўшанга ўхшарди. — Киринг, чалиб бераман, — дея у эшикни каттароқ очиб, таклиф қилди.

— Йўқ-йўқ, раҳмат. Мен... — деб баттар саросимага тушдим ва секин бурилиб шалвираганча изимга қайтдим.

Ушандан бери Рахшонани кўрганим йўқ. Кўрсам, унга бир гап айтаман, деб ўйлар, аммо қандай гап эканини ўзим ҳам билмас эдим. Назаримда, у ҳам менга нимадир демоқчи бўлган-у. айттолмагандек туюларди. Мен унга нимадир дейишим керак, у менга нимадир дейиши керак — бошқа иложи йўқ эди гўё!

Худди ҳозир Рахшона осмондан тушадигандек, кафтимга ияқ тираган кўйи ғайри табиий бир телбалик билан унинг йўлига кўз тика бошладим.

Баъзан бирор ҳақида ўйлаб ёки гапириб турганингда, уни жуда кўргинг келганида, сезгандек ўзи олдингдан чиқиб қолади. Шунда «Хизрни йўқласак бўларкан...», деб қўядилар. Буни шунчаки тасодиф ҳам дейиш мумкин ёки савқи табиий, руҳан мулоқотда бўлиш, яъни ғлумий тилда «тепепатия», деб атайдилар. Қисқаси, кутиш, астойдил исташда гап кўп.

Мен ҳозир айни шундай ҳолатда эдим. Худди Рахшона осмондан тушадигандек ғайри табиий бир телбалик билан йўлига кўз тутиб ўтирадим: негадир шу тобда уни жуда-жуда кўргим бор эди.

Не ажабки, бир маҳал... рўпарадаги йўлкадан у чиқиб келди, Рахшона! Қўлида доимий ҳамроҳи — шилдироқ қоғозга ўралган каттакон таҳтаси йўқ, одмироқ киинган, билагида зангори тўрхалта.

Ўрнимдан қандай туриб кетганимни, «Рахшона!», деб чақирганимни билмай қолдим. У атрофга аланглагач, мени кўрдни иккиланибгина тўхтади. Югуриб олдига бордим.

— Ҳаёққа кетяпсиз? — дедим ҳовлиқиб.

— Нонга, — деди у таажжуб билан.

— Нима, нонларинг йўқми уйда?

— Нега, бор, — дея кулимсиради Рахшона ва алла-иҷеҷук ийманган каби давом этди: — Нон-ку бор, тўғриси, ўзим уйда ўтиrolмадим, нима учундир кўчага чиққим келаверди.

— Сизни мен чақирдим, — дедим уни баттар ҳайратга солиб. — Кўргим келди.

— Қандай?.. — Рахшона менга бир зум анқайиб турди-да, қизарганча кўзини ерга олди.

— Анови тахтангиз қани? Доим кўтариб юардингиз...

— Қанақа тахта? Ҳа-а, подрамнигим...

— Унингизда нима бор ўзи? — дея атай сўроққа тутдим.

— Чизмалар. Лойиҳа, уйларнинг лойиҳаси-да.

— Бир ўзингиз шунча уйни кўтариб юрсангиз полвоҳ экансиз, — дедим мақтаб. У жилмайди. Жилмайгандан бурнининг икки ёнидаги чуқурчалар янада ботиб, чеҳрасига маъсумона бир кўрк, жозиба бағишларди. Биз кўча тарафга юра бошлаган эдик. — Мен сизни консерваторияда ўқисангиз, созандами, хонанда бўлсангиз кепрак, деб ўйлардим.

— Архитекторман. Қеласи йил битираман. Пианино чалишимни айтяпсиз-да, шундайми? Музика мактабида ўқиганман. Эшитгандирсиз, архитектура — тошдаги музика, деган гап бор... — Рахшона олдинга ўтганча ўзига

ўзи гапираётгандек шошилмай, бамайлихотир сўзларди. — Мен музика эшитсам ёки пианино чалсам, калламда ҳар хил фикрлар туғилади. Лойиҳалар-да, ўша сиз айтган уйлар, бошқалар... Сиз ҳам музикани яхши кўрасизми?

— Классик музикани, мақомларни! — дедим нимагадир шама қилгандек ўжарлик билан.— Биламан, улар сизга ёқмайди. Сизга...

— Ия, нега? Аксинча, дидимиз бир экан. Радиодаги тунги концерт, а?..

У кутилмаганда мени эски танишидек яқин олиб гапираётганини, ўзини бундай эркин тутиши, очиқлиги, хуллас, мен ўйлаган қизлар тоифасидан эмаслигини кўриб ажиб ҳайратда қолган эдим. Мен уни негадир доим осмонда юрадиган, кечалари тушига фақат эртакдаги шаҳзодалар кириб чиқадиган оқбилак ойимқизлардан бўлса керак, деб тахмин қиласдим. Йўқ, ўзимизга ўхшаган ер одами экан, ўша радиодаги тунги концерти у ҳам эшитаркан, тўрхалта кўтариб нонга бораркан...

Дадилландим. Гўё Рахшонани минг йилдан бери биламан, гўё у менга беҳад синашта — ўзимни ана шундай фавқулодда эркин, енгил сезардим. Ажабо, мен ҳозир қиз бола билан биринчи марта учрашаётгандек, биринчи марта сўзлашаётгандек ҳаяжонда эдим. Бас, шундай экан, муносабатни бошданоқ ойдинлаштириб олиш керак, токи кейин, масала жиддийлашганда оқибативой бўлиб ўтирмасин!

— Сиз ҳам биронта аспирант билан юрасизми? (Майли, ҳақиқатнинг шундай қаттиқ-қуруқ, лекин зин-ҳор-базинҳор очиқ бўлгани яхши.)

— Нега... аспирант?!

— Нима, ўша арзанда аспирант эмасми?

— Қанақа арзанда? — Рахшона, ҳайрат ичра кўз соққалари чиройли бир айланиб, елка қисди.— Нима деяпсиз ўзи?

— Қам кўринасиз? — дея алланечук енгил тортиб гапни бурдим.

— Ўзингиз доим осмонга қараб юрасиз-ку?

— Сиз бўлса ерга тикили-иб, худди оёғингиз остидан тилла чиқиб қоладигандек...

— Ҳа-а, шунинг учун кўришмас эканмиз-да, — деб кулимсиради Рахшона. — Кейин, ростини айтсан, мен сиздан бир оз... нима деса бўлади, қўрқардимми-еъ. Ҳафа бўлманг-у, кўзингиз бошқачароқ, одам қарашдан чўчиди, гўноҳкорга ўхшаб... Ўнақа эмас экансиз-ку?..

Кўча бошига яқинлашиб қолган эдик.

— Рахшона! — дедим шартта тўхтаб. — Менга тегмайсизми?

— Нима-нима? — Рахшона юзимга боққанча ангра-иб қолди. Кейин ёш боладек беғубор жилмайди. — Фалати экансиз-ку...

— Аммо ҳозирдан айтиб қўяй: бўлган-турганим шу! Биттагина костюм-шимим бор, беш-ўнта китобим. Зўр китоблар!

— Э, бунинг нима аҳамияти бор? — деди Рахшона энди жиддий тортиб. — Лекин сиз айтган қарорга келишдан олдин одам бир-бири билан тузукроқ танишарди, бир-бирининг феъл-авторини ўрганарди шекилли? Балки мен...

— Тушундим. Аввал юриш керак: кино, театр, мороженое, дегандек. Кейин — анҳор бўйи, бирор мажнунтол тагида изҳори дил... Шундайми?

— Тахминан шундай, — деб жилмайди Рахшона.

— Ҳаммаси бўлади! Қолаверса, ҳозир мени аллақачон муҳаббат изҳор қилди, деб тушунинг. Кино, театр, мороженое — кейин. Хўш, менга тегасизми?

— Тавба. Фалати экансиз-а...

— Фалатиларни ёмон кўрасизми?

— Иў-ўқ, гапимни тушунмадингиз.

— Энди тушунишга ҳаракат қиласа. Хўп бўлмаса, гап бундай: бугун тарих музейига борамиз. Вақтингиз қалай?

— Музей?! Нега музей, тарих музей?..

— Биласизми, мен икки ойдан бери ўтмишда яшаеман: адабиёт тарихини, умуман, тарихни ўрганиб чиқишига ҳаракат қилдим. Бугун икковимиз бирга бориб, у билан хайрлашиб келсак, девдим. Келажакни ҳам ўйлаш керак-да, ахир, бу ёғи, ёш ўтиб боряпти...

— Гапларингиз шоирона, адабиётчилигингиз кўриниб турибди,— деди Рахшона бошини бир ёнга қийшайтириб. — Тарих музейига экан, бўлти, борганимиз бўлсин. Анчадан бери бормаган эдим. Айниқса, ҳозир зарур, баъзи безакларни кўриб олишим керак эди. Диплом ишим учун. Фақат бирор соатлардан кейин учрашсак, майлими? Ойимларга овқат қилиб қўймоқчи эдим...

Биз автобус бекатида кўришишга аҳдлашиб хайрлашдик. Рахшона нон дўконига қараб кетди.

Қизиқ, у нон учун чиқиб, мен билан учрашди — мен билан учрашгач, нонга кетди. Уйларида эса нон бор...

Рахшона бекатга мендан олдин бориб, кутиб турган экан. Узоқдан танидим. Вужудимни ёруғ бир ҳис чулғаб, энтикиб кетдим. Қарасам, ёнида аллақандай зиёли-башара кимса, сўзлашиб туришибди. Зиёли тилла гардишли қимматбаҳо кўзойнак тақиб олган, бошида ихчамгина, чиройли шляпа, қўлтифида семиз папка.

Рахшона мени унга таништириди.

— О-о, қарийб ҳамкасб эканмиз — деди зиёли менга қўл чўзиб. — Мана, сиз келгунча Рахшонахонни зериктирмай турибмиз.

У шу қадар ярашиқли кийинган, шу қадар хушбичим, силлиқ эдики, беихтиёр унинг қаршисида ўзимни жуда ожиз, аянчли сездим. Бу оқизлик зум ўтмай алам-задалигу нафратга ҳам айланиб улгурди.

— Мени танисангиз керак — Бадал Кароматмай.

Шеърларим, қўшиқларим радио-телевизордан бериб турилади.

— Эшитганман, — дедим хотиржам гапиришга тиришиб. — Сиз билан танишмоқчи эдим ўзи. — «Энди сен илиб кетмоқчимисан, кандидат-шоир?!»

— О-о, яна бир мухлис! — деди у тилла тишларини кўз-кўз этмоқчидек Рахшонага қараб тиржаяркан.

— Секинроқ, — дедим қўлларим ҳаракатга тушиб. — Менинг бир танишим бор. Сизга ўхшаб у ҳам шоирлик қиласди. Лекин шеърлари жуда bemаза, бачканада...

— Энди-и, дўстим, ижод — муракаб жараён. Биласизми...

— Биламан! Аммо ўша танишим ёзган телба-тескари сатрларнинг адабиётга, ижод тушунчасига нима алоқаси борлигига ақлим етмайди. Бу муқаддас сўзни баъзи бировлар хор қиляпти-да. Ижод қилган деб Абдулла Қодирий, Ойбек,Faфур Ғулом, Абдулла Қаҳҳорларни айтса бўлади. Билишимча, сиз фан кандидатисиз, шундайми? Ўша танишим ҳам кандидат. Докторлигини тайёрлаб, мўмайгина маошни олиб юраверса бўлмасмикан, дейман ўзимча. Қизиқ, гўё у шеър ёзмаса адабиёт гариблашиб қоладигандай! Бу оддий адабиёт ихлосмандининг фикри албатта. Адабиёт мухлиси сифатида мен уни халқ душмани, дегим келади...

— Нима-нима?! — У титраганча кўзойнагини қўлга олди.

Пайровни бой бердим — гап эгасини топган эди. Ошкора ҳужумга ўтишдан ўзга илож қолмади:

— Йўқ, мен бундай демоқчиман: сиз эртага элликка кирасиз, бирор газета ёки журналга редактор бўласиз. Ҳам шоир, ҳам олим, деб кўтарадилар-да. Ушанда шеърият торлик қилиб, прозага, катта жанрларга қўл урасиз. Қаллангизга келган гапни ёзиб чиқараверасиз — журналми, газета қўлингизда, нашриётлар билан алоқангиз зўр. Шўрлик китобхонлар эса ёзганларингизни ўқиб, «Адабиёт деганлари шу бўлса керак, босилиб чи-

қибди-ку», деб юришаверади. Бора-бора уларнинг диди сизга мослашади. «Адабиётга хизмат қилиш» баҳонасида китобхон савиясини орқага тортаётганингизни хаёлингизга ҳам келтирмайсиз. Хўш, бундай одамни, сизнингча, ким деб аташ керак?

— Кечирасиз-у, ука, кайфингиз борга ўхшайди,— деди у ниҳоят бўғилиб.

— Байрамларда оз-моз ичаман.

— Бугун байрам қилган экансиз-да?

— Байрам қилсан арзиди,— дедим Рахшонага назар ташлаб. У менга қизиқиш билан тикилганча беозор кулимсираб турарди. — Афсуски...

— Афсуски, мен байрамингизни бузиб қўйдим, шундайми?

— Начора,— дедим,— сизларнинг касбингиз шу. Сиалар байрамларни ҳаром қилиш учун туғилгансизлар аслида. — Бу гапни айтишга айтдим-у, унинг қиз бола олдида ҳозир мени яксон қиласдиган бир гапга чоғланиб оғиз жуфтлаётганини кўрдим ва шоша-пиша Рахшонагинг тирсагидан олдим.— Омон бўлсинлар!

Биз анча жойгача индамай бордик. Ўзимни гуноҳкор сезиб, Рахшонанинг юзига қарай олмасдим; кутилмаган бу ноҳушликдан ичимни хижолат, ҳадик кемираради. Дарвоҷе, бекатни ташлаб қаёқقا кетяпмиз? Нега у гапирмайди? Тушунарли, ҳаммаси тамом! Умид — норасида, мурғаклигига ёқ бўғизланди.

— Жим бўлиб қолдингиз? — деди Рахшона тўсатдан қувноқ оҳангда. — Ёки мендан ҳам аразладингизми? Мен шеър ёзмайман-ку?

— Яна бузиб қўйдим, Рахшона!

— Нимани? Нимани буздингиз?

— Эҳ! Биламан, сизга ҳам ёқмай қолдим. Қанча уринмай, бари бир... Ухласангу эртаси бошқача одам бўлиб турсанг...

— Қанақа одам?

— Бошқача-да, силлиқро-оқ... Мадҳиддиндек. Унча-

лик эмас, албатта. Шундай бир курсдошим бор. Доим жим юради, мўмин-қобил. Қўрингандан кечирим сўрайди. Қўлини кўксига қўяверганидан жостюмининг ёқаси ялтираб кетган...

— Сиз-чи, сиз нима қилдим, деб ўйлаяпсиз?

— Мен... кўрдингиз-ку. У бечора менга ҳеч бир ёмон гап айтмаган эди...

— Менингча, тўғри қилдингиз, шундай қилиш керак эди. У ойимларнинг институтида ишлайди, уйимизга келиб туради. Ойим уни «дилетант» дейдилар. Э, қўйиниг ўшани, унутинг!

«Тўғри қилдингиз, шундай қилиш керак эди». Бу — мен ҳали ҳеч кимдан эшифтмаган, лекин эшитиш орзусида юрган калима эди!

— Тўхтанг!

Рахшона тўхтайди, чўчиб бошини кўтаради. Нигоҳида ҳайрат. Юзини астагина кафтларим орасига оламан.

«Топдим! — дейман ичимда ҳайқириб. — Топдим!..»

«Топди-инг! — дея садо беради икки ёндаги баланд иморатларнинг пештоқлари, осмон, ёришган кўнгилдек оппоқ булатлар... — Топди-инг!..»

Рахшонанинг юзни кафтларим орасига оламан. Кафтларим орасига олиб, кўзларига боқаман. Кўзларига чўмиб, дунёдаги бор нарсани, дунёнинг ўзини ҳам унутаман — юрагимда янги, порлоқ бир дунё пайдо бўлади...

— Ҳей уйқучи, туринг, биз келдик!

Ташқарида — айвончада ётибман. Чарақлаб турган қуёш нигоҳимни қамаштиради. Базўр кўз очиб, қорайиб кетган янгамини танийман. Орқасидан акам кўринади. У деярли ўзгармаган — ўзи азалдан қора.

Оёгимни чойшабга ўраб каравотдан пастга тушираман. Акам келиб ёнимга ўтиради.

- Хўш, ука, ишлар қалай? Имтиҳонни топширдингми?
- Биринчи саволи — шу.
- Топширдим.
- Баракалла. Яна нима гаплар?
- Яна... Уйланмоқчиман, ака!
- О-о, янгилик? Зўр-ку! Уйлан. Қизиқ, келин ким экан?
- Рахшона.
- Қайси Рахшона?
- Тепадаги. Опанинг қизи. Пианино чаладиган..
- Ҳмм... Нима деймиз, яхши қиз, одобли қиз, онаси ҳам тузук аёл. Тағин ўйлаб кўриш керак. Қани, янганг билан кенгашайлик-чи. Бундай масалаларда унинг диди ўткир. Ҳўв Зубай, бу ёққа кел, зўр гап! Дарвоҷе, бунчалик тез? Илгари ҳеч гап йўқ эди шекилли? Кўнгил, де? Ишни зимдан пишириб юрган экансан-да, ҳа, шайтон! Майли, мени кўнди, деб ҳисоблайвер. Лекин, уйланиш — жиддий масала, ука. Бу ишда енгилтаклик кетмайди. Қейин у ёқда бобой-момой турибди. Уларнинг ҳам розилигини олиш керак, фарз. Қолаверса, уқа, ҳаётда муҳими уйланиш эмас. Муҳими — энди бошқачаро-оқ, жиддийро-оқ, босиқро-оқ бўлишинг. Анов одатларингни ташлаб, а?..

«Тўғри — дейман ичимда акамнинг гапига қўшилиб. — Уйланиш — жиддий масала. Бу ишда енгилтаклик кетмайди».

Ҳаммаси тўғри, ҳаммаси маъқул, аммо Убайдуллаева га айтиб берган ўша севимли ривоятим-чи?..

Қадимда ўтган бир подшо ҳар кеча бир хил туш кўрар экан. Ҳар кеча тушида қуёш юзини қора парда тўсиб, оламни зулумот босар экан. Бир гал шундай туш кўриб алаҳлай-алаҳлай уйғониб кетса, ғойибдан: «Эй осий банди! Кунинг битди — эртага қуёш тутилади, салтана-тинг ер билан яксон бўлади. Нажот йўлини ёлғиз Озодбош отлиғ жулдурвоқи дарвеш билади», деган ваҳий келибди. Дарҳақиқат, эртаси қуёш тутилиб, дунёни қо-

ронфилик ютибди. Ваҳимага тушган ҳалойиқ тому тошга чиқиб, қўлга илингани нарсанни тарақлатганча худога илтижо қила бошлабди. Подшо чора истаб вазиру вузаро, фозилу фузалоларини йигибди. Улар: «Шаҳаншоҳим, барчаси бекор, ана, қаранг, қуёш чарақлаб турибди!», дея жон сақлашибди. Шундан кейин подшо кимки «Қуёш тунилди», деса, бошини тапидаш жудо қилишга фармони берибди. Буни эшитган ҳалойиқ тому тошдан тушиб: «Қуёш чарақлаб турибди, қуёш чарақлаб турибди!», дея қўл қовуштира бошлабди. Аммо бари бир қуёш юз кўрсатмабди, мамлакатни зулмат қоплаб тураверибди. Подшо не қиласга боши қотганида ҳузурига жулдур кийимили бир дарвеш келиб, ўзини Озодбош деб таништирибди ва: «Эй шоҳ, сенинг фуқарога ўтказган зулмингдан ғазаблангани, уялгани учун қуёш юзига парда тортди. Токи салтанатингда зулм ҳукм сурар экан, токи мамлакатдан макру риё, хушомаду ёлғон аrimас экан, қуёшни кўрмайсан, тоабад игнанинг учидек нурга зор ўтасан. Тезроқ кўзингни оч, йўқса салтанатнинг яксон бўлади», дебди. Подшо дарвешга ҳаёт ваъда қилиб, сўзидан қайтишни сўрабди. Бироқ дарвеш: «Ёлғон билан жон сақлаб юргандан — рост айтиб, ҳур ўлган яхши», деб жавоб қайтарибди. Газабланган подшо уни қатлга буюрибди. Эртаси ҳузурига Қаъбадан қайтаётган етти зиератчи келиб, саҳрова бошдан-оёқ оппоқ кафан ёпинган бир одам «Қуёшнинг юзи қора! Қуёшнинг юзи қора!», дея ҳайқирганча машриққа қараб кетаётганини айтибди. Буни эшитган подшо: «Эвоҳ, бари бир салтанатни дарвеш айтган иллатлардан халос этолмасман. Бас, гўристондек саройда кўршапалак бўлгандан ҳур дарвешу девона бўлиб бош олиб жўнаганим афзал», дея тожу тахтини тарк этиб, жулдур либосда саҳрога чиқиб кетган экан...

Ҳаммаси тўғри, ҳаммаси маъқул, аммо ана шу ривоят...

Хуллас, энди уйланаверсам бўлар: адабиёт тарихи

имтиҳонидан ўтдим; шу имтиҳон сабаб анча-мунча ач-чиқ-чучук тарихни ҳам бошдан кечирдим; энг асосийси— мени тушунадиган, кўнглимдаги одамни топганга ўхшайман... Уйлангач, анов одатларимни ташлаб, акам айтгандек, бошқачаро-оқ, жиддийро-оқ, босиқро-оқ бўламан. Лекин, биламан, булар ҳали ҳолва, ҳали йўлимда имтиҳонлар кўп, жуда кўп. Биламанки, «Искандарнинг шохи» қабилида бирор ишқал қилиб, келажакда ҳали неча-неча қатла оловли чоҳдан — кимдир яқин боришга ҳам ҳадиксираган, кимдир очиқдан-очиқ чекинган, кимдир мутлақо йўламаган чоҳдан сакрашимга тўғри келар ва, табиийки (олдиндан айтиш қийин), кўп марталаб қулаб, ўт ичидა қоларман. Биламан, буни эшитиб, дўсту душманим — ҳар бири ўз фикрини айтади.

Ўшанда ким нима дейди?

Тоғам онамга: «Салом берди-ик, опажон! Мен ни- ма деган эдим?...»

Онам: «Шўримга туғилган экан-да бу бола, бошим- и қайси тошга урай?»

Акам: «Ука, ука-а! Неча марта айтдим...»

Бўстон, Жавлибай ва Марат: «Аҳмоқ эди, аҳмоқлиги- на қолибди. Баттар бўлсин!»

Мадҳиддин: «Эй, яшашни билмаган галварс!»

Акбарова: «Ужас! Тез Матлуга етказиш керак!»

Матлуба: «Эсингдами, Нази (Вазир, Манзур), ўзи сағал анақароқ бола эди, яхшиям ўшанда тегмагани- им...»

Аҳмадхонов: «Ҳа-а, шундай бир бола бор эди. Худо рган саркаш, шаккок эди. Мана, оқибати...»

Убайдуллаев: «Ажабланадиган жойи йўқ, ўзи олов эди — ўт ўт билан ўйнашади-да. Бунақалар керак, оҳ, кўп керак! Лекин, ҳар қалай, улоққа кирган чавандоз бошини ҳам ўйлагани маъқул — улоқ мингта, бош эса битта!»

Рахшона — ёнимда бўлади!

Биламан, тахминан шундай дейишади. Начора! Би-

ров ўша машъум чоҳни осонгина айланиб ўтар (Бўстон, Марат), бирор югуриб-елиб бошқа йўллар ахтарар (Жавлибой), бирор унга мутлақо йўламасликни афзал кўрар (Мадҳиддин) — мен эса сакрайман, кимларнинг дир ҳадиксирагани, чекингани, мудаббирлик қилганига қасдма-қасд сакрайман — эҳтимол ўшаларнинг ўрнига, ўшаларнинг ўзи учун! Ахир кимдир... Уша «кимдир» мен бўлсан не тонг?! Ҳар кимнинг ўз йўли, ўз аъмоли. Қоловерса, «Бунақалар керак, оҳ, кўп керак!», дегувчи Убайдуллаев ҳақмасмикан?

Бироқ валинеъматим айтиши мумкин бўлган бошқа бир гап мени қийнайди: «Улоққа кирган чавандоз бошини ҳам ўйлагани маъқул — улоқ мингта, бош эса битта!»

Битта, бит-тагина!

...Дарвоқе, Машрабнинг оти нега Машраб?

1977

ҲИКОЯЛАР

ОСТОНА

«Камбағал» бобом, эрка болалигим ва тарғил мушук таърифида бир ҳикоя

„Пишт, кўзлари совуқ ўт сочадиган тарғил мушук! Уйқудан кўз очиб, остоңага яқин, айвон кунжида турган иккита қовунни кўрдиму томоғим қоқ бўлиб кетди — кечаги «савил» ичимдан ўт пуркарди. Бош томонимда, яроқ пўстакда чопон қавиб ўтирган онамга қарадим: «Бобомми?»

— Бобонг,— деди онам.— Сени кўргани келган экан. Уйғотгани қўймади. «Ҳали шу ерда экан-ку, келарман яна. Қаримнинг озроқ ҳашари бор эди, ўзим бошида турмасам, девор қолиб лойни юзига чаплайди», деб кетди инқи́ллай-синқи́ллай. Шўрлик отам! Сенларнинг устингдз ўлиб бўлади, оёғини аранг судраб бир замин жойдан невара кўргани келади. Сенлар бўлсанг...

Бизлар бўлсак, бошимиз осмонга етган, туғилган қишилогимизни йилда бир мартағина қўмсағ қоламиз. Келибоқ базму зиёфатларга шўнгиймиз, эртаси ижирғаниш билан эсланадиган, айвон кунжидаги, ўша — бобомиз қўйиб кетган қовунни кўрганда ютоқтирувчи ул-фатбозликлардан бўшамаймиз. Бобомиз, саксондан ошган, «оёғини аранг судраб босадиган» бобомиз узоқда ҷаҳайди-да, жуда узоқда — бориш қийин. Иннайкейин,

унинг шоколади йўқ — мушуги бор, биз ёмон кўрадиган, қўрқадиган мушуги...

— «Мусоғирчиликдаги неварагинам», деб беш вақт намоз устида дуои жонингни қилганимиз қилган — келгандা «Шамдай липиллаб қолган бир бобом бор эди», деб йўқлаб боришин билмайсан. Уйимизда шакалатимиз йўқ-да, биз камбағал-да? «Ҳаммасини Шакалат бибим ўзи билан олиб кетган», деб ўйлайсан-да? Ҳай, ишқилиб мусоғир юртларда соғ-омон, бошинг тошдан бўлиб юргин, улим. Бизнинг қўлимидан келадигани шу — дуо. Дарду доғларингни кўрмай кетсам кифоя. Ҳозир ҳам мушукдан қўрқасанми, а? Энди мушук йўқ, «Эрка неварамнинг ғашига теккан бехосият маҳлуқ», деб аллақачон уйдан қувганман..

Боя онам мени уйғотганида бобом ана шундай деган бўларди. Йўқ, аввал раҳровдан «Ҳў-ӯ, камбағал бир бо-бо келди, ким бо-ор?», деб овоз берган, «Эби, отажон!», дея пешвуз чиқсан онам желаги этагига солиб орқалаб келган қовунларни олгач, мен билан қучоқлашиб, намланган мижжаларини енгига артаркан, шундай деган бўларди. Албатта. Доим. Онам мени уйғотмабди — бобомнинг кўзи қиймабди..

Бибим, мен яхши кўрган, мени яхши кўрган, «Ўлмаса катта одам бўлади шу неварам», деб орзу қилган, шоқолад беравериб «Шакалат бибин»га айланган, болалигимнинг ёруғ хотироти — бибимнинг вафотидан бу ёғига бобом остонасини кўрганим йўқ. Бибим ўн беш йилча муқаддам тўсатдан қазо қилган эди. Унинг ўлимидан кейин бир неча муддат бобомнинг уйида турдик — «Энамнинг тупроғи совимай кетмайман», деди онам. Бир оқшом бобом янги маҳсисини кийиб қайгадир отланганда, у: «Ана, бобонг қўаллиқ ўйин»га жўнади», деб қўйди. Бу гап ҳазил эканми, рост эканми, уч-тўрт ой ўтиб, бобомнинг уйида манқаланиб гапирадиган бир кампир пайдо бўлди. «Энди мен сенга биби бўламан, ўлайжон», деди у бир борганимда. «Бибим эмассиз, манқасиз!», деганич.

қўлидан юлқиниб қочиб кетдим. Бошда бир-икки вақт бобомни қарғаб юрган онам кейин-кейин: «Нима қилсан шўрлик, қариганда иссиқ-совуғига ким қарайди? Ҳоланг ё мен кунда-кунда бориб туролмасак. Бунинг устига сағирлари ҳали гўдак. Қариликнинг эрмаги буям», деб кўниди.

Манқа кампир билан баробар бу хонадонда кўзлари совуқ ўт сочадиган тарғил бир мушук ҳам пайдо бўлди. Мушук, жирканч панжалари билан бобом хонадонидаги серзавқ, беғубор кунларимга чанг солган тарғил мушук! Ҳозир ҳам сендан жирканаман, ҳазар қиласман... Ўтирганда ҳам, турганда ҳам эгаси уни қўлидан қўймасди. Ёвуз, ювуқсиз мўйловларини ҳафсала билан қайчилаб ўтиришини айтмайсизми! «Бибинг мушугининг кўзига сурма ҳам сурармиш», дерди онам кулиб. Бобомнига борсам, кўрпачага чиқмасдим — мушук ётган, оч қолсам қолардимки, овқатга қарамасдим — идиш-товоққа ўшанинг нафаси теккан. Мени кўрди дегунча Карим (тоғам) уни кўтариб чопарди. Ёнма-ён ўтирганимизда ҳам бехосдан «Миё-ёў!», деб юборарди. Чўчиб қочсам, бобом орқамдан «Борди-борди, қоч!», дея ҳаҳолаб кулар, бу кулги менга хунук, масхараомуздек туюлар эди. Бобомдан кўнглим совиди; Каримни ҳам ёқтирумай қолдим — кўрсам, мушук эсимга тушарди. Булардан қутулишнинг бирдан-бир йўли бобомнига бормаслик эди — бормай қўйдим. Кейинчалик бунга тарғил мушук баҳона бошқа сабаблар ҳам қўшилди — бормадим. Ўн беш йилча бўлди — бормайман.

Мушук, кўзлари совуқ ўт сочадиган тарғил мушук!..

Шу йил саратон бошларида бир якшанба куни эшигимнинг қўнғироғи журъатсизгина жиринглади. Бориб очдим: бўйга тортиб ўсган новча-новча икки йигит; гуноҳ қилиб қўйиб энди қочмоқчидек жонсарак бўлиб туришибди. Бири кўзимга иссиқроқ кўринди, лекин таниёлмадим. Кўнглимда унutilган қадрдон бир нима ғимирлади. Шошиб қолдим. «Остонада кўришмайлик», дедим. Ичка-

ри киришди. Кўзимга иссиқроқ кўрингани отимни айтиб қуюқ сўрашди. Чопқиллаб чиққан қизчамнинг қўлига битта беш сўмлик тутқазганида ўнғайсизланганимни кўриб: «Расми шу, бўла. Кўрмана. Шаҳарда юравериб эсингидан чиқибди-да. Поезддан тушиб тўппа-тўғри келишимиз. Магазинлар абет экан, қўлимиз қуруқ — хафа бўлмайсиз», дея илжайди. Хотиним билан ерга қараганча, бир боламиэни ўнта қилиб, «бола-чақалар», деб сўрашишди.

«Бўла?! Бўлам?..» (Бизнинг юртларда амакивачча, холаваччаю узоқроқ қариндошларнинг болаларини ҳам шундай — «бўла», дейишади.) Бўламнинг отини айвончага чиқиб стол атрофига ўтирганимиздан кейингина, шериги: «Тошкент иссиқ экан-а, Чори?», деганда билдим. Лекин қай жиҳатдан, қанақа бўлам эканини билолмай бошим қотди, сир бой бермай мен ҳам «бўла»лаб турдим. Йўқ, ҳайтовур, ўзи эслатди: «Ҳў-ўв, Шўрсойнинг бўйида Наби акам билан ёнгоқ ўйнағанл рингиз эсингиздами, бўла? Бир сафар ютқазганингизда йиғлаб сўккан эдингиз...» «Оббо, бу бўла дегани хийла бетакаллуф чиқиб қолди-ку? — дедим ичимда. — Бўла бўлгандан кейин нима қилсан? Ёнгоқ ўйинда ютқазиб йиғлаганимгача ёдида экан, чиндан ҳам бўлам шекилли».

Наби... Фира-шира эсладим: бурни бир қарич кела-диган, суяги бузуқроқ бола. Лекин қайси жамоатдан қариндошлигимиизни эслашим қийин бўлди — ахир, қа-чонги гап бу!

Кейин бўлам қариндошларга хос бетакаллуф оҳангда менга насиҳат қилишга тушди: «Энди-и бундай қилиб юрманг, бўла, ҳар замон-ҳар замонда қишлоқقا бориб туриш керак: туғилган жойингиз, эл-хеш, қавм-қариндош дегандай... Қўчиб бориш ниятингиз-ку йўқдир? Лекин борсангиз бўларди. Бу ердагидай катта иш бўлмасаям, ҳай, ана бундайроғи топиларди ахир. Олий маълумотли-сиз. Мана, биздай ўқимаганлар ҳам бир кунимизни кўриб юрибмиз ўша ёқда. Яқинда «Жигули» олдик. Наби

оз-моз ёрдам қилди, кейин бир-иккита қўй-пўй бор эди...»

Келишдан муддаолари кетар чоғларида маълум бўлди: «Сизни тўйга айтиб келдик.— дейишиди. — Каримбойнинг тўйига, тоғангизнинг. Бобонгиз келин тушириптилар. «Албатта келсин», деб тайинлаб юбордилар». Таъсирланиб, димоғимни бир нима ачиштиргандек бўлди. Демак, Каримбой уйланяпти, ўша мушукбоз тоғам! Бу менга негадир кулгили туюлди. «Боришга ҳаракат қиласман,— дедим.— Атай шунга келган бўлсаларинг, бугун ҳеч қаёққа кетиш йўқ — қоласизлар!» Улар аввал: «Ҳа, шунга,— дейишиди-ю, кейин бўлам шеригига ишора қилиб важ айтди: — Бу ёқнинг бошқа иши ҳам бор эдида, зарур иш». Хуллас, кўнишмади. Йчкари хонага кириб, хотинимга: «Анов, Москвадан олиб келган зўр рўмолчаларимни чиқар», дедим. «Рўмолчангиз бор-ку ёнингизда, нима қиласиз?» деб сўради хотиним. «Тўйга айтимчилар кепти, калла!», дедим уни баттар ажаблантириб. «Айтимчилар» рўмолчани кўриб иймангандек бўлишди-ю, сўнгра таомилга кўра юзларига сурта-сурта чўнтакларига солиб қўйиши.

Уларни кузатгач, негадир қишлоққа кетгим келди.

Ўша кунлар бир кеча бобом, ойда-йилда бир эсимга тушадиган бобом тушимга кирди. Эрталаб туриб тушимнинг сабабини ўйларканман, дафъатан бош чанглаб қолдим: «айтимчилар» тайинлаган кун кеча экан — тўй кеча ўтган! Ажабо... Бу гапни хотинимга айтган эдим, «Ҳа-а, рўмолча берганингизми?», деб эслади...

Бобом, «мусоғир невараси»ни унутмай, тўйга айтиб шундай узоқ манзилга одам юборган «камбағал» бобогинам!..

— Эна! Туриңг, бобомнинг уйига борамиз! — дедим.

— Бобонгникига?! Эби, ростданми?

— Ҳа, ҳашарга, Каримбойнинг ҳашарига.

— Эби, чўп синдирай бўлмаса... — дея қўлидаги иғанни чопонга санчиб, ишонар-ишонмай жойидан қўзғали онам.

Бобомнинг чорбоги қишлоқнинг нариги четида — Шўрсойга яқин, соҳилларида ёнғоғу чиллак ўйнаб болалигим ўтган Шўрсойга яқин. Балхи тутлар, серсоя гужумлар ўсган кенг ҳовли, этаги — жийдаю шафтолизор, боғ-богот... Қаримнинг машинасига мўлжалланган баҳайбат тёмир дарвозадан ичкари кирдик. Бобом кампирни билан яшайдиган ўша эски уйни ҳисобга олмагандан, ҳовли бутунлай ўзгариб кетибди — таниш қийин. Бизни биринчи бўлиб ҳовли тўрида савлат тўкиб турғон тунука томли қасрдек иморат зинасидан тушиб келаётган бошдан-оёқ қизил либосдаги келинчак кўрди. Кўрдию бирлаҳза анграйди, сўнг эски уй тарафга бош буриб:

— Бобо-о, дарвозага қаранг! — дея пешонабоги учи билан юзини беркитганча уйга қочиб кирди. Янгам, Қаримнинг хотини. Дарвоқе, менга янга бўладими, келин? Қарим мендан ёш-ку? Лекин — тоға!

Ҳовли бир зумда қий-чув бўлиб кетди. Бошида шабпўш, эгнида Қаримнинг ўнгиб кетган гимнастёркаси — бобом, кетидан кампирни чиқиб келди. Янги иморат биқинида енгию почалари шимарилган, оёғи лой Қарим кўринди. Қампир мени бағрига босганча манқаланиб хотиним ва қизчамнинг соглигини суриштирди, «Уларни ола келмабсиз-да», деб ўпкалаган бўлди. Бобомнинг ихчам жуссасини кўтариб айлантиарканман, елкам оша у Қаримга қараб бақиради:

— Мушукни йўқот, мушукни! Шакалатни олиб чиқ! Келинга айт, яхши-яхшисидан бўлсин!

— Неварангиз кепти, ота, чўп синдирайлик! — дея Қарим тоғаларча меҳр билан қовурғаларимни қисирлатиб қучоқлашди.

— Чўп ҳам гап эканми, хода синдираман, хода! — дерди бобом оғзидан тупук сачратиб.

Гужум тагидаги супага жой қилинди. Давра-дастурхон. Таомилга бориб боя биздан «қочган» келин югуриб-елган — хизматда. Супага яқин келиб менга қимтинибгина салом берди, онамнинг маслаҳати билан олган

кўрманамни қўлига тутқаздим. Қампир эринмай мендан «келинни билан невараси»ни суриштиради. «Олиб келмабсиз-да бир, айланай», деб койинади. Ёнимда ўтирган бобом эса ҳар замонда:

— Сочни қара, сочни! — деб суйиб энсамни силаб қўяди. — Оббо улим-эй, ўламан деб ётган бобомни бир кўриб кетай, дебсан-да? Энди ўлмайман, сенки йўқлаб кепсан — ўлмайман, ўлмайдиган бўлдим.

— Ҳашарингиз қани, бобо, ҳашарга келдим?

— Оббо, шер улим-эй, сени ҳашарга соларканманми? Ё бир ғайратингни кўрсатасанми? Карим, тур, бунинг қўлига кетмон бер, лойга тушсин.

— Э-эй, ҳашар борми! — деди Карим кулимсираганча қўл силтаб. — Пешинга қолмай тарқаб кетди. Ўзи тўрт чанглалой эди. Бир ошхона солмоқчи эдик-да, шунгага...

У ўрнидан туриб боғ томон юрди ва зум ўтмай бир қўйни етаклаб қайтди. Супага яқинлашиб сўради:

— Ота, бошлайверайми?

— Йўқ, йўқ,— дея жойидан қўзғалди бобом.— Ўзим. Неварам ўз қўлим билан сўйган қўйнинг гўшидан еб кетсин. А, лаббай?

Мен хижолатомуз бош қимирлатиб қўйдим. Ота-бола қўйни этакроқقا судраб кетишли. Карим кўмаклашиб турди, бобом ажиб бир чаққонлик билан қўйни бирпасда калла-поча қилди.

— Бобонгиз ҳали милтиқчадай, а?— деди Карим менга кўз қисиб.

— Э, гўримизни айтасанми, улим, кўз ҳеч балога ўтмай қолган,— деб нолиган бўлди бобом.

Қовурдоқ олдидан Каримнинг қистови билан алоҳида чойнакдаги «мўъжиза»дан бир-бир пиёла ичиб ўтирган эдик, ул-булга уннаб юрган бобом:

— Улим, чойингдан бир пиёла бер, томоқ қақраб кетди,— дея супага яқинлашди.

— Бу чой сизга тўғри келмайди-да, ота,— деди Ка-

рим қиқирлаб. Кейин ўзини оқлагандек қўшиб қўйди: —
Мана, жиянбой кепти, шунинг хурсандчилигига жиндак-
жиндак... Майлими, хафа бўлиш йўқми?

— Ҳа энди, расми шу бўлгандан кейин... Фақат биз-
га кўрсатмасдан! — дея бобом ёлғон пўписа қилиб нари
кетди.

— Ёқтирмайдилар,— деди Карим бобомнинг орқаси-
дан.— «Беш калларга ўхшамай кет», дейдилар.

— Ҳа-а, беш каллар...— деб қўйдим мен ҳам эслаган-
дек.

Қовурдоқ баҳона ҳамма дастурхонга йиғилганда Ка-
рим бир вақт шўхлик қилиб «Миёв!», деб юборди.

— Пишт-э, неварамни қўрқитма!— деди кулиб бо-
бом. Кампир ҳам нимадир деб пингиллади. Кулишдик.
Шу асно гап менинг болалигимга кўчди: шоколадни ях-
ши кўрганиму мушукдан қўрққанларим...

Чойдан сўнг оёқнинг чигилини ёзиш учун Карим ик-
ковимиз боғ айландик. Кейин кўчага чиқиб, ариқ бўйи-
да чекишганча уни-буни хотирлаб гурунглашган бўл-
дик. Рўпарадаги тор кўча муюлишида, саріқ «Жигули»
атрофида ғимирлаб юрган телпакли кимса кўзимга та-
нишдек кўринди.

— Карим, анови ким эди?

— Аҳмад кал-да, — деди у қиқирлаб. — Беш каллар-
нинг каттаси. Машина ўзиники, яқинда олди.

Эсимда, бу кўчани «Беш каллар кўчаси», дейишар-
ди — беш ака-ука яшарди: Аҳмад кал, Раҳмат кал, Са-
мад кал, Нормат кал, Ёрмат кал. Ҳар кечқурун навбати
билан биттаси ичиб келиб жанжал қўзғарди, оталари-
нинг ҳовлисини бошга кўтариб беш ака-ука ўзаро ёқа-
лашиб ётарди. Биз, болалар дараҳтга чиқиб «кино», кў-
рардик; унга ном ҳам қўйган эдик —«Бешкалфильм
маҳсулоти».

— Ҳозир ҳам ўша киноми? — дедим кулиб.

— Йўқ, ҳозир... — Карим бирдан жиддий тортди. —
Самади кетдию тинчиб қолишиди.

— Қаёққа кетди? —

— Ҳеч ким билмайди, хат-хабари йўқ. Э, кўп йил бўлди. Бир жанжалдан кейин остонасидан бош олиб чиққан, шу бўйи бедом-дарак. Ӯшандан бери оталари тўшакда, касал. Айниқса ҳозир аҳволи оғир эмиш. Ҳар кеча кетди-кетди бўлади. «Самадни кутиб жон узолмаяпти», дейишади, қайдам...

— Нега жанжаллашишарди ўзи, мерос дардими?

— Йўғ-э, шундай, ёшлиқдан, ичкилиқдан,— деди Қарим ўйчанлик билан.— Ёмон-да, отанг бу аҳволда йўлингга илҳақ ётса-ю, сен бандасига биликсиз бир гўрларда улоқиб юрсанг. Ёмон-да.

— Ўйга кирайлик, — дедим бетоқат бўлиб.

Супада бобом кўринмасди.

— Фармон чўлоқнинг олдига чиқдилар шекилли,— деди кампир норози оҳангда.— Боф дарча тарафдан. Ӯшасиз томоқларидан овқат ўтмайди. Бир майдон кўрмасалар... Эскидан жўра-да.

Қарим мол-ҳолга қараш учун оғилхонага кетганда мен беихтиёр боғ дарча томон йўл олдим.

Боғ дарча... Боғ кўча, боғлар ичра шўнғиган кўча! Ана, ўша беҳилар, ўша жийдалар. Менинг беҳиларим, менинг жийдаларим! Менинг гуноҳларим учун боғ кўчага бош эгиб туришибди. Анови, ичи ковак тут тагида бир дарвоза бор эди, Жума жувозкашнинг дарвозаси. (Ҳозир ҳам бормикан?) Ундан бир қизалоқ чиқарди, юзи ола-була, соchlари патила-патила қизалоқ. «Хатчана,— дерди бибим раҳматли,— шу қизингни менинг неварамга берасан-да, мана шу қулунтойимга». «Майли, ой опа, сизнинг неварангизга бермай кимга бераман?», деб жавоб қиласди Ҳадича хола. «Йўқ, йўқ, олмайман қизингизни!», деб қочиб кетардим мен. Ӯша, юзи ола-була, соchlари патила қизалоқ кейин бир қиз бўлди, ойдек, сочи товонига тушадиган бир қиз бўлди... Лекин энди сиз йўқ эдингиз, бибижон. Сиз кетгач, одамлар ваъдасини унутди. Дунёнинг томошаси шу экан-да, би-

бижон. Бир қадам жилган одам бошқаларни, бошқалар эса уни унутар экан...

Бу маскан, бу манзаралардан бир хилу бир алвон бўлган тарз кўнглим бузилиб боғ дарча остонасида ўти-рарканман, кўзлари совуқ ўт сочадиган тарғил мушук кўриниб қолишидан ҳадиксирав, ич-ичимдан худога илтижо қиласар эким: «Энди уни менга йўлатма!»

Ен тарафдан шарпа эшитилиб, сесканиб кетдим. Ғира-шира қоронғида белига кўндаланг қўйиб олган ҳассасидан қўлларини икки ёнга осилтирган кўйи энкайланча оғир одимлаб келаётган бобомни кўрдим.

— Бобо?

— Ҳа, улим, сенмидинг? Танимабман, эгангни егур кўз ўтмай қолган. Бу ерда нима қилиб ўтирибсан?

— Ўзингиз қаердан келяпсиз, бобо?

— Мозордан.

— Мозордан?!

— Ҳа. Бибингнинг олдидан, улим. Хушхабар олиб борган эким. Бугун неваранг, арзанда неваранг келди, дедим. Сен кетгандан бери остоナмизга қадам босмас эди, бугун келди, дедим... Арвоҳи қулоғим остида чирқиллагани чирқиллаган эди...

Димоғим ачишиб кетди, бурнимнинг икки ёнидан илиқ бир нима пастга ўрмалай бошлади.

— Тур, улим, бу ерда ўтирма — остоңада ўтиришнинг хосияти йўқ.

Бобом кўриб қолишидан қўрқандек шоша-пиша кўзимни артдим. Шу тобда бобомнинг кўзи ҳеч нарсани илғамас — менинг боғ кўчам, менга кўп йиллардан бери бегона, аммо олис шаҳарларда ҳам хаёлимдан кетмаган, ёди ҳамиша энтикирған, азиз гўшалар узра сурмарап этакларини силкита-силкита тун чўкмоқда эди... Шоша-пиша кўзимни артдим.

Пишт, кўзлари совуқ ўт сочадиган тарғил мушук!..

ҚҰК ЭШИҚ

Танишимизнинг ижара уйига айланма зинадан чиқилар экан... Ойнабанд равонча, кейин деворларига расм солинган серқашам хона. Үнгурда сакраб юрган ҳуркак оҳу болалари тасвири Ҳамидга айниқса маъқул тушди: қишлоғимизни, уни қуршаган тоғларни эслатган бўлса керак.

Дарвоқе, гап девордаги безакдами? У ҳолда биз яшайдиган хона деворларини тоғ унгуррида ўйнаб юрган оҳулар эмас, серёмғир келган бултурги баҳорнинг томдан сизиб ўтган чакка доғлари «безаган». Ягона деразаси тирқишлирида чилла шамоли бемалол дайдигап, илитувсиз бу уйда Ҳамид иккимиз галма-гал тумовлаб турамиз. Мана, гап нимада!

Борган жойимиз дардимизни янгилади. Мезбон тинмай дам шароити: электр, газ, сувини айтиб ғуурланса, дам уй эгасининг одамохунлигини мақтарди. Биз унинг омадига — хўжайин, электр, газ, сувига таҳсин ўқиб, Ҳамиднинг таъбирича, «саройимиз»га қайтарканмиз, ўйга толдик.

Бошқа жой топиш керак!

* * *

Дарвозадан кирганда томига қора қоғоз ёпйлган кўримсизгина икки уй, бир даҳлизга кўз тушади. Зах босган, қоронги даҳлиздан чапдаги хонада кампир, ўнгдагисида биз турамиз. (Начора, айб ўзимизда — ётоқхона шовқини малол келди.) Шифти Ҳамиднинг пакана бўйига мослангандек пастак бу хона икки киши учун чина-камига «сарой»: буклама каравотларимиз ва устига китоб қалангандек синиқ столни ҳисобламаса, унда ҳеч вақо йўқ.

Торгина бу ҳовлида кампир ёлғиз, фақирона кун ке-чиради. Қўшнисига тушган қизи оиласи билан андармон, қўли теккан маҳалдагина кириб туради. Биздан ташқа-ри, ҳовли тўрида, тут тагидаги бостирмасимон ҳужрада истиқомат қиласидан Бўрибой аканинг деразага қарай-қарай негадир хавотирланиб гапиришича, кампирнинг қизидан кейиниги ягона ўғли дайди чиққан, опасига қарашибай, хабар ҳам олмай қўйган; ҳарбийдан қайтгач, бир бева аёлга уйланиб аллақаерда яшармиш.

— Баъзан ичib келиб қолади. Ана кейин кўрасиз то-мощани, — дейди Бўрибой aka пичирлаб.

* * *

Тушдан кейин ўқийман. Кечқурун совуқда жунжикиб қайтаман. Ҳамид ё кампирнинг уйни зўрға иллитувчи чўян печи олдида гап сотиб ўтирган, ёхуд Бўрибой ака-никида халқаро аҳволдан масала талашаётган бўлади. Каравотга чўзилиб оёғимни кўрпага ўрайман-да, китоб ўқишига тутинаман. Сўнг совуқдан ҳушим келмай китобни қўйиб, кампирнинг хонасига бош суқаман.

-- Вой болам-эй, кўкариб кетибсан-а! Кир-кир... Қачон келдинг? Ман хавотир олиб ўтирибманки, бу изги-ринда болафақир қай аҳволда келаркан, деб. Үлгур со-сувқ ҳам... Майли, ҳадемай иссиқ кунлар кепқолар. Бўри-бой айтиаётувди. Газетада ёзганмиш. Ўқишингларни

битириб, ҳали бир одам бўласанларки, ҳаммаси унтилиб кетади. Сани, Ҳамид боламни уйларига бориб бир даврон суриним бор. Умидим катта санлардан, ҳа-ҳа!..

Чиндан ҳам кампирнинг бизга ишонч-ихлоси зўр, келажагимииздан кўп нарса кутади. У айниқса Ҳамид билан соз. Унинг шўх-шўх ҳазилларидан бошини орқага ташлаганча мириқиб-мириқиб кулади.

— Ойи, шу-у, бўйга етган қизингиз бўлмагани чатоқда, — дейди Ҳамид менга кўз қисиб.

— Ўзим ҳам шунга ачинаман. Бўлганида сандан бошқага бермасдим-а, аттанг! — деб астойдил куюнади кампир. — Ҳай, парво қилма, болам, сани ўзим уйлантираман, кўрасан. Кўз остига олиб юрганим бор. Қўшилардан. Бир нозанинки, сочи тақимига тушади.

— Ўшани тезроқ олиб бермассангиз, сочини қирқтириб қўяди, ойи. Ҳозир шунаقا.

— Шўх бўлмай кет-а, болам...

Бўрибой аканинг ҳужрасига ўтаман. Ўттизларни қоралаган бу одам қўшни кампирнинг ўғли; акаси билан муроса қилолмай уйидан аразлаб, шу ерда сўққабош яшайди. У биринчи кун бизни совуққина қаршилаб:

— Мусофири экансизлар, — деди негадир паришон бир қиёфада. — Майли энди. Лекин кампирни ранжитиш йўқ — шарт шу. Ўғли туфайли кўнгли ярим ўзи. Аммо-лекин тилла кампир-да. Мана, ўзимиз ҳам...

Узоқ кириш сўзидан кейин у «Вокруг света» журналини ўқиш-ўқимаслигимизни сўради. Ҳамидинг мужмалроқ жавобини эшитгач:

— Ўқиб туриш керак, — деди. — Аммо-лекин шу журналда гап кўп. Мана, ўзимиз ҳам...

Унинг каталакдек ҳужраси газета-журналга тўла. Зах тахмоннинг тепасигача сонма-сон «Вокруг света» тахланган. Баъзан тонгга қадар ҳужрада чироқ милтиллаб туради: Бўрибой aka ўнинчи лампа ёруғида бошини қашлаб, қўлида қизил қалам, газета титади. Юрганда ҳам унинг қўлидан газета тушмайди, қўлтиғида албатта

журнал бўлади. Ўзи қурилишда оддий ишчи-ю, ҳамиша оқ кўйлак, бўйинбог, шляпада юриши, муомаласи зиёли кишиларни эслатади.

У гоҳо ичib келиб, ҳовлини бошига кўтартгудек ўкириб йиғлади; акасининг сирларини билишини, бир кун мас-бир кун уни фош қилажатини айтади, бўралаб сўкади. Қейин ишком тагидаги чорпояга ўтирганча ҳасратга тушади.

— Мен бахтимни йўқотганман, укалар, — дейди бизга. — Мусоғирсизлар. Аммо-лекин мусоғирчилик ёмон нарса. Мана, ўзим ҳам... Бахтимни тортиб олди. Номардлар! Мен ҳали уларга кўрсатиб қўяман! Ҳа! Илмий ишларим қолиб кетди...

Уни кампир онасидан ўзга ҳеч ким тинчтолмайди ҳам, овутолмайди ҳам.

— Ҳи, Бўривой, тағин нима бўлди санга? — дея дарвозадан мункиллаб киради кампир.

Бўрибой aka гоҳ онасининг бўйнига ўш боладек осилиб олади, гоҳ уни ердан даст кўтаради.

— Ойижон, ойижонимсиз! — дейди у қайта ҳиқиллашга тушиб. — Илмий ишларим битсин ҳали, мен сизни бошларимга кўтараман, ҳа, худди осмонга! Номардлар-р! Тортиб олди-я, ойижон...

Эшлишишимизча, бу девонатабиат одамни толе қисган, суйгани куйдириб кетган экан. «Илмий иш» дегани эса бир пайтлардаги орзуси бўлса керак. У мудом нимадандир хуноб, нимадандир шикаста. Нимаданлигини биз ҳам билмаймиз, ўзи ҳам.

Газетага ишқибозлигим учунми, Бўрибой aka менга бошқача қарайди. У мени эҳтиром билан қарши оларкан, Ҳамид ўриидан туради.

— Ҳа, мулла? — дейди Ҳамидга. — Ўтиринг энди. Мана, бу ёқ келдилар, бояги масалани ҳал қиласиз.

— Раҳмат, — деб ҳафсаласиз жилмаяди Ҳамид. — Илмий ишни тугатиш керак. Эртага кенгашда муҳока-маси...

У чиқиб кетгач, Бўрибой ақа махфий сирни очаётган-дек, деразага қараб пичирлайди:

— Шеригингиз тупой экан-ку? Даниянинг қироли-часи кимлигини билмайди-я! Олий мактабда ўқий туриб... Ҳа-а, бу, Камбоджа масаласини эшитдингизми?

Косада овқат кўтарган онаси кирадио сиёsat че~~д~~з қолади.

Келсам, «тупой» илмий иши — семинарга тайёргарлик кўриб, аллақачон тўшакка кирибди.

— Сени, тупой экан, деди. — Кулгим қистайди.

— Ким? Мусофирми? (Ҳамид Бўрибой ақага ўндан деб лақаб қўйган.) — У қизиқсинганча ёстиққа ёнбошлиб олади.— Ҳи! Ўзиям мендан қолишмайди. Илмий иш эмиш! Ўйланиш тараддуудида юрибди. Топғанмиш биттағини. Квартира беришибди. Яқинда кўчмоқчи бу ердан — мана, сенга илмий иш! Қарасам, аллақайдаги саволлар билан бошимни қотиряпти, «Бор-э», дедим. Э, буям ўзимизга ўхшаган бир афанди-да. Шўрлик мусофири!

Кампирнинг «Ўй совуқлик қилаётган бўлса, мани ёнимга, бу ёққа ўта қолинглар, ҳарна иссиқроқ», деган гапини Ҳамидга айтаман.

— Қўйсанг-чи, — дейди у кўрпани юзига тортиб. — Ҳеч бири ўзимизнинг мана шу саройга teng келмайди муздеккина, маза!

— Тезроқ бошқасини толмасак...

— Бу кеча тушимизга кириб чиқсин, эртага топамиз.

* * *

Ҳамидинг туши ўнгидан келди: у эртаси куни дарсдан хушхабар билан қайтди. Курсдошлари орқали суриштириб, университетнинг ёғинасидан уй топиби. Кечқурун кўргани бордик. Уй биз кутгандан зиёда, ўша таницимизниқидац ўтса-ўтардики, қолишмасди. Эртага кўчиб келадиган бўлиб бекаси билан аҳдлашдик. У неғадир сал жонсарак, аммо жуда мулойим аёл экан.

— Майли, келаверинглар, — деди. — Кечқурун адасининг ўзлари гаплашадилар. Феъллари бир оз анақароқ, «Хўп», деяверасизлар.

Галдаги мушкулот кўчиш, яъни бу гапни кампирга айтиш эди. Нима дейиш, ким айтиши хусусида Ҳамид билан хийла бош қотирдик.

— Ётоқхонада яшамоқчимиз, десак-чи?

— Қаллангга балли!

Узоқ тортишув, иккиланишлардан сўнг, «Кампир сени яҳши кўради, у-бу», деб гаплашишга унинг ўзини кўндиридим.

Ҳамиднинг орқасидан кампир уйга йиглаб кирди.

— Санларни ўз болам дегандим, ўрганиб қолувдим,— дея ҳиқилларди у. — Бир ҳовлида ёлғиз ўзим... Бўривой ҳам яқинда уйланиб кетиб қолармиш. Мана, бу ёғи баҳор эди. Биламан, совуқда хийла қийналдинглар, шўрлик болаларим. Аҳволларингни кўриб ич-этимни ейман. Иложим етганда-ку... Ёнимга ўта қолинглар, дедим... Е бирор нимадан хафа бўлдингларми, а, болаларим? Тунов кунги...

Тунов куни, кампир қизиникида эди, ўғли келди. Кўринишдан беозорга ўхшаган бу одам анча нағма кўрсатди: у фирт масти, оёғида туролмас эди.

— Ким қўйди санларни бу ерга? Кимсанлар ўзи? Бу мани уйим, ҳа! Ҳеч кимнинг ҳақи йўқ, ҳа!— деб бақирди у бизга. Кейин ерга боққанча чайқалиб сўкинишга ўтди... — Ойим қани? Ойимни топиб берларинг! Тез бўл, ҳозир!

Ҳамид кампирни чақириб чиқди. Ўғли тағин дағдага тушди.

— Бас қил, жинни, қўшнилар эшитади,— дея кампир уни судраб уйга олиб кирди.

— Ман-н қўшниларингизни... — Унинг ҳуш-бекаш бақириғи эштиларди. — Булар ким? Ким қўйди буларни? Сизга пул керакми, а, айтинг, пул керакми? Мана, мана!..

— Пулинг ўзингга буюрсин,— деди кампир титроқ,

товушда. — Нима десанг де, лекин ман бу болаларни ёнимдан жилдирмайман, улар ўзимники...

Амаллаб ўғлини жўнатгач, кампир йиглаб ҳасрат қилди, узр сўраган бўлди.

У ҳозир ўша гапни эсларди. Кўнглимиз бузилиб кетди. Бироқ энди қолиш ҳам ўнғайсиз эди.

— Хабар олиб турамиз, ойи,— деда юпата бошлади Ҳамид.

Кампир баттар тўлиқди. Сўнгра ётоқхона шароитини обдон суриштирди, кўнгли тўлди шекилли:

— Майли, болаларим, нимаям дердим, — деди паст, дардчил овозда. — Ниятларим кўп эди...

Ниҳоят, кампирнинг дуосини олиб, биринчи бор кўраётгандек қадрдан ҳовлига сўнгги марта ғамғин назар ташлаганча, кўнгилда бир орзиқиши... кўк дарвозадан чиқиб кетдик.

Янги жойга ўрнашиб, кечқурун бека айтган кишининг келишини кутдик. Келди. Танитишича, аллақаерда буфетда ишларкан, бурнининг учи ҳам худди винога тиқиб олингандек эди.

Беканинг «қулоқ қоқди»сига кўра, «бир оз анақароқ» бу одамнинг гапларига «Хўп», деяверишимиз керак эди. Вазифамизга киришдик.

— Етоқ ёқмабди-да, хилват қидириб қолибсизлар? — деб бошлади у сўзини.

— Хў-ўп, — деди Ҳамид. Хўжайин унга бир ўқрайиб қўйди.

— Пулини хотиндан эшитгандирсизлар? Айтиб қўяй, ҳар ойнинг бошида тўлашингларга тўғри келади. Қалай?

— Хўп.

— Соат тўққиздан кейин дарвоза берк бўлади. Буни-ям ҳисобга олларинг, хўпми?

— Хў-ўп...

— Ичиш-пичишга қалайсизлар?

Ҳамидга қийин бўлди: Мастурани, олис қишлоқдаги

Мастурасини эслаб гоҳида жиндак-жиндак отиш одати бор.

— Рубобинглар ҳам бор экан. Буниям вақти-вақти билан, а?

Менга-ку бари бир, семинарга тайёрланиш ўрнига Ҳамид баъзан эрмакка тинфирилатиб ўтиради.

— Хўпми, во-от... Тағин ҳар қанақа ошна-оғайнини бошлаб келиш ҳам йўқ. Кейин сиз, ука, мўйловниям, а?.. Тўғри келмайди, маҳаллачилик.

Шу ерга етганда Ҳамид тамом бўлди, лекин сир бермади.

— Хўпми, во-от, чироқ масаласи... соат ўн иккигача.

Бу гап иккимизга бирдек таъсир қилди: қишлоқни, мактаб даврини эслайдиган гурунгларимиз қисқаради ёнди.

Кейин газ, сув, кран масалалари муҳокамасига кўчдик. Биз ўз вазифамизни оғишмай адo этардик. Ҳамид «хўп, яхши, бўлти», деб ўтирас, дам-бадам чап кўзини қисганча кўрсаткич бармоғи билан бурнининг ёнини қашиб қўяр эди: энсаси қотгани, «қўявер», дегани.

Ниҳоят, хўжайн шартларини тамомлаб, «Шундоқ бўлсин», дея ўрнидан турди. У кетгач, Ҳамид иккаламиз бир-биrimизга тикилганча хийла фурсат хона ўртасида қаққайиб қолдик. Сўнгра ўтириб кампирни эслашдик.

Шу кеча алла-паллага қадар уйқумиз келмади.

* * *

Эртаси куни дарсдан кейин уй қидиришга тушдик. Бир хиллар уйига ўзи сифмаётганидан шикоят қиласди; бир хилларини шум ижарагирлар доғда қолдириб кетишганмиш; баъзиларининг эса бўйга етган қизлари бор экан...

— Бўйга етган бўлса, бервормайсанми бизга ўхшаган битта-яримтага! — дерди Ҳамид ҳазил аралаш хуноби ошиб.

Ижарага қўймасликларига кўпинча Ҳамид, унинг муштдай-ю, лекин маҳмадоналиги ва аллакимларнига ўхшаш ингичка мўйлови сабаб бўларди. Уй эгалари мешга ишонч билдиришар, сўнгра Ҳамидга ўғирилиб... хавфсираб бош чайқашар, афсус айтиб, узрларини илова қилишар эди.

Охири... эски уйимизга яқинроқ жойдаги нақшиндор дарвозадан хизматчига ўхшаш бир аёл чиқди. Ҳафсаламиз совиб турган бўлса-да, Ҳамид саломни қуюқ қилиб, бидиллашга тушиб кетди.

Албатта, бу ширинсухан хола ижарага қўймайди: уй ўзига танглик қиласди, бўйга етган қизи ҳам бор, бунинг устига ижарагирлардан куйган денг... Аммо, айтишича, бизга разм солиб қараса, анча бамаъни болаларга ўхшарканмиз, раҳми келиби.

— Муюлишдан шундоқ ўтсанглар... — дея у ўзимиз кўз юмиб ҳам топа оладиган йўлни тушунтира бошлиди, — «Зуҳра кампирнинг уйи», десанглар, кўрсатишади. Кўк эшик. Ўзиям бир кампиржон-да лекин. Бир-иккита бола турган экан. Кечами, олдинги кунми, ётоқхонага, кўчиб кетишибди. Қампир шўрлик йиғлаб ўтирганмиш ўшаларнинг орқасидан. «Ҳалима опа айтди», десанглар, йўқ демас...

Аёлга раҳмат айтиб, йўлга тушарканмиз:

— Нима қилдик, хўжайн? — деди Ҳамид.

— Қайтиб боришдан ўзга чора йўқ шекилли?

— Инсоф билан ўйлаб қаралса,— дея хўрсинди Ҳамид, — ўзимиздан ўтган, жўра. Уйнинг у ёқ-бу ёғини тузатиб, печка-мечка қўйсак...

Кўк дарвоза олдига келиб таққа тўхтадик. Унга қўя чўзишга на Ҳамидда, на менда журъят бор эди. Ниҳоят, одатдагидек узоқ тортишув, иккиланишлардан сўнг Ҳамидни ичкарига киритиб юбордим.

Бир оздан кейин ҳовлидан йиги эшитилди. Дарвоза тирқишидан мўраладим. Қампир Ҳамиднинг бўйнига осилганча ўтиради... оstonада...

ФАИЗИНИНГ АМАКИСИ

— Уррэ-э! Амаким армиядан келяпти! — деди Файзи ирғишилаб. — Амаким армияда-ан!

Амакиси армияга кетмасдан олдин район марказидаги «тир»да ишларди. Қишлоққа ойда бир келар, кўчамизда кўринди дегунча, унинг ташрифига муштоқ бўлиб тургандек, қўшни хотин-халаж дарвозалар тирқиши ю деворлар кемтигидан мўралашга тушар — гузарда иккичу уч кунлик миш-мишга мўмай мавзу топилар эди.

— Сочи худди елкасига тушган-а, ёпира-ай! Жамалак тақ энди, дедим!

— Чолворини айтмайсизми — балоғи тўрвадай, ер супуради. Тағин денг, почасига занжир тикирган!

— Белидаги камарни кўрмабсиз-да, уста, отнинг айили дейсиз.

— Кўрдим, кўрдим. Чолворининг киссалариям бир ажабтовур.

— Кўйлаги-чи, Норгул қушночнинг мушкулкушодда киядиган либосидан нусҳами-ей?

— Юришини айтинг, мискар, юришини! Босайми-бос-

майми, деб одим ташлайдилар, кўкрак бир газ олдинда, кўз осмонда денг, қарашлар ҳам артистларниридай, бир қизиқ!

— Раҳматли отаси бундай эмас эди, а, махсум?

— Замонаси-да, уста, замонаси. Акасиям бинойи, даштда мол кетидан юрган мўмингина одам.

— Шинель кўрмаган-да, амаки, шинель! Армияга борсин, кўзи мошдай очилиб, мулла минган уловдай ювош тортиб қайтади.

— Э, билмадим-да, жиян, бунақага армия тугул бошқасиям кор қилмас!

— Мана, кўрасиз...

Файзининг амакиси қишлоққа ҳар келганида Самад мискарнинг ҳалқасимон қабзаларига гул зарб берилган қўш тавақали дарвозаси ёнидаги серсоя тол тагида тахминан ана шундай гап-сўз бўларди.

— Амаким ўқишга жўнаяпти! — деб юрди Файзи ғуурланиб.

Амакиси армияга кетмасдан аввал устма-уст икки йил ўқишга отланди. Ўқишга у шундай тайёргарлик кўради: учраган кишига қайси институтга кирмоқчилиги, ким бўлиб етишажагиу битиргандан кейин нима қилмоқчи эканингача гапиради. Кетар куни оғайниларини йиғиб сарҳовуз бўйидаги супада зиёфатнамо ўтириш қилиб берар, ўқишга киролса, битириб шаҳарда қолиш ниятида эканини айтар, биронта актрисага уйланиши мумкинлигини ҳам сохта камтарлик билан қўшиб қўяр, меҳмондорчилик сўнгиди эса улардан бу йўлда гўё оқ фотиҳа олар эди. Ошналари ҳазил-мутойиба аралаш: «Лекин эҳтиёт бўл, шаҳарлик қизлар шайтонроқ келармиш, гангитиб қўйишмасин тағин», дея аския қилишар, шўҳроқ бири: «Машина олишни унутма, шаҳарда жуда асқотармиш», деб ўйт берар — ашулачи ўртоғи бутун ўти-

риш давомида «Мен севаман, сен севасанму?»ни такрорла бу турар эди.

Куз бошларида — ўқишга жойлашганлар бир-бир келиб, нимага қодирликларинкүрсатгандек, қишлоқ кўчасидан намойишкорона ўтиб кетишарди. Файзининг амакисидан эса дарағ бўлмас, шунда гапдонроқ қўшилар: «У каттароқ ўқишга кирмоқчи экан-да, кечроқ келармиш», дея ўзларича каромат қилишар эди.

— Амаким ўқишга киролмабди, — деб қоларди Файзи куюниб.

— «Жўрақулбойнинг иниси Тўрақулбой каттароқ ўқишга киравмиш», деб эшишиб эдик. Қайси куни чўлда кўриб қолдим... чўлдаги «ўқиш»да шекилли?

— Тошкентда эмас эканми? Кари-фари оламга сифас эди-ку унинг, нима бўпти?

— Йиқилибди-да.

— У ёқ-бу ёғи синмабдими ишқилиб?

— Ҳар қалай, бир оз лат еган бўлса кераг-ов...

Куз охирларида — ўқишидан йиқилган, лекин ҳеч ни ма кўрмагандек бепарво Тўрақулбой келиб қолар, ҳамма гап ўшанда аён бўлар эди. Ўзининг айтишича, имтиҳонлардан неча баҳолар биландир ўтибди-ю, конкурсдан қайтибди. «Келаси йил албатта келгин, оламиз», дейишганмиш.

Келгуси йил ўқишга бориш Тўрақулбойга насиб этмаган экан: ёз яқинлашмай ҳарбийдан қофоз келиб қолди.

— Амаким армияга кетяпти! — деди Файзи фахраниб.

Тўрақулбой эртаси хизматга жўнайдиган кеча сарҳовуз бўйидаги супада ширингина базм бўлди. «Айбор» бошини эгиб жим ўтирди, хизматда бўлган оғайнилари

ўз хотираларини эслашиб, унга турли йўл-йўриқлар бериши.

Эртаси чошгоҳда ҳовлидан чиқаркан, Тўрақулбой сафар халтасини супа четига қўйиб, бир лаҳзача маъюэ турди. Сўнг похол ғарамланган сомонхона оша осмонга туташ тоғларга боқиб: «Хайр, тоғлар!», деди ва негадир бизнинг уйимиз тарафга қараб: «Хайр, қишлоқ!», деди, бурилиб девор бошида турган Мамат қассобни кўриб: «Хайр, қассоб бобо!», деди.

Ушанда, бу манзарадан таъсирланиб, «Хайрлашиши бошқача, қайтиб келмайдиганга ўхшайди», деб ўйлаган эдим...

— Амаким! Ана, амаким!..

«Тўрақулбой армиядан келаётганмиш!», деган хабар яшин тезлигида гузарга тарқалди. Овул-ҳамсоя, қўни-қўшни дарвоза тирқишию девор кемтигига ёпирилди: «Қанақа бўлиб қайтибди экан?»

Осмондан тушгандек, кўчамизда у фавқулодда пайдо бўлди. Бошида фуражкаси қирра, бир четидан жингалак соchlари қайнаб чиққан; ўнг қўлида сиртига ишвакор жонон тасвири солинган ихчамгина чамадон, чап қўлида шинель, қаншарида қора кўзойнак.

Файзи елиб бориб амакисининг бўйнига осилди. Кетидан мен ҳам югурдим. У иккаламизни баробар кўтариб бағрига босаркан: «Орлы мои, выросли», деди. Устбошидан хушбўй атири ҳиди келди.

Кейин Файзи чамадонни, мен шинелни кўтариб дарвоза томон юрдик. Ҳовлига кирилгач, Тўрақулбой супа олдида тўхтади, похол ғарамланган сомонхона оша осмонга туташ тоғларга бир нимани хотирламоқчилик узоқ тикилиб қолди. Хизматга жўнаган кунини эслаб, ҳозир «Салом, тоғлар!», деса керак, деб ўйлаган эдим, йўқ индамади. Уйимиз тарафга эса қарамади, девор бошида Мамат қассоб ҳам кўринмасди.

- Бошларида шапка. Қирра денг яна. Бирор келяпти, тус генерал, дейсиз!
- Ойнак тақиб олганми кўзига?
- Ҳа энди, ака, армия осон дейсизми, бирор нима бўлгандир-да.
- Бе-е, армияга борган бир шуми? Боргандарнинг бари бир йигит бўлиб келяптики... Ана, Аҳад қоранинг ўғли...
- Мошинадан тушаётиб, уст-боши чанг экан чоги, «Ах, гираз!», деганимиш.
- Бўлмаган ган! Ҳе, кейин ўзимиз ҳам мешдай шиширамиз-да!
- Нимани гапирайлик йўғасам, биродар? Яхшини яхши дейсиз, ёмонни ёмон-да...
- Тол тагида бундан икки йил бурун узилиб қолган миш-миш Тўрақулбой келиши билан ана шундай қ ўланди.
- Кетдик даштга! — деди Файзи кафтларини бир-бира гига ишқаб. — Суюнчига!

Оқшом ости Файзи иккаламиз эшак миниб, хушхабарни етказиш учун даштга жўнадик. Файзининг отаси — негадир ёзин-қишин телпагу чопонда юрадиган Жўрақул амаки «Кинога кирасизлар», деб бйзга бир сўмдан «суюнчи» берди. Сўнгра семиз бир қўйни отига ўнгариб орқамиздан ўзи етиб келди.

Қўни-қўшни йигилди. Илгари саломига алик ҳам олмайдиганлар Тўрақулбой билан қучоқ ёзиб кўришиди, хизмат қандай ўтганини суриштиришиди. Тўрақулбой жилмайганча «Ничево, ничево», деб жавоб қиларди.

Қўй сўйилди, тандир кабоб осилди — Тўрақулбой келгани шарафига зиёфат бошланди.

Унинг ўзи айвондаги ёстигу якандозларга ёнбошлаб олиб бетўхтов тамаки тутатарди. Ўтирганлар эшондан калом кутган муридлардек ундан кўз узишмас, ҳар за-

мон-ҳар замонда иримигагина бир нималарни сўраб қўйишар, Тўрақулбой ҳам иримгагина истар-истамас жавоб қайтарар эди. Афтидан, бу анъанавий зиёфат унга кўп ҳам хуш келмаётган эди. Бир маҳал у ўз-ўзидан алланечук руҳланиб, тирсагини ёстиқдан узди-да, армиядан гап бошлаб бир саргузаштини ҳикоя-қила кетди.

Айтишича, хизматда генералнинг машинасини ҳайдаган экан. Қизи ошиқ бўлиб қолибди. Одатда тамшаниб эсланадиган кўп ширин дамларни Тўрақулбой ўша билан ұтказибди. Эҳ, энди қай бирини гапирсан! Ұзиям қизмисан қиз экан-да. Начора, хизмат тугаб, хайрлашадиган пайт етибди. Қиз ундан кўнгил узолмай зор-зор йиғлармиш, денг. Отаси — генерал ҳам Тўрақулбойни ўз ўғли дек яхши кўраркан. «Қол, Толик,— дебди илтимос қилиб,— лейтенантлик унвонини бераман, қизимга уйланасан». «Йўқ,— дебди Тўрақулбой рад этиб.— Кетишшим керак!» Эҳ, энди у дамларнинг қай бирини гапирсан!..

— Йўқ, дедим, — дейди Тўрақулбой мағрур чимирилиб. — Қетаман, кетишшим керак, дедим.

Даврадагилар унинг ҳикоясини «буни қаранг-а!», дегандек ҳайратланиб тинглашарди.

Майда-чуйда юмушларга уннаб юрган Файзининг отаси, чопони барлари белбоғига қистириғлиқ, пойгакка келиб чўккалади, «Ҳа, ишқилиб эсон-омон бориб кепсан — бизга шуниси ғанимат», дея даврадагилар иштироқида юзига фотиҳа тортди.

— Қани, укам, гапир-чи, энди, хизматлар яхши ўтдими? Ул-булга чалғиб тузук сўрашолмадик ҳам.

— Ничево, ничево,— деди Тўрақулбой. Кейин олдидағи чойдан бир ҳўплади-да, иштиёқ билан янги саргузаштини айтib бера бошлади.

Унинг гапларидан энсаси қотдими ё бу нарсаларнинг дуруст фаҳмига етмадими, ўроққа қараш баҳона Жўрақул амаки ўрнидан турди. Анчадан сўнг қайтиб келиб чўккаларкан, ҳали-ҳамон ўша нақл эканини кўриб!

— Э, ука, биз ҳам бўлганмиз армияда, қўй энди, улар қолиб кетган гап, — деди.

Тўрақулбой пинак бузмай ҳикоясини давом эттираверди.

— Э, ойнагингни ол-э, бундай! — деди акаси ахийри, жаҳли чиқиб. Тўрақулбойнинг ҳам жаҳли чиқдими, унинг кейинги гапларига жавоб қайтармади — ёстиққа ёнбошлаб олди.

Файзи иккаламиз ўчоқбошидан сопол товоқларда қо-вурдоқ кўтариб келарканмиз, орқадан Жўрақул амакининг: «Армияга бориб ҳам одам бўлмабди бу», деб тўн-филлаганини эшитдик.

Эртаси Қодир тулуумнинг хотини девор оша қўшнисига:

— Эшитдингизми, ҳамсоя? — деди. — Жўрақулбойнинг иниси Тўрақулбой армияга бориб Тўлик бўлиб кепти...

— Бугун маза! — деди Файзи қувнаб. — Зиёфат, ашула!

Кун бўйи Тўрақулбойни кўргани, отамлашгани ошна-оғайнилари келиб туришди. Кун бўйи сарҳовуз ёқасидаги супада дастурхон йиғиширилмади. Кун бўйи Файзи иккаламиз мачит ёнидаги магазиндан шиша ташидик.

Ёр-дўстлари Тўрақулбой хизматни қандай ўтагани билан қизиқишарди.

— Генералнинг мошинасини ҳайдадим, — дея сўз бошларди Тўрақулбой.

У тўрда узала тушиб ётар, ўз ҳикоясидан нечоғли мароқланашётгани тамаки тутуни ора башарасидан аён эди. Даврадагилар унинг гапларига дастлаб бирмунча эътибор, ҳатто қизиқиш билан қулоқ солиши; сўнг қарашдики, суҳбат мароми хийла суюқлашиб, бачканалашиб кетяпти, Тўрақулбой бу туришда бандасига сўз бермайдиган—хизмат кўрганлар лоф аралашаётганини

илгарироқ пайқаб, кулгиларини ютганча бирин-сирии
қўзғалишди, қолганлар уларга эргашди.

Иккинчи гуруҳ одам йиғилганда ҳам Тўрақулбой
гапни худди бояги жойидан бошлади.

Бу ҳол шу йўсин кечга қадар беш марта тақорорлан-
ди. Келган барчанинг энсаси қотиб бир-бир жўнади,
ашулачи ўртоғигина — қўшиқ айтишга хумор бўлиб,
мағрид пойлаб юрган экан шекилли — кун ботгунча ту-
рай демади. У меҳмонлар ҳар янгилангандага «Мен сева-
ман»ни оларди.

— Амаким зерикяпти экан, — деди Файзи худди ўзи
ҳам зерикаётгандек.

Индини Тўрақулбойнинг қолган-қутган ёр-жўралари
келиб кетишиди. Шундан кейин уни ҳеч ким йўқламай
қўйди. Чамаси, ширин хотираларини эшитадиган бошка
оғайниси қолмаган ёди. Уч-тўрт кун ўтиб, ўзига ўхша-
ганроқ ошнаси келди. Икковлон узоқ отамлашишиди.
Меҳмон иш юзасидан қаердадир бўлиб, вақтида келол-
магани учун узр сўради. Тўрақулбой ҳикоясини унга
рус тилида айтиб берди. Сўнг кузатиб чиқаркан, дарво-
закона олдида:

— Мне всё равно здесь не жить, — деди маъюсланиб.

Уйдан меҳмон аригач, Тўрақулбой энди кечқурунли-
ри ясан-тусанни жойига қўйиб, кўчага отланадиган бўл-
ди. Қундузлари — саҳардан оқшомгача супада чўзилаб
ётади. Ёнида «БТ» сигарети. Ҳар эрта чошгоҳда ҳафса
билан соқол қиради, юзига пишиллатиб атир сепади —
қиладиган иши шу.

Файзи иккаламиз кун-узвукун унинг ёнидан жилмай-
миз, дам-бадам саволга тутамиз.

— Амаки, у ер яхими, бу ер? — деб сўрайди Файзи.

— О, конешни, у ер! — дейди амакиси сухбатдош
топилганидан боши кўкка ётиб.

— Дунёда энг яхши жой қаер?

— Воронеж! О-о, Воронеж! — дея энтикиб кетади Тўрақулбой. Сўнг тамаки тутунига ўйчан тикилиб, чуқур уҳ тортади: — Воронеж! Город моей первой любви!..
Бир куни эшакка қий ортиб даштдан Файзининг отаси келиб қолди. Укасининг ҳамон ўшандек бегам-бекор чўзилиб ётганини кўриб жигибийрони чиқди.

— Хўв, ётаверасанми энди толқон шимган тўрадай бўлиб? Ё у ёқдан бел-мелинг синиб келганми?! — дея ўшқирди.

Тўрақулбой ростдан ҳам бели синиб келгандек ўрнидан қўзғалмади, «Нима деяпсан?», деб ўгирилиб ҳам қарамади — чўзиб-чўзиб тамакисини симириб қўйди.

— Амаким армияга қайтиб кетяпти, — деб қолди Файзи хомуш.

Уша қуни Жўрақул амаки от йўрттириб келди. Томоша қувиб орқасидан ҳовлига кирдик. Тўрақулбой, чамадони супа лабида, хаёлчан чўиқайиб тамаки туатарди.

Жўрақул амаки, қўлида қамчи, тўғри унинг устига бостириб борди. Тўрақулбой акасининг важоҳатидан ҳайқиқибми, секин жойидан турди.

— Хўш? — деди Жўрақул амаки мулойим, маслаҳат оҳангига. Тўрақулбойнинг «гал шу», дегандек безрайиб турганини кўрдию қамчи билан бир уриб чамадонни ағдарди ва кутилмаганда бақириб юборди: — Номаъқулнинг ионини епсан, хўпми! Ол чамадонни, отга мингаш!..

— Жўрақулбойнинг олифтаси кўринмай қолдими?

— Адирда эмиш-ку, акасига ёрдам бериб юрганмиш.

— Йўғ-э! Бу кишининг ҳам ерга тушиб, одам сонига қўшиладиган кунлари бор экан-да? Хайрият.

— Лекин, менимча, шу боланинг оёғини бирон жойга чатиб қўйишса, тийилиб қолармиди? Ҳар қалай, ола хуржун, деган гаплар бор.

— Эшитмадингизми, қайси бир қариндошларининг қизидан гап очишка, «Сочи сариқ экан», деб унамабдику!

— Оббо, азamat-эй! Үзимиз кал, лекин кўнглимиз нозик, деганлари шу-да, а, махсум? Үзлари бир такасалтанг-у, кўнгиллари қора сочга кетганини! Сочи сариқ эмиш!

— Адирада юрибди, дедингизми, уста? Менинг эшишимча, акаси билан аразлашиб, чўлга кетиб қолганиши, экскаваторда ишлаётганиши.

— Шунаقا эканми? Ҳа-а, тузук, тузук...

— Амаким Мубор опангга ҳалигидай... — деди Файзи чайналиб.

Муборак опам—шаҳарлик холамнинг қизи; узоқ йили онаси ўлиб, бизникига кўчиб келди; мактабни битирган, кутубхонада ишлайди.

Кейинги пайтда бошига тугун қўйган хотинлар уйимизга серқатнов бўлиб қолишиди. Улар кетгач, онам Муборак опами ошхонага олиб кириб бир нималарни уқтиради. Муборак опам эса: «Пишириб енг унингизни, холажон! Найнов, лақма. Бошимга ураманми?», дея эшикни қарсиллатиб чиқиб кетади. Мен унинг шу қилифини яхши кўраман.

Кейинги пайтда Тўрақулбой каттакон портфель кўта-риб кўчамизда тез-тез пайдо бўла бошлади. У чўлдан бир келганида қўлимга буクロғлиқ, қофоз тутқазаркан.

— Шуни Мубор опангнинг китоби ичига солиб қўй, — деди муғамбирона илжайиб. Анграйиб турганимни кўриб ваъда қилди: — Файзи икковингни чўлга олиб бораман.

Уйга югурдим...

Эртаси куни уйимизга Файзининг отаси, онаси ва яна бир аёл тугун кўтариб меҳмонга келишиди. Улар кетгач,

онам Муборак опамни ошхонага олиб кирди. Мен эшик тирқишига қулоғимни қўйдим.

— Боринг-э, шу олифтангизни бошимга ураманми?— дерди Муборак опам ҳарчанд.

— Нимаси ёмон, Муборакжон? Алининг қиличидаи йигит бўлса... — дея авварди онам.

Негадир бу гал Муборак опам эшикни қарсијлатиб чиқиб кетмади.

Уша оқшом—биз айвонда ўтирадик—деворимиз тагида «Алининг қиличидаи йигит»нинг хиргойиси эшилди:

Иккаламиз бир авлоднинг боласи,
Не қилади бир-бirimiz севганда...

Ҳаммамиз Муборак опамга қарадик. У ерга тикилди, қизарди, кейин югуриб уйга кириб кетди.

— Амакимнинг тўйи эртага, — деди Файзи.
— Мубор опамнинг тўйи! — дедим мен.

Бирон ойлар ўтгач, Файзининг амакиси — менинг поччам кечқурунлари бир қўлида тўрхалта, бир қўлида қовун ёки тарвуз кўтариб уйга қайтадиган, сўнgra эгнида бекасам чопон, чиқиб тол тагидагиларга—ўша, кечагина ўзини муҳокама қилганлар сафига қўшиладиган бўлди.

— Юр, амаким чақиряпти, — де(ганми)ди кунлардан бир кун Файзи катталардек ташвишманд йўсинда. — Икковимизга айтадиган гапи бор экан.

— Жиянлар, — дея ўйчан сўз бошла (ганми)ди Тўрақул поччам. — Биласизлар, мен ўқимоқчи эдим. Ўқишни битириб шаҳарда қолмоқчи, каттароқ бирон иш қилмоқчи эдим. Бошқача одам бўлмоқчи эдим-да, бошқача! Орзуларим осмонни кўзлаган эди. Ҳаммасига

эришаман, деб ишонардим, ҳаммасига. Бугун келиб қарасам — ҳеч бирига эришолмабман, ҳеч қайсисига-я! Нимадир етишмадими, нимадир халақит бердими — нима? Билмайман. Эҳ, бу гапларни сизларга нима учун айтяпман?..

Биз уни ҳали шу чоққача сира бундай тушкун, бундай жиддий қиёфада кўрмаган эдик.

... Рост эдими шу?

Кейинроқ ўзимиз — Файзи ҳам, мен ҳам амаки бўлдик, жиянларимиз кетимиздан эргашиб юра бошлади.

Тол тагидагиларни ҳамон қизғин муҳокама устида учратардим. Улар орасида Тўрақул поччам ҳам бўларди. «Нимани гапиришаркан бунча?», деб ажабланардйм.

Үердан ўтганимизда даврадошлар бизга — Файзи билан менга зимдан қараб-қараб қўйишларини сезардим, шунда кўзим ҳеч нарсани кўрмас, қулоғим ҳеч нарсани эшигъмас эди. (Чамаси, Файзи ҳам мендек «кўру кар» эди.)

Ажабо, доим шулар ёнидан ўтсам, ҳануз-ҳамои Файзининг амакисини—менинг поччамни нақл қилишаётгандек туюларди...

Энди бу гапларга кўп бўлди. Энди қишлоққа борган-дагина, Файзини, Файзи иккаламизнинг болалик завқимиз, ҳавасларимиз сабабкори — Тўрақул поччамни кўргандагина эслаб-эслаб қўяман. Эслайману ўйлаб қоламан: ўшанда ростдан ҳам кунлардан бир кун Тўрақул поччам Файзи иккаламизни ҳузурига чақириб аззабазза ҳасрат қилган, бизга — ҳа, Файзи билан менга нимадир, ўзи ҳам тагига етолмаган ниманидир айтмоқчи, уқтироқчи бўлганмиди ёки буни ўзимча тўқиб юрибманми? Билмайман. Улардан сўрашга эса ийманаман. Лекин негадир шунга — кунлардан бир кун Тўрақул поччам Файзи иккаламизни ҳузурига чақирганига, чақириб аззабазза ҳасрат қилганига, ҳасрат асноси бизга —

ҳа, Файзи билан менга ниманидир, ўзи ҳам тагига етолмаган ниманидир айтмоқчи, уқтирмоқчи бўлганига ишонгим келади.

...Файзининг амакиси—менинг поччам бошқача одам бўлмоқчи эди, бошқача! Биласизми, қандай? Билмайсиз. Мен ҳам билмайман, Файзи ҳам, ўша одамнинг ўзи ҳам...

Буни энди ҳеч ким билмайди, билолмайди.

1974

БИРОҚШОМ

У ишдан сўнг ҳеч қаёққа бурилмай тўппа-тўғри уйга боради. Ҳар куни. Уй совуқ — печка ёқишига ҳафсаласи келмайди; қорни оч — столда эрталаб чойнак тагида қолган яхна билан ион бурдалари бор...

Кейин йўлда олган газеталарини ҳафсаласизгина ва-рақлаб чиқади-да, чироқни ўчириб, диванда мудраб қолади.

Бир маҳал чироқ ёнади. Кўзини очса — хотини шифонъер олдиди кийим алмаштираётган бўлади.

— Келдингми? — дейди. — Намунча кеч? Учрашув чўзилдими?

— Чўзилди! Автобус кутдим.

— Қим кузатди?

— Қорбобо,— дея бепарво жавоб қиласди хотини.

Кейин хотини рўзгорга уннайди: чой қўяди, эрталабки овқатни иситади, унинг шимига даэмол босади...

У радиодан дам олиш концертини эшитиб ўтиради. Зерикади.

— Сен ҳам бундай бир гапирсанг-чи, — дейди,

Хотини гапиради.

— Нимани гапирай? — деб сўрайди аввал. — Ҳа, бу-
гун психология домламиз...

Психология домласи одамларни тўрт турга ажратиб-
ди: холерик, сангвиник, флегматик, меланхолик. Тавба,
одамлар тўрт хил бўлармиш! Оламда нечта одам бор?
Тўрт хил эмиш шулар. Психология домласи айтибди.

— Сен қайсисига кираркансан?

— Билмасам.

«Сен ҳеч қайсисига кирмасанг керак. Бир қиз бор, у...»
Беихтиёр ўша қиз ҳақида ўйлаб кетади.

Кейин ётишади. Шунда у хотинини сал-пал яхши
кўргандек бўлади.

Эртаси яна шу...

Шуларни ўйлаб, у бугун уйга бормади. Қаёққадир
кетгиси келди. Салимни анчадан бери кўрмаганини эс-
лади. Ўзи ҳам бундай бир келиб хабар олишни ўйламай-
ди. Ўқиш билан овора, қўли тегмаса керак. Студентли-
гида ижарада бирга туришарди. Ўқишини битиргач, уй-
ланиб бу бошқа жойга чиқди, Салим ўша ерда қолди.
Тўйдан кейин бир-икки борди-да, шу бўйи қорасини кўр-
сатмай кетди.

У автобусга ўтириб Салимникига жўнаркан, кам-
пирга «Келиб-келиб тураман, ойи», деганини эслаб, ҳо-
зир унинг қаршисида мулзам бўлишини хаёл қилди.

Йўқ, уни кўриб кампир чандон севиниб кетдики, йи-
гиг юрган гиналари ҳам эсига келмади.

— Келинпошшо билан бўли-иб бизни бирдан унутиб
юбординг-а, ўғлим? — деди фақат андак ўпкалаган син-
гари.

— Э, ойи, иш, уй-рўзгор... — дея ташвишли илжайди у.

— Ана шундай бўлади? Ҳали ҳолва, битта-иккитали
бўлгач, кейин кўрасан. Ҳа, келинпошша чопқиллаб
юрибдими? Бир бошлаб ҳам келмайсан?

— Уям иш билан, ўқиш билан... — У негадир хоти-
нининг чопқиллаб юришини тасаввур қилиб, ичида кул-

ди. Хотини чопқиллаб юрадиган хилидан эмас, ўн гапга аранг бир оғиз жавоб беради-ю... Бошқа қиз келди кўз олдига. Қейин кампирни, онасилик бўлиб қолган одамни ранжитмаслик учун ваъда берди: — Келамиз, ойи, келамиз. Шундай ният бор ўзи. Салимингиз кўринмайди, ўқишдан қайтмадими ҳали?

— Сен кетиб қолганингдан буён қўними йўқ. Бир ўзи сиқилади чофи, чиқиб-чиқиб кетавуради... Кечаки эди, «Ётоқда, болаларнинг олдида бўламан, ойи, сўраб келишса айтиб қўярсан», деб кетгани — дараги йўқ.

Кампир дастурхонга уннамоқчи эди, у қўймади:

— Шошиб турибман, ойижон, алоҳида келарман.

— Ҳа, намунча? Озид-ёзид бир кепсан...

— Келинингиз... дарсдан олиб кетишим керак. — У бу гап қаёқдан хаёлига келиб қолганига ажабланди.

— Ундоқ бўлса ўзингдан кўр, норин қилиб қўювдим.

— Бир келиб еб кетаман ҳали.

Кампир орқасидан: «Бу гал ёлғиз келсанг киритмайман, эй бола!», дея пўписа қилиб қолди.

У бекат томон юаркан, яна уйга боришни ўйлаб, юраги безиллаб кетганини сезди. Бошқа қаерга борарди? Таниш-билишларини бир-бир кўз олдидан ўтказиб, ҳеч кимни книга оёғи тортмади.

У яқинлашиши билан автобус бекатни ҳувиллатиб жўнади. Скамейкада, олдиларида саватлари, гангир-гунгур қилиб ўтирган иккита кампир қолди. Скамейканинг охирида — устига газета ёпилган бир сават. Кимники? Устунга суюнганча тескари қараб бир қиз турибди. Шуникимикан? Нозиккина қиз. Сочи бўйнида тутамланиб, елкасига ташланган. Қўлида боғичи узун қизил сумка, ерга тегай дейди. Қулоқларида йирик ҳалқа-зиррак. Чиройли қиз бўлса керак. Шуникимикан? Устига газета ёпилган лаган ва... шундай қиз?!

У бекатда нари-бери кеза бощлади; қиз томонига ўтгиси, юзини кўргиси келаётган бўлса-да, нимадандир йиманарди.

Нима қилса экан? Уйдан безор, дилзада. Тўғри келган автобусга ўтириб бир ёқларга кетишини ўйлади. Шу фикрда йўлга кўз тутди.

Қиз ҳамон тескари, ўгирилишни хаёлига ҳам келтирмайди, гўё бу ёқдаги бирордан аразда. Қанақа қиз экан?

Яқинлашаётган автобусни кўриб кампирлар саватларига қўл чўзишиди. Машина келиб тўхтагач, чиқмоқчи бўлиб у ҳам зинага оёқ қўйди, шунда беихтиёр қиз томон қарадию... секин оёғини олди. «Ўша!» Кўндалангига фарқ очиб, бир тутам сочи манглайига тушириб таралган. Кўзларида гангитадиган бир сеҳр... «Худди ўзи!»

Автобус йигитнинг ёнгинасидан ўтиб жўнади. Йигит ҳамон қиздан кўз узмай анграйиб турарди. Қиз унга ҳайратомуз бир назар ташлади-да, тағин тескари ўгирилиб олди. Йигит тиззасига қўл тираб бекат супасига чиқди.

Бекатда энди у билан қиздан бўлак кимса йўқ эди.

«Ўша! Худди ўзи!» Йигит ичидаги худодан бу бекатга бошқа автобус юбормасликни ёлвора бошлади. «Нима қилсан экан? Қандоқ гапга солсан бўларкан? Қиз бола билан гаплашиш ҳам эсдан чиқибди, жин ургур. Ҳаммасига ўзим... уйланганим сабаб! Шунақа, кўнглимдагиси учрашини кутиб юрсан ўлармидим? Танишибоқ, пешона-да битилгани, баҳтим юлдузи шу, бошқаси йўқ оламда, деб ўйлаган эканман-да. Ҳомкалла! Қандай гап ташласам экан?...»

У яна нари-бери юра бошлади — қизга яқинлашишга юраги дов бермасди. Ўша томон қадам босди дегунча оёқлари бўшашиб, шалвираб қолади. Ниҳоят, бор журъатини тўплаб унга рўбарў бўлди. Қиз бир ўқрайдию сумкасини осилтирганча бекатнинг нариги бошига йўл олди. Бориб, худди боягидек, устунга суюнди. Йигит унга яна сурбетларча рўбарў келди. Қиз энди ошкора нафрат билан юзини буриб, скамейкага, устига газета ёпилган сават ёнига бориб ўтирди; кўзларини осмонга тикиб олди: башарангни кўргандан кўра... Йигит дадил

келиб унинг ёнгинасига жойлаши. Қиз ёввойи қараш қилиб, нарироқ сурилди — сават устунга тақалиб қолди.

— Автобусга чиқмадингиз?

Қиз осмондан кўз узмай заҳарханда қилди:

— Ҳар қанақасига чиқаверар экан-да!

Йигит таслим бўлмади:

— Сават сизникими?

— Нимайди?

— Совчиликка боряпсизми дейман?

— Совчи? Қанақа совчи?

— Сизни айтапман, бошингизга саватни қўй-иб...

— Ҳа-а... — Қизнинг юзи ёришганга ўхшади.

— Совчи хола! — дея йигит ўзига-ўзи гапиргандек

шўх пичирлади. — Йўл бўлсин, совчи хола?

Қиз кутилмагандага қақъос уриб кулди.

— Совчи хола де-енг?

— Ҳа, ўхшайсиз! — деб бўш келмади йигит. — Бир қўлингиизда сумка, бир қўлингиизда зонтик, бошингизда сават. Замонавий совчи-да!

Қиз энди кулгидан тўхтаб, йигитга қизиқиш билан боқди.

— Совчи хола деганингизга болаликда «хола-хола» ўйнаганимиз эсимга тушди.

— Сават ростдан сизникими?

— Меники.

Йигит ажаблангандек, қизга ботиниброқ тикилди.

— Қизиқ, автобусга чиқмадингиз, чиқадиганга ҳам ўхшамайсиз бу ўтиришда?

— Тўғри айтасиз. Уяляпман. Кейин — автобуслар ҳам тиқилинч.

— Ҳа-а. Уйингиз узоқми?

— Узоқ-ку эмас, лекин... Тўрт бекатча келади бу ердан.

— Ҳаммол ёлламайсизми?

— Ҳаммол? — деб елкасини қисди қиз, — Қани ҳаммол?

— Мана, ёнингизда ўтирибди.

Қиз тушуммагандек бир лаҳза йигитга тикилиб турди-да, шарақлаб кулиб юборди:

— Вой ҳаммол-эй!

— Ростдан, кетдик, ўтираверасизми шундоқ! У ёқда қудаларингиз интизор бўлиб кутишаётгандир.— Йигит чақонлик билан саватни олиб бошига қўйди, қиз бармогини бигиз қилиб кулган эди, кейин белига тираб олди.

— Кетсак кетдик! — Қиз жойидан ирғиб турди-да, сумкани елкасига ташлаб, буйруқ оҳангидаги:— Қани, олдимга тушинг-чи, ҳаммол! — деди.

Қизнинг самимияти, ўзини эркин тутиши йигитни мафтун этди. Улар акациялар соясидаги йўлкадан ёнма-ён йўлга тушишди. Бир оз юрилгач, қиз:

— Сизниям ишдан қолдирдим,— деди хижолатомуз.

— Бирор ёққа кетаётгандирсиз?

Йигит бепарво жавоб қилди:

— Қаёққа борардим? Сандирақлаб юрибман. Бекорчилик... Хушбўй нарсаларнинг ҳиди келяпти, саватингиздаги нима ўзи?

— Сомса-а! Келинг, еймиз.— Қиз жавоб ҳам кутмай газетанинг бир четини кўтарди-да, саватни титкилаган бўлиб иккита сомса олди, бирини йигитга узатди. Йигит иккиланибгина сомсага қўйл чўзаркан, саватга на зар ташлаб:

— Вой-бў, бунчасини нима қиласиз? Қудаларингизни книга кетаётганингизга энди ишондим,— деди.

— Йўқ,— деди қиз сомсадан тишлаб.— Бугун туғилган куним! .

— О-о!— дея хитоб қилди йигит.— Табриклайман! Нега боя айтмадингиз?— «Айтганида нима қилардим?», дея хаёлидан ўтказди ўзича.

— Ўртоқларим келишади. Ўзим ҳам сомсани яхши кўраман. Буни қаранг, бир амаллаб сават билан бозорга тушишга тушибман-у, кўтариб қайтишни ўйламабман. Яхшиям... — «Сиз чиқиб қолдингиз», дейишига жиндақ

етмай тилини тишлади у. — Раҳмат сизга. Укамни юбор-
сам ҳам бўларкан..

— Укангизни юбормаганингиз яхши бўлган экан, —
деди йигит шум оҳангда. Қиз савол назари билан қара-
ган эди, илжайди: — Унда биз танишмаган бўлардик.

— Танишганимиз яхши бўлди, — деди қиз самимий.
Кейин негадир астойдил ажабланди: — Отимни сўрама-
дингиз-ку? Энди отимни айтишим керак-а?

— Нега энди «керақ-а?»

— Танишганда шунаقا қилишади-ку? — Қиз гўдак-
ларча бир завқ билан кулди.

— Билиб қўйсам зарар қилмасди.

— Аввал ўзингиз айтинг, — дея бошини бир ёнга со-
либ сўради қиз.

«Айтайми? Узимнинг исмимни айтайми, ё... Яхши қиз
екан. Мунофиқлик қилиш номардлик!»

— Менинг отим бўлса... Топинг-чи, нима экан? —
Қиз тағин қиқирлаб эркалик қилди.

— Фолчиликни ёмон кўраман. Нотўғри чиқиб қолса...

— Ҳулка-ар.

«Ҳулкар... Мен орзу қилган қизнинг ҳам исми шун-
га ўхшаш бўлиши керак эди. Балки шу қиз учрарди.
Хотиним-чи? У мени яхши кўради, нима десам йўқ де-
маган, балки шунинг учун... Узим-чи? Шунга уйланма-
сан, тоқ ўтаман, деб ўйлардим бир вақтлар. Бечора!
Одам ҳам шунаقا ювощ бўладими? Балки шунинг учун...
севмай қолгандирман. Севмай қолгандирман? Нега бўл-
маса йўлда учраган қизга... Яхши қиз экан, ғалати қиз
екан. Ҳув бозорда кўрганим-чи..»

Бир якшанба хотини билан бозор айланиб юрганида
бир қизни кўриб қолган эди. Қиз шундай тикилдики...
нигоҳан гўё: «Шунаقا. Кўнглингдагини йиллаб излайсан,
кутасан. Топдим, деб ўйлайсан бир куни, севдим деб
ўйлайсан. Ҳолбуки... Мана, ниҳоят учрашдик. Мен ҳам
узоқ йиллар сени изладим, кутдим, адашдим ҳам. Бугун
кўриб турибман... Энди нима қиласмиш? Осмонга учиб

кетмасак... Начора, тақдир дегани шунақа экан: камдан-кам^тодам кўнглидагини топаркан. Топган ҳам гоҳо шубҳалатниб, тополмадим-да, дея надомат чекар экан. Хотининг ҳам-ку ёмон эмас, лекин кўнглингдагимикан у? Афсус, афсус. Алвидо!», деяётгандек эди. У сумкачасини билагига осиб олган, маъюс термилиб турар эди. Муюлишдан чиқиб келган трамвай уни бехос шамолдек олдикетди.

“Бозордан қайтишаркан, хаёли айниб, у хотинига дабдурустдан:

— Одам аҳмоқ бўларкан, — деди.

— Нега? Ким аҳмоқ экан? — деб ажабланди хотини.

— Сен ҳам, мен ҳам. Ҳамма!

— Хотини содда эди, ювош эди — индамади. У эрига худога ишонгандек ишонарди.

— Хаёл суриб кетдингиз? — деди қиз кулиб.

— Йўқ, ўзим, — дея илжайишга уринди у. — Сиз ўқийисиз, шундоқми?

— Сиз ҳам.

— Йў-ўқ. Ўқиб бўлганмиз биз.

— Ҳо-о, мулла бўп қолганмиз денг? Нима иш қила-сиз?

Йигитнинг чеҳрасидан бояги хомушлик ариб, тағин хушчақчақлик ёйилди.

— Мулла бўлгандан кейин... сизга ўхшаган қизларни ўқитиб юради-да!

— Бошини айлантириб?

— Бошингизни айлантиридимми ҳали?

— Ҳазиллашдим, ҳазиллашдим, — деди қиз нимадандир ҳадикда.

— Нега боя мендан қочдингиз?

— Қачон?

— Бекатда.

— Ҳа-а... — деб жилмайди қиз. — Шилқим болалардан деб ўйлабман. Унақалар озми?

— Ӯшалардан эканманми?

— Сиз... ёмонлик қилолмайсиз, қилмайсиз. — Қиз бу гапни жиддий, ишонч билан айтди. Сўнг ширин табасум қилиб қўши: — Бошқачасиз.

Улар икки четида каллакланган толлар ўсган чоғроқ кўча бошида тўхташи.

— Мана, етиб ҳам келдик, — деди қиз кўча охиридаги баланд иморатга ишора қилиб: — Ана, бизнинг уй. Юринг. Шунчаки мулозамат қиляпти, деб ўйламанг, юринг. Туғилган куним, ўтирамиз, ўртоқларим келади. Шундоқ пластинкаларим бо-ор... Ростдан, сизнинг боришингизни жудаям истаяпман. — Унинг кўзларида жозибали бир нур, гангитувчи сеҳр балқиди.

— Майли, раҳмат. Шошаётган эдим. — Йигит бу гапни дабдурустдан айтди. Сўнг бундан ичида мамнунлик ҳам туйди. Бояги девона хаёлларидан уялди. Айни чоқда нимадандир илҳомланиб кетди. — Раҳмат, Ҳулкар. Туғилган кунингиз чинакам байрамдай ўтсин, ҳамма кунларингиз ҳам! Лекин мен...

— Боролмайсиз? — Қизнинг чеҳрасида бир зум гинахонлик акс этди, кейин у ёқимли кулимсиради: — Кенойим кутаётган бўлсалар керак-а уйда? Сиз бу ёқда ҳарсиллаб бирорларнинг саватини кўтариб юрибсиз! Тушунаман.

— Қаердан билдингиз... уйланган эканимни?

— Билдим-да. Сизга ўхшаган йигитлар уйланган бўлади. Яхши кўрасиз уларни, сезилиб туриби.

— Тўғри айтасиз. — Йигит бирдан қувониб кетди. Кўнглида хотинига, қаршисида жилмайиб турган мана шу ёқимтой қизга, кўчадан ўтаётган одамларга ажиб бир меҳр ёлқинланди. — Тўғри айтасиз. Ҳозир уни дарсдан олиб кетишими керак.

— Бахти эканлар,— деди қиз хаёлчан.— Таништириб қўймайсизми?

«Хотиним бахти!» Кўнглида анчадан бери йиғилиб юрган губорлар аллақаёқقا изсиз ғойиб бўлди. Ҳудди хотинини кўп замонлардан буён кўрмагандек унуттилган

бир соғинч уйғонди дилида. Чиндан ҳам бу аломат қиз билан уни таништириб қўйгиси келаётганини сезди.

— Рашқ қилмасмиканлар? — дея синовчан боқиб сўради қиз.

— Қилса керак. Табиий.

— Бари бир салом денг мендан. У кишига ҳавасим келяпти.

— Нима деб?

— Бекатда учраган бир қиз салом айтди, денг.— У сидқидил гапиради.

— Бўпти, айтаман.

Улар хайрлашиш олдидан бир лаҳза бир-бирларига термилиб қолишли. Иккисининг ҳам хаёлидан бояги бекатдаги манзара кечди.

— Бахтингизга яхши йигит учрасин, омин! — деди йигит.

— Ана энди ишондим муллалигингизга, — деб кулди қиз.

— Илойим шундай мулла учрасин!

Қиз, бир қўлида сумка, бир қўли билан саватни белига тираганча, орқасига қарай-қарай кўчани ичкарилаб кетди. Йигит то у кўча охиридаги дарвозага кириб кетгунча қараб турди. Энди орқасига қайрилмоқчи эди, қиз дарвозадан қайтиб чиқди: сават, сумка йўқ. У қўл силкиди. Йигит ҳам аллатовур ҳолатда қўлини кўтарди. Сўнг изига бурилиб, соатига назар ташлади: хотинининг дарси тугашига ҳали анча бор экан.

У автобусга чиқиб, орқа ўриндиқлардан бирига ўзини ташлади. Машина жойидан силкиниб қўзғаларкан, олдинги ўриндиқ тутқичидан ушлаётиб ундаги қаламтарош билан қирилган ёзувга кўзи тушди: «Адҳам + Шаҳло = муҳаббат». Муҳаббат изҳор қилишнинг йўлини топишибди. Энди шу ўриндиққа ўтирган барча Адҳам Шаҳлони севишини билиб олади. Бу ерга кимлар ўтирамайди, кимлар кўрмайди бу ёзувни — ҳаммаси огоҳ бўлади бу ошкора муҳаббатдан. Бутун олам! Адҳам

ким? Шаҳло ким? Ростдан бир-бирини севармикан? Унинг кўз олдига хотини келди, сўнг бояги қиз. Кўнглида бир фалаён турди, у тиниқлаша-тиниқлаша бориб, бирорвнинг қаршиисида уни гуноҳкорга айлантирди. Хаёлдан чалғиш ниятида дераза орқали оқшомги кўчага тикилди. Ўқтин-ўқтин йўлкаларда ҳеч ёққа ошиқмай, навозиш билан кезиб юрган «жуфт»лар кўзга чалинади. Хаёл уни тағин олиб қочди...

Аллақайси бекатда ўшанақа «жуфт»лардан бири автобусга чиқди. Қиз унга танишдек кўринди. Эслади: бир факультетда ўқишиган экан. Учинчи курсдалигидами тўйи бўлган эди. Ҳамма борган, негадир у бормаган эди. «Куёви келажаги порлоқ кашфиётчи олим экан», дейишувди. Ана, кўриниб турибди, келажаги порлоқ: пешонасида сочи йўқ...

Улар етаклашиб келиб, нариги томондаги бир ўринидиққа ёнма-ён ўтиришди. Йигит қўлларини ҳаракатлантириб алланимани гапиряпти. Хотини диққат билан эшистаркан, суйкалиб-суйкалиб қўяди, гоҳо бошини унинг кифтига босиб кулади.

Уларга ҳаваси келди, нимадандир афсусланди.

У институт яқинида автобусдан тушиб, нарироқдаги мўъжазгина хиёбонга кирди. Бориб талабалар чиқадиган эшик баралла кўриниб турадиган чеккароқдаги скамейкага ўтиреди. Севишиб юрган кезлари ва тўйдан кеийинги бир-икки ой у ҳар оқшом ишхонасидан тўғри шу ерга келар, худди шу скамейкада ўтириб хотинининг дарсдан чиқишини кутар эди. У чиққач, бирга-бирга қайтишарди. Кейин-кейин бу ҳол уни зериктирди, жонига тегди, у-буни баҳона қилиб, «Ўзинг келаверарсан», дея тўғри уйга кетадиган бўлди. Хотини ҳам бунга кўниқди, фақат баъзан-баъзан ўртоқларини эрлари келиб олиб кетишини айтиб ўпкаласб қўярди.

Бир пайт эшик олдини шовқинга тўлдириб бирини кетин талабалар чиқа бошлашди. У илгарилари келавесириб хотинининг барча курсдошларини таниб қолган эди.

Кўз тутди. Эшикда анов кўккўз йигит ва новчароқ шериги қўринди. Улар, узоқлашмай, дараҳт тагида туриб қолиши. Чамаси, кимнидир кутишяпти. Кимни?! Унинг юраги бирдан тепкилаб, вужудида ғазаб, алам алангалаиди...

Бир куни хотини дарсдан одатдагидан кечроқ қайтди. Тергаган эди, «Биласиз, имтиҳонларимиз яқин, — деди, — қўшимча лекция бўлди. Қўрқманг, Собир кузатиб қўйди». «Кузатиб қўйди? Қанақа Собир? Анов кўккўзми?» «Ҳа, ўша. Яхши бола. Ўзингиз бормаганингиздан кейин нима қиласай? Айтувдим, йўқ деёлмади шекилли».

«Яхши бола! Ана, кутяпти. Яна кузатиб қўймоқчилими?!» У ўзини зўрга босиб турарди. Шу пайт эшикда хотинининг чарм ёмғирпўшини кўрди. Хотини чиқибоқ орқа-олдига қарамай бекат томон елиб кетди. Кўккўз у тарафга назар ҳам ташламади.

У хотинининг изидан панама-пана жўнади. Унга қўринмасликка аҳд қилди негадир. Автобус ҳам дарров кела қолди. Хотинининг кетидан пусиб машинага чиқдида, энг орқадаги үриндиқдан жой олди. Хотини илгарироқда, дераза ёнида ўтиради. У, елкалари кичкина, ҳимоясиз қиёфада, шумшайибгина деразага тикилиб борарди. Унга боқаркан, кўнглини нотинч бир пушаймон ўртаб ўтди, хотинига алланечук раҳми келди.

Қайси бир бекатдан чиққан сўлоқмондек йигит бўш ўрин қидириб у ёқ-бу ёққа аланглади-да, хотинининг ёнига бориб ўзини таппа ташлади, еб қўйгудай суқланиб қаради.

У сўлоқмонга ғазаб ва нафрат билан ўқраяркан, ноғоҳ бир ниманинг тагига етгандек, сабабини англагандек бўлди. Ҳар кеч шу, ҳар кеч хотини шундай шумшайиб ёлғиз қайтади, ҳар кеч автобусда унинг ёнига анавига ўхшаган бир сўлоқмон келиб ўтиради, суқланиб қарайди, маза-бемаза гап ҳам ташлаши мумкин...

Автобусдан тушгач, эр-хотин орқама-кейин кета бошлиши. Бир кўнгли ҳозир хотинига етиб олгиси, унга

дунёдаги энг яхши гапларни айтгиси, уни бутун борлиғи билан суйгиси келарди-ю, нимадандир чўчир, ҳадпк-сирап эди.

Уйларига етишди. У хотинининг ортидан ҳовлига қо-рама-қора кирди. Йўлка ишкомдан тўкилган барги ха-зонга тўла эди. Оёғи остида хазон эҳтиёtsиз ғижирлаб кетди-ю, хотини чўчиб ўгирилди. Йигит худди кечириб бўлмас бир айб устида қўлга тушган каби довдираб қолди.

— Мен... сен билан... орқангдан келдим...

Хотинининг чеҳрасида аввал ҳеч бир ифода кўринмади, кейин ғалати ажабланиш акс этди, кейин пинҳон бир ўкиич пайдо бўлди. У унсиз бурилиб, пешонасини ишком устунига сужди. Йигит яқинлашиб, унинг кифтига қўлинни қўйди. Кичкина кифтларга қўшилиб қўллари ҳам титрай бошлади...

1975

С О В У Қ

Совуқдан кичрайиб қолган қуёшии
Иситгим келади бағримга босиб.

•
Қутлибека

— Эрта оқшом Ҳамидулланикига «уй муборак»ка борарканмиз-а,— деди Рихсиев тишида қарсиллатиб бодом чақаркан.

— Эртага эканми? — дея столдан бош күтариб сўради Турғунбой. — Шанба куни, дейишаётувди шекилли? Неча хонали экан уйи?

— Тўрт хонали! — Рихсиев кафтида бодомнинг мағзини ажратса бошлади.— Жуда кенг эмиш. Иннайкейин—иссиқ сув, ванна, газ... Роҳатижон-да. Балогина экан бу бола, ишга келганига икки йил тўлмай, уй алмаштиришга ҳам улгурди. — Рихсиев олдида ёзиғлиқ газетадан титкилаб энди кишмиш теришга тушди. — Олингда бундан, Турғунбой, сояки. — У бурчакдаги столга ўмган ташлаб алланимани кўчираётган Үрмоновни ҳам таклиф қилди: — Ҳов, қўшни, ҳа, кейин бўлар иш дегани, кишмишга келинг, кишмишга — Самарқандники!

Үрмонов иримиға «Раҳмат», деб қўйди-да, қофоздан кўз узиб деразага боқди. Дераза ортида игнанинг учидек қор ураг, қор ёғдусидан ёришиб кетган хона иссиққина, ташқари нечоғли совуқ экани, ҳозир балки кимдир ана шу изғиринда дийдира бургани бу ерда ўтирган-

ларнинг хаёлига ҳам келмас эди. Баданига таниш, заҳарли бир титроқ кирған Үрмонов жунжикиб кетди, бояги гапни эслаб, «Уйи иссиқ бўлса керак», деди ичида ва эртага—«уй муборак»ка—зиёфатга боришини, албатта бориши кераклигини ўйладию ўзидан мамнун бўлиб қўйди.

Тўрт хонали экан. Меҳмонларни аввал хоналари бўйлаб айлантириб томоша қилдиради; гази («Табиий газ, кечаю кундуз гуриллаб ётади!»), суви («Қизилини бурасангиз — иссиқ сув, кўкини бурасангиз — совуқ сув!»), ваннасини («Деворлари ялтироқ плитадан! Зўр-ал!») кўрсатади; айвончасига бошлаб чиқади («Кенглигини кўринг, ёзда буям бир хонадай гап-да, тўғрими?») — фақат ётоқ бўлмасини четлаб ўтади («Бу энди, биласизлар...») — бегона кўзга номаҳрам. Кейин катта хонада ясатилган зиёфат столи атрофига ўтирадилар. Ҳамма бир-бир ўрнидан туриб, хонадонга қут-барака, тўй-шодиёна тилаб қадаҳ кўтаради. Иззат-икром билан тўрга ўтқазилган Үрмонов ҳам сўз айтади. Пойгакда ўтирган уй эгаси Ҳамидулла унга қараб миннатдорона жилмайиб қўяди, келиб қадаҳ чўқишитиради. Үрмонов ҳузур-қаноат қўйнида қўлидагини симиргач, даврадагиларга ўқтам, виқорли назар ташлайди; барча фурбатлари унтилгандек, аллақайга чекингандек бўлади; оёқ оғрифи ҳам андак босилса керак. Шундан қўрқиб, икки ҳафтадан бери ҳаммомга тушган эмас: баданига сув тегса — кейин неча кун оёғи қақшаб юради. Фурсатдан фойдаланиб, душда ювиниб олса-чи? Ие, калла борми ўзи? Зиёфатга борган одам, бирорнинг уйида, бола-чақаси-нинг олдида... Ҳа, хотини сочиқ тутиб, ўзи чой узатиб ҳам туради!

У негадир, шунга ҳам ҳаққим бор, деб ўйлаганига ажабланди. Гап шундаки, Ҳамидулланинг тўрт хонали уйга эга бўлишини Үрмонов ўзи туфайли деб биларди.

Илк қор тушган кезлар эди. Бир куни уни местком раиси чақириб қолди.

— Суюнчини чўзинг! — деди илжайиб. — Уй ажратилди бизга. Навбат сизники экан. Хўжайнинлар билан келишдик, анча йилдан бери ишлайтганингиз, пешқадам инженерларимиздан эканингизни назарда тутиб, сизга берадиган бўлдик. Хўжжатларни тайёрлайверинг. «Бизнинг давримизда яшаб қолсин», дедик-да. Келинг энди, ўтган ишга салавот, шунча вақт — анов гапга уч йил бўлдими, тўрт йил? — қийналдингиз, етар...

— Нима, бошқа талабгор йўқми? — Ҳаяжонда Ўрмоновнинг тилига келгани шу бўлди.

— Талабгорнинг-кусаноги йўқ. Мана, биттаси иқти-
сад бўлимидаги бола — Ҳамидулла. Неча кундан бери
изимдан қўймай, қулоқ-миямни қоқиб қўлимга беряпти.
Учта боласи бормиш, отасининг уйига сифмай қолган-
миш.

Ўрмонов Ҳамидулла билан унчалик яқин эмасди. У-
хоналарига гоҳ гугурт, гоҳ сигарет сўрабгина кирар,
бошқа пайт тузук сўзлашиб ҳам ўтирас, йўлакда дуч
келганида нотанишдек индамай ўтиб кетаверар эди.
Кейинги кунларда ўзгариб қолди: кўп кирадиган, узоқ-
узоқ ўтириб қоладиган, гапдан гап чиқариб, «Ҳовли тор-
лик қиляпти, укалар уйланадиган, одам оила билан
жуда қийналиб кетди», дея ҳасрат қиласидиган бўлди.
Буни у кўпинча Ўрмоновга қараб айтарди. Демак...

— Ўйланиб қолдингиз бунча? — деди местком раиси.

Ўрмоновнинг кўз олдига Ҳамидулланинг каталакдек
хонада сиқилишиб ўтирган болалари келдю ўзини раҳм-
шафқатдан йироқ ёвуз кимсага ўхшатиб айбдор ҳис-
этди.

— Ӯшанга бера қолинглар, — деди пешонаси терчи-
лаб. — Ҳамидуллага. Мен... ҳар ҳолда, яна бир оз кути-
шим мумкин.

— Шундай бўлсеними? — Раис унга таажжуб билан
тиклиди. — Ҳамидулланинг уйи бор, бир йил-ярим йил
сабр қилар. Қолаверса, ҳали янги ҳодим, жа-а унчалик
хизмат кўрсатиб қўйган жойи ҳам йўқ. Тағин ўзингиз

биласиз, оғайни. Кейин орқамиздан гаи бўлиб юрмаса бас. Бизга бари бир,— деди совуққина.

Ўрмонов пушаймон бўлмади — ўзини жуда олижаноб, алланечук енгил сезди. Эшитганлар: «Бекор қилиб-сиз-да», дейишди, аммо бу гапларни у шунчаки, кўнгил учун, деб ўйлади.

Мана энди, Ҳамидулла янги уйга кўчиб кирибди, эртага зиёфат бериб, уни «ювади».

«Уйи иссиқ бўлса керак,— деб ўйлади Ўрмонов яна. — Тўрт хонали экан, тўрт хонаси ҳам иссиқ бўлса керак».

У чекиши учун туриб эшикка юрди; хонадаги ягона кашандада бўлганидан кўпинча йўлакда тутатарди: бу ерда чеккудек бўлса, инжиқ табиатли Рихсиев боши оғришини айтиб шикоят қиласди.

Рихсиевнинг столи ёнидан ўтаркан, у:

— Мағздан олинг, Туробжон, — деб мулозамат қилди. — Қишиши қаранг, маржондек-а!

Ўрмонов мағзга ҳам, маржондек кишишига ҳам қа-рамади, столда турган банкани айлантириб кўаркан:

— Ефми бу? — деб сўради.

— Асал, — Рихсиев текис, соғлом тішлари қаторасини намойиш қилгандек илжайди. Сўнг доимо ялтираб турадиган сарфиш қошларини чимириб, ичига кумуш қошиқча солиб қўйилган пиёлага авайлаб чой қуя бошлиди. — Фойдали-да бу.

— Ҳа, асал фойдали,— деб қўйди Ўрмонов хаёлчан.

Бу одам фойда-зарарни бунчалик кўп ўйлайди? Ҳамма нарсани шундай баҳолайди: бу фойдали, бу зарарли. Эртадан оқшомгача столининг усти банд: турли-туман қанд-қурс, мева-чева. Утиш-қайтишда бунга кўзи тушган директор ўринбосари мажлисда неча марта «Чойхонани бас қилайлик!», деб танбеҳ берган бўлди — Рихсиев парвосига келтирмади. Жон койитиб бир иш қилмайди, оқ-сариқ башараси доим тиниқ, ўзи соғлом әканига қарамай, нуқул келган-кетганга овқат танига

тузук ҳазм бўлмаётганидан нолийди, нима иссиқлик қилишию нима совуқлик қилишини гапириб ўтиради. Унга сари, умрида бу нарсаларни ўйлаб ҳам кўрмаган Ўрмоновнинг ғаши келади. Айниқса, унинг олдига бирор жойи оғриётганидан шикоят қилиб киравчиларни кўрса жони чиқади. Ўзининг айтишича, дераза ёнидан ўтса, шамоллаб қоладиган, шундан қўрқиб хонада ҳам телпагини бошидан қўймайдиган одам бошқаларга «фойдали маслаҳатлар» беради.

Ўрмонов хонага қайтиб киаркан, Рихсиев:

— Оқсаяпсизми, Туробжон? — деб сўради.

— Ҳа, оёқ бир оз... — деди Ўрмонов истар-истамас. — Совуқда қақшаб қолади.

— Ие, ие, чатоқ-ку, олдини олиш керак. — Рихсиев яйраб маслаҳат беришга тушди:— Қечаси қўй ёғидан суртиб ётинг. Силатсангиз ҳам тузук.— Бу гапни айтди-ю, лабини тишлади.

— Ҳеч исимайди, — деди Ўрмонов эшитмагандек. — Асадбан, дейишяпти.

— Сиз спакўйнийсиз-ку, Туробжон? Ё совуқ устихонингизга ўтиб кетганмикан? Тузукроқ пойабзал кийсангиз бўлмайдими?

Рихсиев тўғри айтади: тузукроқ пойабзал кийса бўлмайдими? Бироқ Ўрмонов кийим-бош ҳақида қайғуришни ортиқча ҳисоблайди, очиғи, бунга эринади. Ҳар гал қишида «Келаси йил қалинроқ кийим оламан», деб аҳд қиласди-ю, ёздан кейин бир кун қиш — ўзи юрак олдирган, безиллайдиган фасл келишини тезда унутиб қўяди, негадир «Бу йил унча совуқ бўлмаса керак», деб ўйлайди, ишонади. Оқибатда эса ҳар йили иссиқ кийимсиз қолиб, қишида дийдираб юради. Бу йил ҳам эгни гариф — ўша, неча йиллик пальтою пойабзал. Тузукрогини шу пайтда қаердан топасан? Эсли одам қиш ғамини ёзда ейди.

— Бундай қилинг: бир идишга иссиқ сув, биттасига совуқ сув олинг-да, оёғингизни бирпас унисига, бирпас

бунисига солиб ўтиринг. Кейин яхшилаб артиб, вазелин суртинг. Менинг айтганимни қилиб кўринг-чи, раҳмат дейсиз.

— Ҳозирдан раҳмат, — деди Ўрмонов илжайиб.

Иссиқ сув, совуқ сув қайда? Ўзининг уйи иссиқ бўлса керак-да, бемалол ўтириб олиб маслаҳат бераверади. Бу гапларни Ўрмонов неча марта газетадан ҳам ўқиган, аммо ҳафсала қилмаган.

Рихспев яна алланималарни тавсия эта бошлади — Ўрмонов қулоқ солмади, ўзи ва совуқ ҳақида ўйлаб кетди.

У азалдан совуқ деса безиллар, юрак олдириб қўйган эди. Болаликда ҳам кийимдан ёлчимаган, акасининг ғўлтиллаб қолган эски этигини кийиб юрар, пайтаваси ҳўл, оёғи музлаб, мактабдан доим йиғлаб қайтар эди. «Сени йўргакда буюқ урган, улим», деб куларди онаси. Айниқса, эрталаб туриб қор ёққанини кўрса, том курашни ўйлаб уни ғам босарди. Бундай вақтда кўпинча уйдан қочиб бувисиникига борарди. Бувиси майизу туршак билан меҳмон қилар, сўнг елкасини силаб, маталлар айтиб берар эди. У оёғини иссиққина сандалга тиқиб, пўстак устида мудраб қоларди. Тушига ёз киради, иссиқ-иссиқ ёз! Бошяланг, оёқяланг кўча чангитиб юрганиш...

Ўрмонов, мана энди ёши ўтиздан ўтибдики, ҳануз қаҷон совқотса, бувисини, бувисининг сандалини эслайди, ўшандан бошқа жойда исимайдигандек туюлади.

Унинг совуқдан бу қадар қўрқишига яна бир сабаб бор эди. Мактабда уларни мавсум пайти йигирма-ўтиз кунлаб қўшни паҳтакор районларга ёрдамга олиб кетишарди. Саккизинчи синфда ўқирди шекилли, ўша йили совуқ эрта тушиб, терим чўзилди. Ҳаммага норма белгиланган, кимки бажармаса, кечқурун ўқитувчилар иззамуҳокама қилишади. Уст-боши юпунлигиданми, у дарров шамоллаб қолди. Эрталабки изғиринда далага чиқишаркан, биқуни санчиб оғррир, эгатга эгилолмай қийна-

лар, лекин ҳеч кимга сездирмас, ўзи нимжонроқ, бунинг устига касалманд әканига қарамай, номус кучли, теримда тенгдошларидан ортда қолмасликка тиришар — кеч-қурун барчанинг олдида шарманда бўлишдан қўрқар эди. Улар орасида бир қиз ҳам бор эди-да... Шуни ўйлаб у касалу оғриқни унуганча жонини жабборга бериб тे-рарди. Охири чидолмади. Дала шийпонига ҳафтада бир марта дўхтири келарди. Навбатдаги келганида унинг ҳузурига кирди, арзини айтди. «Шишага иссиқ сув со-либ, кечаси биқинингизга қўйиб ётинг, — деб маслаҳат берди дўхтири. — Ҳечқиси йўқ, тузалиб кетади». Дўхтири-нинг олдидан чиққач, у шийпон теварагини айланиб ши-ша қидирди—бир-икки бўлак синигидан бошқа ҳеч нарса тополмади. Домлаларнинг хуфиёна ичиб туришларини биларди. «Ўқувчиларнинг тарбияси бузилмасин», деб шишиасини ҳам ғойиб қилишибди. Болалар бундан огоҳ, лекин тарбиялари бузилмас, кечқурун изза бўлмаслик учун жонларини жабборга бергудек ўлиб-тирилиб пахта теришар эди. Унинг ҳам тарбияси бузилмади-ю, аммо ўшандан белоғриқ орттириб олди. Шу-шу, сал шабадага буқчайиб қолади, қиши деса, совуқ деса танида титроқ туради.

Қиши айниқса бу йил каромат кўрсатди. Бошда кун-лар илиқ келди, ҳаво баҳорникига ўхшаб кетди. Ҳатто ариқлар лабида бултургига ёнма-ён тиниқ сабзалар ҳам кўкарди. Ёлчитувли қиши бўлмади-да, деб турилганида, айни чилла чиққан куни шундай қор уриб, шундай изги-рин бошландики, айтгулиги йўқ. Қор, аёз кечаю кундуз кўз очирмайди. Мана, икки ҳафтадан буён Үрмонов оёғи исиганини билмайди, гёё ичига бир парча муз кириб ол-ган-у, ҳеч эримайдиганга ўхшайди — муттасил совқота-ди.

— Э, етар-э, кетсак бўлар энди,— деди аллақачон кийиниб улгурган Рихсиев шерикларига қараб. — Ҳуку-матдан қарзимиз қолмагандир, жон ҳам керак.

Бугун нима иш қилди ўзи бу одам? Куни бўйи алла-

нималарни кавшаб, алланималарни вайсаб, ҳукуматдан қарзини узганмиш! Үрмонов ичида ғижиниб, столи устини йифиштира бошлади.

Антиқа бир томошага йифилган каби бекатда одам гавжум. Иссиққина хонада бамайлихотир ўтириб, дера-задан ногоҳ бу ердагиларга кўзи тушган киши негадир ўзини айбор сезади, уларга раҳми келади. Ҳаммаси ишдан қайтяпти, ҳаммасининг кўзи йўлда. Баъзи бир бесабрлар йўл ўртасига циқиб олиб автобус пойлашади. Барчанинг хаёлида бир ўй: «Нима бало, ҳайдовчилар ҳам совуқдан қўрқиб, уй-уйларига жўнаворишганми?» Юзлар қизарган, кўзлар ачишиб, ёш оқади. Йўловчиларнинг кўпчилиги аёллар. Эгниларида қалин-қалин пўстин, қўлларида қўша-қўша тўрхалта — бугун иш маҳали югуриб-елиб топган-тутган бозорлиқлари, ер тепиб туришибди. «Ҳар бирининг бошида биттадан тулки!», деб қўйди ичида Үрмонов. Дарвоқе, шундай қиёматда буларга нима зарур, эрларининг топиб келганига қаноат қилиб, худо деб уйда ўтиришмайдими? Тавба, одамлар кўра-била ўзларини чўқقا урадиган бўлиб кетишган, шундан завқ ҳам олишади. Мана, энди бориб қозон-товорқа уннашади, кейин — бола-чақа ташвиши. Тавба!

Үрмонов суюклари ҳам музлагандек, таниш оғриқдан афтини буриштирганча бекатнинг бир чеккасида қунишиб турарди. У ҳозир ёнидаги одамлардан тортиб дарахтлар шохидаги қушларгача ачинарди. Қишда, бундай совуқда яшагинг ҳам келмайди. Ким ўйлаб чиқарган экан ўзи совуқни? Нега шунча нарсага чора топган одамзод бунга келганда «Ҳа энди, қиши қишлигини қилади», дея қўл қовуштириб туради? Шимолий Қутбдаги, Сибирдаги бечораларнинг ҳоли не кечаркан?

Үрмоновнинг назарида ҳозир ҳамма — бутун дунё ўзи каби совқотаётгандек туюларди. Совуқ унинг учун енгиб бўлмас бир оғатга, душманга айланган эди. У айни чогда қайлардадир, иссиқ ўлкаларда авжи сара тон эканини, одамлар қиши қайғусидан фориг, ҳатто тер

га пишиб юрганларини биларди, албатта. Лекин ўшандек ёз бир кун бу ерга ҳам келишига негадир ишонмасди.

Нью-Йоркда қор босқини бўлганмиш. У ерда қанчадан-қанча одам бошпанасиз! Совуқ аёвсиз панжалари билан Ўрмоновнинг юрагини ғижимлагандек бўлди. У олис тоф қишлоғидаги уйини, ёзин-қишин юпун юрадиган укаларини эслади. Бир хонадагина тафт — печка бор, тирик жоң шу ерда ётади. Кечаси ҳар замонда кўмио ташлаб қўйиш керак. Кечаси, ҳамма тарракдек қотиб қолганда ис чиқса... Унинг кўнглини ваҳима босди, ожизликдан бадани живиллаб кетди. Уларга доимо иссиқ пайпоқ юбораман, деб ҳафсала қилмаслигини ўйлади ўзига ғазабдан вужудини мадор тарқ этгандек бўлди. Қасалманд онаси кўз олдига келди: «Мени ўйлама, болам, ҳеч бало қилмайди, туриб-эмаклаб юравераман.Faқат қорақсоқ қурғур пича...»

Демак, ҳамма, бутун дунё совқотмоқда! Совуққа қарши қўлидан ҳеч иш келмаслигини, ҳеч кимга нажот беролмаслигини ўйлаб, Ўрмонов барча учун баробар совқота бошлади...

У ўзи яшайдиган ҳовли дарвозасидан кирапкан, бурчакда, цемент устида кулала тушиб ётган кучук — Эльзага кўзи тушди. Бегона ҳидни сезған заҳоти чав-чавлаб ёпишадиган ит ҳозир тепиб ўтсанг ҳам қимир этмасди. Кўзлари қизарган, илтижоли боқади, туклари дир-дир учади. «Буям совқотяпти», деб куюнди Ўрмонов, уй эгаларини тошюракликда айблади. Faқат ўзларини ўйлашади: ҳеч ким билан ишлари-йўқ, ҳеч кимниги боришмайди, ҳеч кимни кутишмайди — иссиққина инларига биқиниб олиб ётишгани ётишган. Нима учун яшаяпти ўзи бу одамлар?!

Ўрмонов истиқомат қиладиган хона ҳўжайиннинг уйига рўбарў, шинамгина эди. Шинамгина эди-ю, лекин қишида одам боласини боғлаб қўйсанг турмасди—шундай совуқ!

Кўнглининг бир чеккаси эртага бўлажак зиёфат ма-роғидан ёришиб турган Ўрмонов уйга кирибоқ кишилик кийимларини ажратди-да, курси суюнчиғига илиб қўйди. У эртага зиёфатга боради. «Уйи иссиқ бўлса керак» — шу фикр яна хаёлидан кечди. Аммо зиёфат тугагач қайтиши кераклигини ўйлаб, уни ғам босди. «Сиз энди бир кеча ётиб кетинг», деб таклиф қилмасмикан? Йўқ, ноқулай — қайтади. Кечаси, қорда, совуқ, изфиринда — қайтади! Таксида келар. Дарвоқе, пули ҳисобли-ку? Онасиға юбориши керак, бу ёқда қизининг ҳам улуси бор. «Кўпроқ ичиб оламан, совуқ ўтмайди», деб мўлжал қилди.

Ўрмонов тезгина ечиниб тўшакка кирди — вужуди тарашадек қотган, ҳеч нарсага ҳуши йўқ эди. Йўлда олган газеталарини варақламоқчи бўлди-ю, тағин қаернидир қор босгани ҳақида хабар ўқиб қолишдан чўчиб, варақламади. Қўл радиосининг қулоғини буради, одами баттар жунжитадиган бир оҳанг эшитилди — қўшиқ ҳам сувқотяпти! — ўчириб қўйди.

Шу уйни куздаёқ иситиши чорасини кўрса бўларди: печка-мечка қўйиб, тешик-туйнугини бекитиб. «Ўзим лапашангман-да», деб ўйлади Ўрмонов.

«Лапашанг!» Бу сўз унга жуда таниш эди. Бу сўзни у жуда кўп эшитарди. Ҳар куни!

Ҳозир бирор Ўрмоновга: «Уч йил бурун сенинг иссиқ-қина уйинг, хотининг, қизчанг бор эди», деса, сира-сира ишонмас, бу гапни худди тушида эшитаётгандек бўлар эди. Ҳа, ҳаммаси кимдир. Айтиб берган олис тушга ўхшайди!

Хотини, қизчаси, иссиққина уйи бўлса, у бу ерда ни-ма қилиб ётибди? Лапашанглиги учунми? Лапашанг — нима дегани?

Ўрмонов бир куни ана шу сўзни охириги марта эшитдию кийим-бошини чамадонга жойлаб уйдан чиқди. Иссиққина уйдан! Иссиққина уйда хотини қолди, қизчаси қолди. «Лапашанг» деган сўз ҳам қолди!

Ўша кеча ишхонасининг диванида тунади. Ширинсу-жан қоровул — Дўстмурод акага ич ёрган эди, у чой қу-йиб узатаркан: «Бир-икки вақт бўлак туриб кўринг-чи», деб маслаҳат берди. Эртаси Ўрмоновни уйига бошлаб борди; ҳовлиси кенг, тўрт тарафи ҳам йоморат экан — бир хонасини бўшатиб берди.

Дўстмурод ака яхши одам эди; унинг келин-кепчаги, бўйга етган қизлари бор эди. Ўрмонов эса ёш эди, лекин андишали эди. Тўртинчи куни у мана шу уйга кўчиб ўти. Бу ерни ҳам унинг қистов-илтимоси билан Дўстмурод ака гаплашиб берди. Уй эгалари уни қўшни сифатида ҳурмат қилишаркан, дарров рози бўла қолишди: Дўстмурод ака яхши одам эди-да.

«Бир-икки вақт бўлак туриш»ни ўйлаган Ўрмонов бу ерда муқим яшаб қолди: «лапашанг» деган сўз жонига теккан эди, «лапашанг»нинг ўзи эса бошқа бирорнинг жонига теккан экан. Хуллас, шу тариқа икки томон ҳам муродига етди. Аммо икки томон ҳам ҳануз нимадандир умидвор, ниманидир кутмоқда. «Лапашанг» яна «лапашанг» сўзини эшитишни (ми?!), бошқа бирор эса уни яна айтишни (ми?!). Аммо бўёғи синиб бўлган. Ўртада биргина ип қолган; «лапашанг» сўзини билмайдиган, тушунмайдиган биргина ип...

Кўрпадан ғўриллаб совуқ киради, Ўрмонов ғужанак бўлиб олди. «Эльза музлаб қолгандир», деб ўйлади ва яна тошюрак уй эгаларини сўқди. Кейин... ўйлари ўйлини йўқотди.

... Чет-чеккаларига хаёл етмайдиган бийдек дала. Ўртасида бир қора кўринади. Муштдеккина бир жон. Етти-саккиз ёшлардаги бола. Теварак-атрофда кўз илғайдиган бошқа нарса йўқ. Ҳаммаёқ оппоқ қор, ҳаммаёқ: осмон ҳам, замин ҳам оппоқ, оппоқ қор, қор... Ўртада муштдеккина бир жон. Уст-боши юпун, оёғи юпун. Юзкўзи совуқдан кўкариб кетган, йиғлашга ҳам мадори қолмаган. Аъзойи бадани музлаб, совуқ энди кор қилмай қўйган — гавдаси тараşa, муз қотган тарашага ўхшай-

ди. Муштдеккина бир жон. Жон! У энди ҳеч нарсани ўйламайди, ҳеч нарсадан қўрқмайди: совуқдан ҳам, атрофда изғиб юрган оч бўрилардан ҳам — ихтиёрини но-маълум бир кучга топширган. Бўлгани бўлар энди. Отаси тоққа — қўйлардан хабар олишга кетганда онаси, ўгай онаси уни уйдан ҳайдаб юборди. Нега, нима учун? Ким билсин! Ҳайдаб юборган, тамом! Ўгай она-да! Ота эса тоғда... Теварак-атроф оппоқ-оппоқ, қор, қор... Сову-уқ! Чиллада мастиққан бўрилар ўлжа қидириб изғишиади. Улар ҳозир бу ерга ҳам келиб қолишади. Майли, келишса келаверишсин! Унга бари бир. Ана, увиллашлари ҳам эшитилиб қолди. Энди нима бўлади? Увв-в...

Ўрмонов танглайигача музлаб кетди: «Энди нима бўлади?» Бу хаёлдан чалғиши учун эртанги зиёфат ҳақида ўйлай бошлади — исимади. Бувисининг сандалини эслади... Оёғи, беллари сандалда. Хонада майиз, туршак, олмақоқи ҳиди. Бувиси матал айтиб бермоқда. Қизиқ-қизиқ металлар. У илиқ сувга ўнғиб бораётгандек. Тушида ёз эмиш, иссиқ-иссиқ ёз! Бошяланг, оёқяланг кўча чангитиб юрганмиш...

* * *

Эртаси яна хонада бугун бўлажак зиёфат ҳақида гап кетди.

— Ҳамидулланинг ўзи кўринмаяпти? — деди Рихсиев ташвишланиб.

— Бозор қилгани кетгандир-да, — деди Турғунбой.

— Олма, анор дегандай, а? — Рихсиев мириқиб ҳи-ринглади. — Ҳозир қиммат, ҳамма нарса қиммат.

«Олма, анор егиси келяпти, — деб ғашланди Ўрмонов.— Фойдали-да».

Тушликка ёлғиз чиққан Ўрмонов ўз-ўзидан димоги чоғ бўлиб қайтди. Эгнидаги кийим-бошни кўздан кечириб қаноатланиб қўйди. Зиёфатга башанг бўлиб бориш керак-да — ўзинг ҳам яйраб ўтирасан, сенга қараб атро-фингдагиларнинг ҳам баҳр-дили очилади:

· Бугун бекатларда одам сийрак. Ҳайдовчилар уй-уй-ларидан чиқиб, тирикчилик ташвишига тушиб қолишганми, автобус тез-тез келиб турибди. Ҳаммада алла-қандай бир жонланиш, бугун зиёфатга отлангандек ҳамма хушнуд-хуррам.

Ишдан бирпасга рухсат сўраб, қизрасини кўриб келса бўларкан. Иёки ҳафта ўтиби — совуқ бошлангандан бери борган эмас. Соғинганини ҳис этди. Уни бундай башанг ҳолда кўриб севиниб кетса керак. Нима олиб борса экан? «Дада, менга у олиб келинг, бу олиб келинг». «Ҳаммасини ўша ўргатган, бўлмаса, муштдек бола пианинонинг фаҳмига борармиди?» Ҳўш, нима олиб боргани маъқул? «Совқотмаяпсанми, қизим?» «Йўқ, бу ер иссиқ». «Уйларинг-чи?» «Уйимиз ҳам иссиқ». Уйларинг... У хотини, қизраси билан ана шу иссиққина уйда яшамаётганига дафъатан ҳайрон бўлди. Нега қизини, ўз қизини боғчага бориб кўради, нега? Бошқаchorаси йўқми? «Лапашанг!» Лапашангликни ташлаш иложи йўқми? Иложи-ку бор, лекин... Үрмонов ўйланиб қолди. Кейинги уч йил мобайнида биринчи марта шундай жиддий ўйга толиши. Кўнглида нимадир милтиллагандек бўлди.

Үрмонов хона эшигига қўл чўзаркан, лабидаги сигаретни икки қадам наридаги пақирга ташлаши кераклиги эсига тушиб тўхтади. Охирги марта ҳузур қилиб симириди. Шунда ногоҳ ичкаридан қулоғига чалинган гап уни турган жойига михлаб қўйди.

— Энди, ҳар ҳолда, аёллар бўлади. Соғлом коллектив. Орада битта сўққабош... тўғри келмас-ов, айтмаганимиз маъқулми, дейман-да? Утириш совуқроқ ўтадими...

Үрмонов овоз эгасини таниди — Ҳамидулла! Овоз эшикка яқинлаша бошлади:

— Турғунбой, Азиҳаҳонни албатта, а! Сиз ҳам, Рихсиев ака, кеннойимни олиб, подручка қили-иб келинглар, хўпми? Янги уйда бир ўтиришайлик!

Үрмонов шошиб-гангиб эшикдан узоқлашди. Сигаре-

тини чуқур бир тортиб, пақирга ташлади. Ичини муздек тиф тилиб ўтган, сўнг ўша жароҳат алланечук лаззат баҳш этиб бутун вужудига тараалаётгандек эди.

Ўрмонов ғалати ҳадик ичиди эшикни тортдию Ҳамидуллага рӯбарӯ бўлди. Улар бир зум бир-бирларига тикилиб қолдилар. Ҳамидулла тошдек қотган эди. Ниҳоят, Ўрмонов шошиб ундан нигоҳини олиб қочди, ерга қаради. Уялди, уялиб кетди! Негадир. Нега? Кейин се-кин четланиб йўл берди. Бориб столига ўтирганида Рихсиев маъноли томоқ қириб қўйди. Бу ўзига тегишли эканини сезди. Тағин оҳиста жойидан турди, эшик **томон** қадам босди.

— Бодомдан олинг, Туробжон, — деди Рихсиев қандайдир ҳамдардона оҳангда.

— Бодом? — дея гарансиб сўради Ўрмонов.

— Ҳа, — деди Рихсиев сарғиш қошларини учириб. — Фойдали жуда.

Ўрмонов оғир бош буриб эшикка юрди. Елкаси оша ҳамхоналарининг нигоҳини туйди. Йўлак ёдоғига бориб, чўнтағидан сигарет чиқарди. Деразага боқди. Қуёш! Қуёш чарақлаб кетибди. Даражатлар шоҳидаги қор астаста юмшаб, ёш тўқяпти. Кечагина суякларни зирқиратгани аёз энди тушга айланган, ошкора жон бераётган эди. Сира-сира эримайдигандек туюлган музларни эритиб, илиқ ва жонсарак шамоллари билан, тантана ва ажиб шовқинлари билан баҳор кириб келмоқда!

«Баҳор келди, энди маза», деб ўйлади Ўрмонов. «Баҳор келди, энди маза», деб ўйлади-ю, ичига эримайдиган бир парча муз кирган каби вужуди қалтирай бошлади.

Нью-Йоркда қорлар камайиб, бошпанасиз ғариблар чехрасига ҳам заиф табассум қўнган...

Олис тоф қишлоғидаги, келбати Ўрмоновга жуда-жуда ўхшишиб кетадиган болакайлар, юзларида қувонч, адирма-адир чопқиллаб бойчечак излаб юришибди...

Бепоён даштдаги қорликда ёлғиз қолган болани

тоғдан қайтган отаси чакмонига ўраб уйга олиб келган; у ҳозир иссиққина печка ёнида туршак шимганча онаси-нинг койишларини эшитиб ётиби — онаси асло ўгай эмас, отаси той олиб бермагани учун ўзи аразлаб далага чиқиб кетган эди...

Хонада ҳам телпагини бостириб ўтирадиган Рихсиев деган одам ҳозир бу ортиқча юқдан безор, аллақачон ечиб қўйган...

Унинг ёнидаги Турғунбой исмли хомсемиз йигит рўмолчаси билан дам-бадам бағбақасининг терини артади...

Кечагина совуқдан ажалини кутиб ётган Эльза ла-қабли кучук бугунги офтобда жонланиб, эринчоқлик билан думини ликиллатиб юрибди...

Улкан бир шаҳардаги улкан бир бино деразаси олдида турган бир одамнингина елкалари қалт-қалт тит-райди.

У совқотаётибдими?

Бу йил совуқ бўлмайди!

1978

ЖИЯН

Ҳамма ҳам бир-бирини танийвермайдиган, таниганда ҳам кўпинча тўхтаб бафуржа саломлашавермайдиган шаҳар жойда, каттакон шаҳарда тасодифан собиқ ҳам-қишлоғингни учратиб қолдинг, дейлик...

— Э-э, Ҳакимбоймисиз? (Мисол учун-да) Уста аканнинг тўнғичи? (У гарданини қашиганча бош ирғаб тасдиқлайди. Ана, энди бемалол хотираға берилавер!) Буни қаранг, биз қишлоқдан чиққанда ёшгина йигитча эдингиз — ўсибсиз, бўйингиз ҳам чўзилибди, баракалла! Ҳаммамиз ҳам улғайиб боряпмиз, оғайни. (Уҳ тортиб.) Умр дегани ўтиб кетаверар экан-да. Қишлоқни зиёрат қилиб келмаганимизга ҳам кўп бўлди. Уй-рўзгор, тириклиқ ташвиши денг, ука, ҳадеганда қўл тегмас экан. Оббо, Ҳакимбой-е, азамат йигит бўлиб қолибсиз-а? (Гап топилмаганидан унинг ёқаларини тузатиб қўясан.) Әй-й, яш-шанг! Бобой тетикми? (Хайрият, топилди!) Ҳалиям эски жойларида ми — устахонада: эшик, дераза?.. Ҳа, ишқилиб, омон бўлсинлар. Қайси йили борганимда чойхонада бирга ўтириб қолдик денг. Ажойиб одам-да, отангиз, кулдиравериб ичакни узганлар ўшандада. (У отасининг ажойиблигини билади шекилли, мамнун илжайиб

қўяди.) Ҳа-а, қишлоқ қалай? (Астойдил қизиқувчанлик билан.) Ободми, ўзгаришлар кўидир? Янги кинотеатр қурилади, дейишаётувди? Наби олифта ҳозир ҳам ўша ерда ишлайдими? Жуда аломат йигит-да. (Тагин кимлар бор эди?) Асад шопир-чи, юрибдими? Бирга ўқнганмиз. (Ҳа, болаликда уриб бурнингни қонатган эди.) Кўришиб турмасанг узоқлашиб кетаркансан. (Шунаقا эканми? Яна уриб қолишидан қўрқандек бормайсан-ку ўзинг, келиб кўрсинми сени?) На илож, ризқ-насиба деганларидай, биз ҳам юрибмиз бу ёқларда. (Серғалва салтанат фаромушлигига Улугбек кўздан қочирган юлдузни топаман, деб!) Хўш, гапирнинг-чи, қайси шамол учирди? Томоша, денг? (Малака оширишга эмас экан.) Ҳе, яшанг. Қани, йўғасам кетдик бизникига. (Музхонада анов савилдан қолганмиди?) Бу кеча би-ир отамлашиб.. Нима? («Бошқа гал борармиз», дейди у таомилига. Кўна кўрма, қишлоққа бориб гап қилиши мумкин!) Э, юринг, унақаси йўқ. Ушандоқ жойдан келиб бизникига кирмай кетасизми? Уят бўлади, иним, юринг...»

Мабодо, ҳамма ҳам бир-бирини танийвермайдиган, танигандан ҳам кўпинча тўхтаб бафуржা саломлашавермайдиган шаҳар жойда, каттакон шаҳарда тасодифан собиқ ҳамқишлоғингни учратиб қолсанг, нима қилардинг?..

Аспирант Даврон Бўронов кечқурун институтдан уйга қайтмоқда эдн. Автобусда одам тирбанд, чиқиш ҳам, тушиш ҳам бир неча тугмадан ажralиш деган гап. Юзқўллардаги тер йигилса, бир жом бемалол тўлади. Бўронов автобусга биринчи бекат — «ҳалқа»дан чиққани учун эмин-эркин ўтириб келар, ўз ўй-режаларига банд, шовқин-сурону итар-итар билан иши йўқ эди.

У йўл-йўлакай илмий раҳбари Азим Саодатовичнинг бугунги сертаҳдид ўғитларини мулҳаза қилиб борарди: «Шөшилмоғингиз лозим, Давронжон. Ҳал қилувчи муҳокама бурнингизнинг тагида. Қўшимча боб ҳақида

ўйланг. Бутун фикру зикрингиз шунга қаратилиши керак. Қелгуси ҳафта тайёр бўлсин, кўраман. Сал бўшашингиз — ановилар навбатингизни илиб кетишади. Файбуллаевни биласиз: шогирдларига қаттиққўл, менга ўхшаш кўнгилчан эмас. Демоқчиманки, вақтинча ҳар қанақа ошна-офайнигарчилигу майда-чуйданинг баҳридан ўтиб туринг. Айниқса шу кунларда ҳар бир дақиқа сиз учун ғанимат...»

Бўронов уйга борибоқ муздек душга тушади-да, мoshхўрдадан ҳам кечиб, домласи иштирокида тахминий режаси тузиб чиқилган қўшимча бобнинг хомакисига киришади. Қизчасини эркалатишга ҳам вақти йўқ. Қайни-сининг тўйига қилинажак тўёна юзасидан хотини билан неча кундан бери давом эттираётган музокарасига ҳам чек қўяди. Қўшимча боб, вассалом! Бошқа ҳар қандай масала ҳозирча тўхтаб турсин. Дарвоҷе, бу кеча телевизорда «Ака-ука Карамазовлар»нинг учинчи қисми бор эди-я? «Энг зўр серияси!», деб мақтаган эди Исмоил. Бу боланинг ҳамма нарсага улгуришига ҳайронсан — оламдаги жамики янгиликдан хабардор! Кинони ҳам кўради, футболдан ҳам қолмайди; илмий ишини муҳокамага қўйдиришда ҳам биринчи, домлага суробини келтириб хушомад қилишда ҳам... «Ака-ука Карамазовлар». Атта-анг! Қўшимча боб... Бу кеча албатта хомакиси тайёр бўлади. Ҳеч қандай гап-сўзисиз!

Қўшимча бобнинг хомакиси хомлигича қолди шу кечача...

Автобус дорихона қаршиисига келиб тўхтаганда Бўронов деразадан кўчага назар ташлади ва... ногаҳон бекатнинг бир чеккасида ғарибона мўлтираб турган қизчага кўзи тушди. Қизча эскигина чамадон кўтариб олган эди. Қўриниши ён-веридан ўтиб кетаётганларникidan фарқ қиласиди. Қўзларида ҳам ҳайрат, ҳам саросима, ҳам алланечук тараддуд. Афтидан, қаёққа боришни, қандай боришни билолмай ақли ҳайрон. Қиз бола...

Бўронов ҳозир шоша-пиша автобусдан чиқиб унинг

ёнига боради. Бориб сездирмайгина елиасига кафтини қўяди, қиз бехосдан сапчиб тушадй — нигоҳида ваҳима: «Ҳа!» Сўнг бир зум бақрайиб турадио «Тоғажон!», дея бағрига отилади. «Толиб олишингизни билувдим шундай, — дейди энтиқиб. — Борганимдан кўчада учратиб қолсам керак, деб ўйлаган эдим — айтганим чиқди. Уйингизни билмасдим-да, тоғажон...» Тоға-жиян бошлиб уйга борадилар. Шаҳарлик келинойи, «Вой, қизгина, келинг», деб хуш қарши олгандек кўринса-да, пинҳона чимирилишларидан «Энди нима қилдик? Отпускамиз бу йил ҳам ҳаром бўлади шекилли? Ташвиш устига ташвиш экан-да, қуриб кетсин», деган маъно очиқ-ошкор акс этиб туради. Дастурхон устида узундан-узоқ ҳол-аҳвол суриштириш таомили. Жияннинг-ку оғзи тинмайди: «Энам сизни, янгамни кўплан-кўп сўраб юбордилар, тоғажон. Жияннингни ўпиб қўй, дедилар. Отам ҳам. Қишлоққа бормай қолдиларингиз, тоғажон. Соғиндик, ҳаммамиз соғиндик. Ферузангизни шундай соғинган эдимики... Ке, бир ўпай, укажон... Тўғри тоғангниги боргин, дедилар энам, ётоқ-потоқ деб юрма, у ерда одам кўп бўлармиш, яхшироқ тайёрланиш қийинмиш. Тоғангнинг ўзи ёрдам беради, дедилар, келганида айтиб эди — борсин, ўзим жойлаштираман ўқишига, деб. Қайси ўқишига кирайин, тоғажон: дўхтирликками, артистликка?..» Сўнг шу тариқа қишлоқ, қариндош-уруфу етти пуштгача эслалиб кечаси алламаҳалга қадар ўтириб қоладилар. Эртасига тоға жиянини дўхтирликками ё артистликка жойлаштириш учун эргаштириб институтга жўнайди. Игна ташласанг ерга тушмайдиган тумонат — ҳужжат топшириш машмашаси... «Соғлиғи ҳақидаги справка чатоқ экан...», «Фалон дона учу тўрт ҳажмдаги сурат керак...», «Аттестатда жисмоний тарбия муаллимининг имзоси кўринмайди?..» «Энам, тоғанг ҳаммасини тўғрилаб беради, деб эдилар...» Тўс-тўполон, шовқин-сурон; қатор-қатор шахсий машиналару арзанда жиянчаларини эргаштирган серсавлат амакилар, тоғалар; ҳеч кимга

қарамасликка, ҳеч кимнинг гапини эшиитмасликка тиришиб у ёқдан-бу ёққа зипиллаб ўтадиган сирли, ташвишманд муаллим-домлалар... Ниҳоят, тоға бир ҳафта югуриб, не-не сарсонгарчиликлардан сўнг «ҳаммасини тўғрилайди» — ҳужжат топширилади! Энди жияни билан баб-баробар ўтириб имтиҳонларга тайёрланиши керак! Ундан кейин эса — юрак ҳовучлаганча имтиҳон бўлаётган хона деразасидан жиянининг (артистликка кириш учун) чарх уриб ўйинга тушаётганини ёки (дўхтириликка кириш учун) глюқоза билан фруктозанинг қуриб кетгур кимёвий хоссаларини чалкаштириб мулзамликда қолганини кузатиб туриш азоби! Бир пайт ранги бўзdek оқарган жияни чиқиб келади: «Ииқилдим, тоғажон, йиқилдим! Қишлоққа энди қайси юз билан бораман?» «Қўй, йиғлама,— деб жиянини юпатмоқчи бўлади-ю, имтиҳондан худди ўзи йиқилгандек юраги сиқилиб кетади.— Янаги йил келарсан. Мен ҳам биринчи йил йиқилган эдим. Кейинги йили кирдим. Қўй, йиғлама». Эртаси куни жиян йиғлаб-сиқтаб қишлоққа жўнайди, ҳўнгиллаб уйга кириб боради: «Тоғанг жойлаштириб қўяди, деб эдингиз — қараганлари ҳам йўқ. Ўзим яхши тайёрланолмадим. Хотини шуидай ялмоғизки, бир зум тиндирмади: «Косани ювинг, қизгина; тоғангизнинг шимиға дазмол босиб беринг, қизгина; Ферузани айлантириб келинг, қизгина...» Қизиям бир инжиқ, бир эркатой, елкамдан тушмади...» Ишком остидаги тахта каравотда ёнбошлаган кўйи кўкнорининг кайфини суриб ётган сөраарда почча мўйлови учини асабий ямлаб аммага зуғум бошлайди: «Мен сенга нима деган эдим? Айтганим келдими? Ву замонда амма-жиянчилик қоптими! Жияним-жияним, деб оғзингдан қўймайсан. Келганида ўтқазгани жой қидирасан. Ўтган йили меҳмонга чақириб, чори қўйимни сўйдирдинг. Мана, кўрдик қадрингизнинг неча пуллигини! «Жияним қизингизни дўхтириликка жойлаб қўяди!» Марсиниб юрганини қаранг аҳмоқ бўлиб! Жойлаб қўяди! Товуқкаллалар!..— У бир лаҳзача ҳовурдан тушиб,

яна давом этади: — Майли, қайтиб келгани ажаб бўлди, кўнглимдагидек бўлди. Самад аравакаш аскарликдан келяган ўғлига сўраттириб юрган эди — кўзни юмиб бериб юборганим бўлсин!» «Отажон, мен дўхтир бўлмоқчи эдим...» «Бўп кўрдингиз, қизим! Энди қолганини— дўхтирликниам, артистликниам борган жойингизда қиласиз. Гап тамом!» «Энажон!..» «Нима қилай, қизим, пешонанг экан. Мен тогангга ишониб отангдан зўрға руҳсат олиб берган эдим. Нима қилай, болам?», дея амма шўрлик кўз ёшини халтадек енгига артади. Почча кутилмагандек тағин тутаб кетади: «Эндиям ўшанинг номини тилингга олиб кўр, нима бўлар экан! Қизимни шарманда қилди. Мениям! Ҳе, унақанги жиянни!..»

Бўронов... тушмади! Аксига олиб автобус шу бекатда узоқроқ туриб қолди. Давроннинг юрагини алланима қаттиқ фижимларди. У юзини шартта деразадан бурди: «У эмас! Ўхшаркан, холос. Шунчаки ўхшаркан-да. Нима, одам одамга ўхшамайдими? Айниқса, ҳозир ёз палласи, ўқишига келганинг сон-саноғи йўқ. У эмас! У эмас!..» Тепасида терга пишган семиз бир аёл кўзини лўққайтириб туради. Ёшини пеш қилиб жойни эгалламоқчи. Бўронов бир азоб-изтироб билан бошини қуайи солди — ишқилиб, кўзи деразага тушмасин!

Автобус вазмин кучаниб жилди. Анчадан кейин бошини кўтарган Бўронов тепасида яна бояги аёлни кўрди. «Қандай сурбет йигитсан, қачондан бёри жой бўшатишингни кутиб турибман-у, парво ҳам қилмайсан-а? Аввал ерга қараб олдинг, энди бўлса икки кўзинг деразада: кўчадаги қизларни саралаб томоша қилиб кетяпсан. Ҳе, беодоб, бемурувват!..»

Бўронов ростдан ҳам деразага тикилиб бораради. Лекин ҳозир қизлар кўзига кўринмас — миёсида нуқул бир гап айланар эди: «У эмас! У эмас! У эмас!..»

Қайси бир бекатга етганда у безовталаниб ўрнидан қўзғалди-ю, тағин қандайдир куч елкасидан босиб ўтқазиб қўйди. Қўшимча боб... Азим Саодатовичнинг тезкор

нигоҳи, сертаҳдид ўгитлари... «Бутун фикру зикрингиз шунга қаратилиши керак!» Мұхокама навбати, ҳал қи-
лувчи дамлар... Файбуллаевнинг улдабурон шогирдла-
ри... Исмоил... «Ака-ука Қарамазовлар»нинг учинчи қис-
ми... Ўқишга келган жияну унинг ташвиш, машмашала-
ри... Йўқ, қўшимча боб, вассалом! Бў кеча хомакиси
тайёр бўлади. Ҳеч қандай «эҳтимол»сиз! У эмас эди.
Қўзига шундай кўрингандир-да. Ўхшаркан, холос. Ле-
кин жудаем ўхшарканми? Ўзи ўзига ўхшайди-да. Нима?
Йўқ-йўқ, у эмас эди! У эмас!

Бўронов уйга келиб, «дадда»лаб талпинган қизчасига
ҳам қарамай, апил-тапил бир пиёла чой ичди-да, хона-
сига кириб кетди.

У столда икки соатдан ортиқроқ ўтириди, аммо ҳеч иш
қилолмади. Олдидаги қофозга қўшимча бобнинг сарлав-
ҳасигина ёзилган эди...

Аммасининг чорбоғи жуда обод, сўлим-да. Ҳовуз
бўйидаги нашватининг тагида каттакон шоҳсупа бор,
шундоқ чўзилсанг қўлинг мевага тегади. Қечаси айниқ-
са гаштили бўладиган жой. Новдалар орасидан ой мўра-
лаб туради. Поччаси мўйловини бураб-бураб гурунг бе-
ради. Аммаси гирдикапалак: «Давронжон, ошга тузук
қарамадинг-да? Нима қилиб келай, тасаддуқ? Келин-
жон, олиб-олиб ўтиринг, айланай. Ферузажон, мана сен-
га олма, қип-қизилидан...»

У ҳар йили қишлоққа борганида биринчи бўлиб амма-
си меҳмонга чақиради. Ўзига ҳам бу жаннатмисол боғ,
сарҳовуз бўйидаги оромбахш кеча, қуюқ зиёфат, меҳри-
бон аммаю серзардароқ, лекин суҳбатижон почча
ёқарди. Бултурги ана шундай ўтиришда аммаси қизидан
гап очиб: «Тоғажони, Гулчеҳрангиз артист бўлмоқчи»,
деб қолди. Даврон поччасига саволомуз қараб кулим-
сираб қўйди. Поччаси мўйловини ямлаганча миқ этмай
ўтиради. Шаҳарлик келин хайриҳоҳ өҳангда: «Борсии-
лар. Етоқхона деб юрмайдилар, бизникида тураверади-
лар», деди қирмизи олмадан тишлаб. «Шугинани ўзла-

рингиз ўқитиб одам қиласизлар-да, айланай, сизларга топширидик». «Қўлдан келганича. А, пучук, ростдан артистликками?» Пойгакроқда Ферузани бағрига босганча чой қўйиб ўтирган жияни қизариниб ерга боқди: «Дўхтирикниям яҳши дейишяпти...»

Мана, энди у дўхтирикними, артистликними орзу қилиб шаҳарга келиди. Дарвоқе, бекатда нега бир ўзи эди? Дугоналари, ҳамроҳлари қани? Наҳотки, қишлоқдан ёлғиз келган? Бир чеккада ғарибона мўлтираб турибди. Қўлида эскигина чамадон. Қўриниши ён-веридан ўтиб кетаётгандарнидан фарқ қиласи. Қўзларида ҳам ҳайрат, ҳам саросима, ҳам алланечук тараддуд...

У каттакон, серғалва шаҳарнинг гавжум бекатида атрофга жонсарак аланглаганча одамлар орасидан тоғасини қидираётир, кўзи тўрт бўлиб тоғасини кутаётир. (Бу ерни қишлоғидек хаёл қиляпти, чамаси. «Эшматнинг чорбоғи қаерда, биродар?» «Анов теракзордан ўтсангиз, шундоқ қари тутнинг тагидаги дарвоза». Нодон қиз!) Шаҳарга биринчи келиши. Қайга боришини, кимдан сўраб боришини билмайди. Тоғаси ҳозиргина автобус деразасидан унга қараб-қараб, юзсизларча пинак бузмай ўтиб кетганини ҳам билмайди. Бу ер кат-та шаҳар эканини ҳам бил-май-ди. Қоронги тушиши билан ҳалигина ён-веридан беозор ўтиб турган айрим кимсалар айниб-ўзгариб қолиши мумкинлигини ҳам билмайди. Вилмайдики...

Бўроновнинг вужуди қизиб кетди: у ичида ўзи билан ўзи олишмоқда эди. «Аблаҳсан, бориб турган аблаб!» «Балки у эмасдир?» «Наҳотки, ўз жиянингни танимсанг? Қўзингга чипқон чиққанми?» «Вақт зиқ, вақт. Ахир, бунақа вазиятда...» «Қўйсанг-чи! Бекорчиликдан кун бўйи шахмат суриб ўтирасан, бу вақт эмасми? Қўшимча боб сен учун нима деган гап? Икки кеча босим ўтирасанг, битирасан-қўясан. Домланинг қистовлари эса— одатдаги пўписа, шундай қилмаса чўзиб юришингни

билганидан. Жиянингни, ўз жигарингни кўра-била ичор аҳволда ташлаб, кўзингни чирт юмган кўйи ёнидан бе-орларча ўтдинг-кетдинг-а, номард? Бунинг учун нақадар паст бўлиш керак! Қуюқ зиёфатлар устида оғиз кўпиртириб берган ваъдаларинг эсингдан чиқдими? Лоақал, борганингда бошига кўтарадиган меҳрибон аммангни юз-хотир қил эди, нокас! Ҳай, ана, бир кечалик вақтинг кетса кетарди. Бир кечада осмон узилиб бошингга тушмас эди». «Эртаси-чи, эртаси? Уни институтма-институт етаклаб юришга кимнинг тоби бор?» «Барно ҳозир уйда-ку, отпускада-ку? Кун-уззукун телевизорга тикилганча эснаб ўтиради. Ҳужжат топширишда кўмаклашса кўмаклашибди-да. Ҳеч боқиси йўқ, бегона эмас — эрининг жияни, қайнингил ўрнида. Уйларига борганда олмани карсиллатиб ваъданни қуюқ қилган эди». «Тўғриси, ўқишга киролмай қолишидан қўрқдим». «Топган баҳонасини қаранг! Тавба, киролмаса нима, қиёмат-қойим бўлармиди? Бунинг сен ўйлаганчалик ваҳимали жойи йўқ. Эҳтимол, ўз кучи билан кириб қо-лар, мактабни яхши битирган, ёрдамингга муҳтож ҳам бўлмас. Мабодо, кириб қолса, хотинингнинг ваъдасига кўра, уйингда «кортиқча ташвиш» бўлишидан қочмадинг-микан!» «Йўқ-йўқ, бу нарса хаёлимга ҳам келган эмас. Фақат ишимни, муҳокамани ўйлаганимдан шундай қилдим. Ахир, шу кунларда шошилмасам, кейин...» «Кейин нима? Жарангдор унвондан, дабдабали базму зиёфатлардан, турли-туман сайру томошалардан бенасиб қолсан-да, а? Мана, гап нимада! «Якшанба куни хотинларни олиб шаҳардан ташқарида бир яйраб келайлик», деб машинали бойвачча оғайнинг Шермат билан аҳдлашиб қўйганингни ўйладинг. Тўғрими? Йишингни тезроқ битка-зиб, шанба куни навбатдаги ҳимоя зиёфатига улгуриши ни ўйладинг. Топдимми? Ҳа-а, ана шундай, бўғинингга тушаркан! Қолаверса, бу галги муҳокамадан кечиксанг, навбатдагиси бор эди. У эмас, бу эмас, пасткашлик қилдим, худбинлик қилдим; ўзимни ўйладим, ҳаловатим.

ни бузгим келмади, дегин! Аҳ, номард, аҳ, ярамас!»
«Бўлди! Бўлди!»

Бўронов жойидан шартта турди-да, пиджагини кифтига ўлиб эшикка отилди. Нариги хонада қизчасини тиззасига ўтқазганча телевизордаги ака-ука Қарамазовлар исёнига шўнғиб ўтирган хотинининг паришон-парокандада сўроғига жавоб ҳам қайтармади. Кўчадан такси тутиб, дорихона қаршисидаги бекатга жўнади. Йўл бўйи дераза орқали икки ёнга аланглаб кетди... Аллақачон тун салтанини бошланиб, одам сийраклашган, бекатда ҳам тунги чироқ шуъласида давра қурган тўрт-беш ширакайф ул-фатдан ўзга кимса кўринмас эди.

«Қаердадир шу атрофда медицина институтининг ётоқхонаси бор эди. Демак, поезддан тушгач, троллейбусда дорихонагача келгану бошқа тайин жойи йўқлигидан, сўраб-суриштириб ўша ёқقا кетган». Бўронов ана шу ўй-тахминда таксини орқага қайтараркан, янги уйга кўчиб, қишлоққа ҳали адрес юбормаганига афсусланди.

Ётоқхонага кираверишда носранг духоба дўппи, узун қамзул кийганчуваккина қоровул чол эски сарфиш диванда ёнбошлиганча мудраб ўтиради. Курси устидаги плиткада чой виқирлаб турибди. Бўронов қуюқ салом бериб мақсадини билдириди.

— Сиздақа тоғаларни яхши биламиз! — деб тўнғиллади чол кутилмагандага дағаллик билан.

— Тушунсангиз-чи, амаки...

— Тушунмаймиз! Бизни бўтга ҳукумат нима учун қўйган, а? Кечаси бир маҳалда келган сиздақа тоғаларни «тушуниб», эшик очиб бериш учунми, а? — У бехос тутақканча жойидан туриб кетди. — Қап-катта одам, уятни билинг!

— Бу нима деганингиз, амаки, оғзингизга қараб гапирсангиз-чи!

— Оғзимиз жойида. Давай-давай, жўнанг! — Чол Бўроновни кўкрагидан итариб эшик томон ҳайдай бош-

лади.— Бунақа найранглар эскирди энди. Сизни кирги-
зб, кейин гавғога қолиб ўтирадиган аҳмоқ йўқ. Худё-
си келсаям қўймайман, билдингизми?! Вазифамиз шу!

Бўронов тисланиб бурилаётган эди, эшикда рўбарў
бўлган пахмоқ сочли новча йигит ёнидан секин шипшиб
ўтди:

— Қўлига бирор нима қистирвормайсизми, ака!

Бунақа «усул»ларни ор биладиган Даврон жаҳл би-
лан қўл силтаб, эшикни қарсиллатганча ётоқхонадан
чиқди.

Бекат ортиқ шарпасиз, фақат чеккароқда тагига ча-
мадон қўйган муштдек бир жусса энкайган кўйи тизза-
сига ияқ тираб ўтирап эди. Бўронов унга яқинлашиб
разм солди. Бола қўрқа-писа салом берди-ю, жойидан
қўзралмади, жавдираб турган кўзларини йўлга тикди.

— Нима қилиб ўтирибсан бу ерда?

Бола бир сапчиб тушди, сўнг дарров ўзини ўнглаб
жавоб берди:

— Ўзимиз... — Бўроновга ер остидан бир сидра на-
зар югуртиб, хийла дадилланди:— Поезддан тушиб ке-
либ эдик. Қоровул бобо жой йўқ, эртага кел, деди.

— Энди қаерга бормоқчисан? — деб сўради Бўронов
юраги алланечук увишиб.

— Акамизнинг уйига.

— Шеригинг қани?

— Қанақа шерик?

— «Биз» деяпсан?

— Ўзимиз... ўзимни айтяпман-да.

Бўронов кулди, қўшилиб бола ҳам жилмайиб қўйди.

— Акангнинг уйини биласанми?

— Биламиз. Чилонзорда.

— Чилонзорнинг қаерида? У катта жой-ку?

— Топамиз-да,— деб ночоргина илжайди бола —
овоизига ҳазинлик аралашган эди. — Чилонзорда. Олдида;
ка-атта боғи бор...

— Илгари ҳам келган экансан-да?

— Қелганимиз-ку йўқ, борганида акамизнинг ўзи шундай деб айтиб эди.

Бу гапни эшитган ҳар қандай одам албатта кулиб юборган бўларди — Бўронов кулмади, иягини силаб сўроғида давом этди:

— Нима, ёнингда адреси йўқми?

— Бор эди...— Бола бирдан маъюсланди.— Бор эди, уйда киссага солган эдик. Поезддан тушнб қарасак — йўқ...

— Ҳмм, энди қандай бораркансан у ерга? — дея ўйланиб қолди Бўронов: «Полвон даҳанроқ кўрингани билан ландовур экан».

— Ана, автобус кўп,—деди бола бекатга яқинлашаётган автобусга ишора қилиб.

— Шуларнинг ҳаммаси Чилонзорга боради, деб ўйлайсанми?— Ўз саволидан Бўроновнинг кулгиси келди.

— Қаёққа боради йўғасам?

«Оббо, дунёнинг қайси чеккасидан ошиб келган бу?»

— Аканг қаерда ишлайди?

— Маданият институтида, — деди бола ва дадил, фахр билан илова қилди: — Дарс беради!

— Нега ўқишига ўша институтга бора қолмадинг? Аканг ишлар экан, ҳар ҳолда... — Бўронов бу гапни айтишига айтди-ю, ичida ўзидан ғижинийб, уялнб кетди.

— Хирургликка қизиқамиз-да, ака.

— Шунақа де? Яхши-и... — Бўронов унинг елкасига қўлини қўйди:

— Бўлмаса гап бундай, ўртоқ бўлажак хирург: бу кеча бизникига бориб ётасан. Эртага биргалашиб акангни топамиз. Бўптими?

Беъла миқ этмади, қўзини яна йўлга тикиб олди. У ҳамон чамадонидан қимирламай ўтиради. Унга қараб Даврон шаҳарга илк бор мана шундай келганини хотирлади. Йўлга чиқаётганида онаси насиҳат қилиб: «Шаҳарда эҳтиёт бўлмасанг, кўзингнинг сурмасини ҳам уриб

кетишиади», деб уқтирган эди. Ўшанды ҳамқишлоғининг олдига — Студентлар шаҳарчаспга етгунча такси ҳайдовчидан кўз узмай борган: «Бирон ёққа опқочиб кетмасин тағин». Пули костюмининг астарига қўшиб маҳкам чатилган, чамадонида уч-тўрт кийим-бош ва дарсликлири бор эди.

Бўронов ичида кулиб қўйди: «Бу ҳам ўшанақа панднасиҳатлардан хийлагинасипи қулогига қуйиб олган кўринади, ортиқча қистаб ўтириш бефойда».

У ўйлай-ўйлай охири болани бирон-бир йўл билан ётоқхонада қолдиришга қарор қилди. Бола ҳам бунга кўнди.

Қоровул уларни кўриб дағдағага тушган эди, Бўронов бояги йигитнинг маслаҳатига амал қилиб, умрида биринчи марта хуфиёна пул қистириб юборди ва: «Жон амаки, бир кечада ётиб турсин, эртага акаси олиб кетади», дей ўтинди. Чол пулни олишга олди-ю, «Жойни қатдан топаман?», деб яна вайсай бошлади. Тағин ҳалиги талбиркор йигит ёрдамга келди. У нарироқда бўйи қоқ билдан келадиган, енгиз кўйлакли ушоққина бир қизни гапга тутиб турган экан, буни эшишиб:

— Қўйиб юборинг, бобой. Биз билан ётади, хонамизда жой бор, — деди.

Ётоқхонадан кўнгли бир ёқли бўлиб чиққан Бўронов дафъатан жиянини эслаб қолди, баҳонада суриштириб олмаганига афсус қилди. Қайтай деди-ю, анов дарғазаб чолга яна рўпара бўлишга юраги бетламади. «Балки бу ерда эмасдир,— деган гап келди калласига.— Театр институтига кетган бўлиши ҳам мумкин».

У бекатдан такси тутиб, театр институтига йўл олди.

Бўроновнинг муддаоснни эшиктган ётоқхона қоровули — эрмакка алланима тўқиб ўтирган, ёши ўтинқирағанроқ, кўринишдан бегам, лекин хушфөйл аёл:

— Бу ерда ҳаммасиabituriyent, жоним. Қайси бир хонани тақиллатиб чиқай шу маҳалда? Бунинг устига қиз бола экан, — деди кулиб.

— Оти Гулчехра,— деди Бўронов алланечук умидворлик билан.

— Бу ерда Гулчехрадан кўпи борми! Буларнинг бари гул чеҳра,— деб яна кулди аёл.— Эртага, кундуз куни келинг, жоним, институтдан топиб оларсиз.

Бўронов бўшашган кўйи ётоқхона эшигидан чиқди-ю, кетолмай тўхтаб қолди. Бош кўтариб, чироқлари порлаб турган қатор деразаларга заиф бпр илинжда кўз югуртира бошлади.

Лип-лип-лип... Ҳар хил қўринишлар, қадди-қомату афт-башаралар.. Лип-лип-лип... Турли-туман лиbosлар.. Қора, кўк, малласи — йигитларники; оқ, қизил, зангори, ҳаворанг, яшиллари — қизларники... Лип-лип-лип... Қизил кўйлаклилар орасида Гулчехралари ҳам бордир. Лекин қай бири — Гулчехра, унинг жияни? Қим билсич. «Буларнинг бари гул чеҳра». Лип-лип-лип...

Шу кеча Даврон Бўронов уйга алламаҳалда, ҳориб-чарчаб қайтди. Эшик қўнғирофини босаркан, қўшимча боб эсига тушиб, кўз олдида домласи Азим Саодатовичнинг сертаҳдид қиёфаси намоён бўлди: «Вақтинча ҳар қанақа ошна-оғайнигарчилигу майда-чуйданинг баҳридан ўтиб туринг. Айниқса шу кунларда ҳар бир дақиқа сиз учун ғанимат...»

Кейин қулоғи остида бояги боланинг ҳазин оҳангдаги гаплари эшитилиб кетди: «Чилонзорда. Олдида ка-атта боғи бор...»

1976

•••

С Е Н У Ч У Н Э Н Г З У Р О Д А М

Саттор Турсунов

...Бобо, дунёда сиз учун энг зўр одам ким эди?

...Ота, дунёда сиз учун энг зўр одам ким бўлди?

Сен, ўзинг учун-чи, эй ўша бобонинг ғевараси, ўша отанинг фарзанди?

— Адажон, адажон! — Акбар эшикдан кириши билан қизчаси унга қараб чопди. — Сув йўқ, сувимиз йўқ! Энди нима қиламиш?

— Нега сувимиз бўлмас экан, қизим? — деди Акбар унинг ваҳимасидан кулиб. — Жўмракларини бураб кўрдингми — ўнгини, чапини, кўки, қизилини?

— Бурадим, ҳаммасини бураб кўрдим. Опам ҳам бурадилар, дедушкам ҳам — бари бир келмаяпти, сув йўқ, — деди қизчаси кўзларини баттар ола-кула қилиб.

Ичкаридан — ошхона тарафдан хотинининг овози эшитилди:

— Дарров адасидан суюнчи олдими? Кепқола-ар. Бирон жойда «пробка» бўлгандир-да.

— Ана, эшитдингми? — деди Акбар қизчасига энгашиб. — Опанг айтяпти, демак, келади. Қелмаса, кейин кўрамиз, хўпми? Бор энди, ўйна. Қўғирчоғинг гапиряптими?

— Гапиряпти. «Нега сув келмаяпти?», дейди, йиғлайди. Сув ичгиси кепти-да.

— Шунақами? Овутгин-да, қизим, ҳозир сув келади, дегин.

Акбар қизчасини ўйинчоқлар бозорига ўхшаб ётган айвончага чиқариб, ўзи катта хонага кирди.

Хона тўрида, елкасида Акбарнинг чопони, чордана қурганча ғарамдек бўлиб бир киши ўтиради. Олдидаги хонтахтада бир тўп совға-салом: калиш, пайпоқ, рўмол — тўрхалтадан олиб, қирралари ейилиб кетган эскигина чамадонга жойламоқда. Акбарнинг саломига билди-пар-билинмас бош қимирлатиб қўйди.

— Укаларингга, — деди кейин ҳорғин товушда, бўшаган тўрхалтани ғижимлаб чамадонга соларкан.

— Ҳа?

— Сафаримиз қариди, мулла Акбар, эртага қайтмасам бўлмайди.

— Ие!

— Бўлмади-да.

— Бўлмади?

— Ҳа, шунча қилдим — бўлмади: — У айбдордек си-ниқина-илжайди.

Акбар отнускасида қишлоққа бориб, отасини тўшакла кўрди. Қулгиси келди, ҳа, отасини бетоб ҳолда кўриб, кулди! Тўшакда ётиш отасига ярашмасди. Отаси, унинг отаси — Амир полвон касал бўлиши мумкини? Йишонмади. «Туринг-э, бундай қилиб ётманг», деди. Отанинг эса у билан саломлашгулик ҳам ҳоли йўқ эди. Кейин, аҳвол жиддийлигини билгач, Акбар дўхтири олиб келгани район марказига жўнади.

Амир полвон касал! Ўғли бунга ишонмади. Нега ишонмади? Отаси — Амир полвон-да! У ўша полвоннинг ўғли, Амир полвоннинг!

Бу теварак-атрофда Раҳмон шпанадан чўчимайдиган, унинг номини эшитганда бир сесканиб тушмайдиган бола топилмасди. Қатталар ҳам ҳадиксираб, ён бериб муомала қиласидиган, қадамида жашжал қўзғаб, ўтган кўчасига

ФАВРО ёғдирадиган Раҳмон шпанадан. Тоғорадек қалпоқ-ни қошига бостирган, энсасидаги сочи патак, чап кўзини атай қисинқираб, тирсакдан буккан қўллари доим мушт, сал энкайған кўйи икки ёнга саланглаб юрадиган худобезори Раҳмон шпана! У текканга тегиб, тегмаганига кесак отадиган хилидан бўлиб, кинолардаги каллакесарлардан улги олган эди. Болалар ҳам қўрқибми (эҳтиромдан эмас, албатта), уни «Раҳмон Жага» деб аташарди. Қасофат гузардан тез-тез фойиб бўлиб, шаҳарда яшайдиган опасиникига кетар, у ёқдан турли нағмадаги кийим-бошу янги найранглар билан қайтар эди. Келган куни болалардан бож талаб қиласди; бирор уйидан ўғирлаб чиқсан антиқа чопқиси, бирор акаси аскарликдан тақиб қайтган энли камар, бирор шаҳарда ўқийдиган тоғаси совға қилган бежирим соатбоғ — хуллас, ҳар ким топгани билан уни сийлашга мажбур эди. Раҳмон келтирган назр-ниёзига қараб муридларига муруват қиласар, саркашларни эса сафга тизиб, шаҳардан ўрганиб қайтгап усууллари билан жазолар эди. У бамисоли гузар болаларининг худоси эди: истаса бор қиласди, истамаса — йўқ. Эҳ, ёмон зўм-зўравон эди Раҳмон шпана, болаларнинг худоси! Ундан биргина бандаси қўрқмасди—Акбар. «Худо» уни мудом саркашлар сафида кўрар, аммо миқ этолмас, фақат: «Ҳаҳ, Амир полвоннинг ўғлисанда, бўлмаса-ку...», дер эди алам билан муштини туғиб.

Амир полвоннинг ўғли... Акбар отасининг полвон бўлиб даврага тушганини кўрмаган, эслолмайди: Норбой амакисидан эшитган, холос. «Э-э, акамнинг полвонлик даврлари! — дея кечаги — беш-үн йил бурунги гап эмас, гўё бу яқин-атрофда бошқа одам хотирлаши мушкул бўлган бир замонлардаги нақлдек ўзгача мароқ билан таърифларди амакиси.— Амирқул майдонга чиқсанда давра нафас олмай қўярди. Ҳар чавкидан тўрт-беш зот мол айрмаса ҳисоб эмасди. Эҳ-хе, қаёқлардан талабгор бўлиб, бел боғлаб не-не номдор полвонлар келмади! Амирқул барисини бир қафасдаёқ кифтидан ошириб, бу-

тини осмондан келтирган. У ростакам жипслашиб борганда «Вуй, энажон, белим!», демаганий ўйқ эди. Ана кейин—морпеч дейсизми, туячил дейсизми, елкаотар дейсизми! Бундай қарасангиз — олам-жаҳон йўл босиб, не-не умидлар билан келган бечора талабгор ерда чалпак бўлиб ётиби. Давра гуриллаб кетган. Чори қўй кимники — Амир полвонники, «меҳмон келди» кимники — Амир полвонники! Баковул қур айланиб жар солган денг: «Ҳўкиз товоқни кўтарган Амир полвон даврага чиқади, талабгор борми-и?» Талабгор қаёқда? Чиқиб кўрсин-чи! Э-эй, акамнинг полвонлиги! Лекин ҳалол олишарди: ерни тавоғ қилиб, давранинг тўрт томонига таъзим билан, йиқитган одами — тирини жойидан турғазиб, «хафа бўлма», дегандай елкасига қоқиб. Ҳозир ҳам майдонга тушса, унча-мунчасининг белини синдиради-ёв, ҳа, денг. Ҳозир нима? Бари тираки, фирром-да. Э-эй, Амирқулнинг олишлари! Ана уларни ростакам олиш деса бўлади».

Унинг айтишича, Акбарнинг отаси полвонликни бирдан ташлаган. Йиқилиб эмас, ўйқ, яғрини ер кўрмай даврани тарқ этган. Бир чавки — курашда тузук-тузук полвон тирлари қолиб, ўзи усул ўргатган, майдонда ҳали жўртма — йўртоқи саналган Кенжадегани қўй товоқ — совринни кўтарган Амир полвонга талабгор бўлиб чиқади. Амир полвоннинг орияти қўзиб: «Келиб-келиб шу тирмизак билан олишаманми?», деганида, баковуллар: «Товоқ кўтаргансиз, полвон, иложингиз ўйқ энди. Расми шу», дея туриб оладилар. Ноилож қолгач, у полвонжомасини ҳам киймай ўртага тушади ва биринчи қўлдаёқ рақибини бўйи баробар кўтариб аста ерга қўяди-да, давра аҳлига қараб: «Қўй — Кенжадегани! Менинг олишганим шу бўлсин, омин, облоҳу акбар!», деганча қурдан чиқиб кетади, шу бўйи унга қайта кирмайди.

Ана ўша Амир полвон бугун тўшакда, касал! Ўша — «майдонга тушганида давра нафас олмай қўядиган», яғрини ер, боши ёстиқ кўрмаган, касалхона қаердалигини билмайдиган одам!

Акбар отасининг полвон бўлиб даврага тушганини эслолмагани каби бирор марта тоби қочиб кўрпа-ёстиқ қилганини, бирор нарсага дару ночор қолиб нолинганини ҳам кўрган эмас. Отаси ҳамиша бардам-бақувват, ҳар қандай мушкул вазиятдан йўл топа оладиган, улдабурон, сарбаланд одам эди.

Эсида, ўша кезлар отаси боғдорчилик бригадасига бошчилик қиласарди. Бир кечқурун — Акбар болохонада дарс тайёрлаб ўтирган эди — дарвозалари тагида машина тўхтаб, бир-икки марта сигнал берди. Деразадан қараган Акбар машина олдида она жамоатдан қариндошлари — совхоз директори Тангриқуловни кўрди.

— Ҳа, Аликбой (у Акбарни шундай атарди), как дела? — деди Тангриқулов. — Отанг уйдами? Бу ёққа чақир.

Отаси Тангриқулов билан дарвозахонада узоқ сўзлашиб турди. Уни негадир уйга таклиф ҳам қилмади. (Узи азалдан шундай: келган меҳмоннинг иззатини жойига қўяди-ю, аммо бошқалар сингари оғзидан бол томиб ширин-ширин мулозамат кўрсатишни билмайди — сўзга хасис, ортиқча илтифоту ҳавоий муомалага тоби йўқ.) Гап қандайдир олма ҳақида борар, отасининг овони баланд-баланд чиқмоқда эди. «Дараҳтда битмаган, бирон банданинг оғзи тегмаган нарса учун қофоз сўраб заводга чопадиган аҳмоқ йўқ!», дерди у бўғилиб. Тангриқулов эса анча вазмин гапирар, «план» сўзини кўп тақрорлар эди. Кейин бунга отасининг «кўзбўямачилик» деган луқмаси аралаши. Охирида Тангриқулов: «Бўлмаса, ўзингиздан кўринг, полвон!», дея машинасига ўтириди.

У кетгач, Акбар зинадан кўтарилаётган отасининг «Мараз!», деб тўнгиллаганини эшилди ва ўртада жиддий бир савдо ўтганини пайқади.

Тўрт кундан сўнг бунинг оқибати маълум бўлди:
— Тангри тентак отангни ишдан бўшатибди, — деди

онаси. — Энди нима қиласиз, болам? Нима еб, нима ичамиз?

Бу гапни у кечқурун дастурхон бошида ҳам такрорлаган эди, отаси, ишдан бўшатилган, лекин негадир одатдагидан кайфи чоғ отаси беписанд жавоб берди:

— Нима қиласдинг — ана, даштдаги танани келтириб сўясан, қовуриб хумга босасан, болаларинг билан маза қилиб еб ўтираверасан-да.

— Ҳай, уни бир ой ерсиз, икки ой ерсиз, кейинн-чи, чо-ол, кейин?

— Фам ема, кампир! — деди отаси шунда бир хум тиллани тутнинг тагига кўмиб қўйгандек кариллаб. — У ёғига худо пошиш!

Ўшанда отаси тўрт ой ишсиз юрган, лекин бир кимсага сир берган эмас — ўзини илгаригидан баланд олса олардики, паст тутмасди. Бекорчиликда рўзгорнинг камкўстини кўрди, ҳовли-жойнинг шикаст-рехтини тузатди, томорқага қаради. Уйда ҳамма нарса бадастур, олдинги дан тўқинроқ бўлиб қолди. Бу орада Тангриқулов уч марта йўқлади: икки карра одам юборди; бир дафта арzon нархда қўй жўнатиб мурувват қилди. Бироқ уч сафар ҳам отаси айтарини айтиб, келган одамни изига қайтарди.

Баҳорга чиқиб, у қўшни паҳтакор совхозга ишга кетди. Ўшандан бери паҳтада: аввал сувчилик қилди, кейин бригадир бўлди.

Шу-шу, Ақбар уйдаги бирор камчиликдан нолиб гапирса, онаси: «Шукур қил, болам, бошимизда йўқни йўндирадиган, борни бўрттирадиган отанг бор, ҳаммасини топиб келади», деб ўғит берарди.

Отанг, отанг... Отам, отам...

Ақбар отасини дардли бир меҳр билан яхши кўтар, шундай валломат одамнинг ўғли эканини ўйлаб ичидагууруланар эди-ю, аммо негадир унинг олдида ўзини доим алланечук айборми, ноқулайми сезарди. Қўшни болаларга ҳавас қиласди: улар оталари билан бетма-

бет ўтириб бемалол сұхбатлашар, әркин баҳслашар эдилар, ҳатто оталари улардан маслаҳат ҳам сўради. Амир полвоннинг эса меҳри қаттиқ — болаларини ҳадеб тиззасига ўтқазиб ялаб-юлқайвермас, «болам, бўтам», дега эркаллатавермас эди; нимагадир ишонганиданми, ачён-аҳёнда бир-бир тергаб қўйишини айтмаса, улар билан деярли иши бўлмасди.

Акбар Амир полвоннинг ўғли бўлиб улғайди. Амир полвоннинг ўғли бўлиб мактабни битирди, институтга отланди. Унинг ўқишга жўнаб кетганини Амир полвон хотинидан эшилди: пахтанинг бошида эди. Бенарволикда, тошмекрликда айблаган хотинига жавобан: «Э, киролса киргани, бўлмаса, яна яхши, апа, пахтага одам етишмай турибди», деди.

Акбар ўқишга жойлашиб келди. Шаҳар ҳақида, кириш имтиҳонларидан қандай ўтгани ҳақида отасига тўлиб-тошиб ганирди; баъзилар оталари, амакни тоғалари билан етаклашиб бориб ҳам киролмай қайтганиларини айтди. Отасидан мақтов эшитиши, унинг бағрига босиб ўпишини, «Баракалла, ўғлим, берган понимни оқладишиг, дўсту дўшман олдида, юзимни ерга қаратмадинг», дейишини кутди. Йўқ, Амир полвон бундай демади, гўё ўғли каттакон шаҳардан ўқишга жойлашиб эмас, бор-йўғи бир боғ ҳас кўтариб келгандек жўнгина қилиб: «Ҳай, кирибсан, тузук. Эди ўқи», дедиу пўстакка ёнбошлиб ухлаб қолди — дала кезиб чарчаган эди.

Акбар кейин — ўқиган йиллари ҳам унча мунича гап, унча-мунича ютуғи билан отасини ажаблантиrolмади. Отаси унинг ҳикоясини ибратли бир сўз билан кесиб қўяр, Акбар шунда мулзам бўлиб, ундан жаҳли чиқар, бироқ кўзига у янада ҳикматлироқ, улуғвор кўриниб кетар эди.

Акбар ўқишни битириб шаҳарда қолгач, отасининг унга муносабати бир оз ўзгарди. У энди «Мулла Акбар», деб муомала қиласидига, ўғлининг гурунгларига сал-пал қулоқ тутадиган бўлди. Лекин ҳамон уни багри-тўшига

«Латмас, бу багир-тўшнинг қатида ўзинг аталган нима борлиги Ақбар учун ҳали-ҳануз номаълум бир тилс им эди.

Мана, бугун отаси тўшакда, касал. Ақбар аввалига ишонмади. Қейин, аҳвол жиддийлигини билгач, район марказига бориб, врачлик қилаётган собиқ синфдоши Нормуродни бошлаб келди.

Нормурод беморни обдан текширгач, даҳлизда Ақбарга:

— Бобойнинг дарди жиддий, кечиктирмай касалхонага олиб бориш керак,— деди.— Буйрак билан ҳазиллашиб бўлмайди, вақтида олди олинмаса, заҳар қонга ўтиши мумкин. Заҳар қонга ўтса, кейин... бефойда.

Ақбар отаси ётган хонага кириб бу гапни етказган эди, Амир полвон:

— Э, бекорини айтибди! Бунинг учун балнисасида ялпайиб ётадиган тентак йўқ! — деди аччиқланиб.— Касал топилмаётган бўлса, ана, отасини олиб бориб ётқизсан — нима қиласини билмай, куни бўйи чойхонада гап сотиб ўтиради. Менинг ташвишимни қилмай қўя қолсан, икки кунда туриб кетаман. Кампир, қизиган бўлса, анови ғиштни опке...

— Бу ерда ётгани кўнмасалар, — деди даҳлизда кутуб турган Нормурод Ақбардан гапни эшишиб, — Тошкентга олиб кет. Ҳар ҳолда Тошкент — Тошкент, у ёқда имкониятлар бўлакча. Зўр бир клиникага йўлланмана ёзib бераман, жойлаштирасан. Э, дарвоҷе, бобойнинг анкеталари ҳам йўқ эди-ку? Ҳай, майли, бирорта кўчирмани ўзим тўғриларман. Сен фақат боришга кўндиранг бас.

— Шундай қилмасанг бўлмайди, улим, жўранг тўғри айтади, — деди даҳлизга чиққан онаси ҳам Ақбарга.— Отангни бу ерларнинг балнисасига ётқизаман, деб овора бўлма — илло-билло унамайди. «Тошкентни томоша қилиб келасиз», деб алдаб-сулдайсан-да, олиб кетасан

Аммо отасини «алдаб-сулдаш» қийин бўлди.

— Пахтани кимга ташлаб кетаман? Пахта нима бўй-

лади? — Амир полвон бирдан тутақканча тўшакдан яғринини кўтарди-ю, иҳраб яна жойига чўзилди, сўнг, энди хаста, шикаста товушда давом этди: — У ёқда тараллабедод қилиб, кейин бу ерда план деб оғзимдан қоним келсинми? Иўқ! Қампир, ги-ишт!..

— Бундай «гишт-ғишт»лаб жавраб ётгунча — боринг. Мана, улингиз олиб кетмоқчи, — деди онаси — Бўлмаса, бу ерда қолиб, қишин бўйи вой-войлаб одамни адойи жон қиласиз — боринг.

Акбар минг бир ҳадис келтириб, пахта усиз ҳам ҳеч нима бўлмаслигига, доимгидек бодроқ-бодроқ очила-веришига, план бу йил ҳам албатта тўлажагига, тўлмай иложи йўқлигига отасини зўрға ишонтириди. Амир полвон ниҳоят бўшашибина ройиш берганга ўхшади:

— Сенга дардисар бўламан, деб қўрқаман-да, мулла Акбар...

Амир полвон Тошкентда ўғлига дардисар бўлмади.

Биринчи кун ота-ўғил Нормурод ёзиб берган беморлик йўлланмасида кўрсатилган жойга бордилар. Қабул куни эмас экан. Эртаси ҳам Акбарнинг қўшилиб жўнаётганини кўриб отасининг жаҳли чиқди:

— Нима, мени йўлини топиб юролмайдиган бир ландовур хаёл қиласанми? Бор, ишингдан қолма, бу ёғини ўзимга қўйиб бер.

Бироқ Акбар уч кундан бери ишдан қайтиб, отасидан бир хил гапни эшитади — «Эртага келинг, деди».

Бугун эса...

— Бўлмади?

— Ҳа, шунча қилдим — бўлмади. У айбордек синиққина илжайди. Бу табассум унга ярашмасди.

— Ия, нега? — Акбар алланечук мунғайиб ўтирган отасига диққат билан тикилди. Елкалари чўккан, қовоқлари салқи, заҳил тортган чеҳрасида кўзлари сўник, ҳоргин боқади. Бобосини эслади.. Соқол етишмайди, холос.

«Отам қарибдилар, — деди ичида алам билан. — Қарибдилар. Отам, менинг отам-а? Амир полвон!»

«— Ҳўқиз товоқни кўтарган Амир полвон даврага чиқади! Талабгор борми?.. Амир полвон, Амир полвон...»

«Қачон? Қачон қариб улгурдилар?»

— Нега дарров менга телефон қилмадингиз?

— Э, билмадим, бари бир бўлмас эди. Узим шунча эландим... «Жой йўқ. Нима, ўзларингда балниса йўқми? Уша ёққа бориб ётинг», деди биттаси. Шунча эландим...

— Эландим?! Ялиндингизми ҳали?— Ичида нимадир қарсиллаб сингандек Акбар шавшаб кетди.

— Бўлмаса нима қиласай, улим?

Акбар отасининг юзига қайтиб қарай олмади, нимадандир қўрқди, «Иҳм», деди ва бурилиб, кийим алмаштириш баҳона, иш бўлмасига ўтди. Лекин ечинмади, курсига чўкиб, ёноқларини кафтлари орасига олди. Сигарет тутатди.

У шу чоққача — мана шу ёшга кириб, уйланиб, болачақали бўлиб, ҳали отасининг олдида қўлига қадаҳ тутмаган, чекса яшириб чекар эди.

Бу ёққа келаётгандаридан самолёт кечикиб, аэропортда бир оз кутишга тўғри келди. Ҳозир казо-казо бўлиб кетган собиқ синфдошлари марказдан келган кимнидир кузатишга чиқишиган экан. Нозикроқ меҳмон экан шекилли, қулай фурсатдан унумли фойдаланмоқчи бўлишди. Қўярда-қўймай Акбарни ҳам машинага ўтқазиб, аэропортга яқин бир сарҳовуз бўйндаги соя-салқин толзорга олиб боришди.

— Бир ташкилий қилиб юборинг, Холбой aka! — деди ёш, умидли казолардан бири.

— Ҳўп бўлади, хўжайин! — деди олди яғир желак кийған тетиккина қария ҳозиржавоблик билан. — Ҳаммасини есть қиласиз-да. Кўнгиллари қайсинисини тусайди: оқиними ё анов юлдузлисиними?

— Иккаласидан ҳам бўлаверсин.

Роҳстдан ҳам, мезбон оқ оралай бошлаган соқолини
селкиллатиб бир зумда «ҳаммасини есть қилди».

Акбар «Бобой бор, ноқулай», деб ичкиликдан бош
тортган эди, «Э, ёш бола эмассан-ку!», деб устидан кул-
ган бўлишиди, қистаб қўйишмади.

Аэропортга қайтгач, у отасининг кўзига кўзни тушиб,
бирдан сесканди, елкасидаги, болаликдан қолган таниш
хивич излари жизиллаб кетгандек бўлди.

... Ота, нега ўшанда тарсаки қўйиб юбормадингиз?
Хўй, болаликдагидек. Ахир, сиз хонага кирганингиздà
мен ухлаб ётган жойимдан сакраб туриб кетардим...

Болалигида бир гал Раҳмон шпанага қўшилиб чекка-
нини эшитган отаси хивич билан ўлгудек савалаган,
кейин олдига бир қути сигарет қўйиб, «Чекасан-чи чека-
сан!», деб маъжбур қилган эди.

... Ота, нега бугун энди индамайсиз? Ҳозир бу ерга
келасиз, шу ёшга кириб сизга бирон-бир нафи тегмаган,
зифирдак ҳам рўшнолик кўрсатолмаган ношуд ўғлин-
гизни оламшумул фуссага фарқ бўлгандек сигарет тута-
тиб ўтирган ҳолда кўрасиз. Кўрасиз, лекин индамайсиз,
и н да ёл м а й с и з . Нега?!

Бемалол чекавер! Хавотирланма, отанг бу ерга кир-
майди — у ҳаммасини билади, тушунади. Энди сен мус-
тақилсан, унинг кўмагига, бирон-бир мурувватига муҳ-
тож эмассан — мустақилсан. Мустақилсан-у, лекин
мудом кўнглингда, орқамда тоғим бор, деб юрасан, ҳа-
мон у сен учун дунёдаги энг зўр одам! Тоғ! Тоғдек сало-
батли, тоғдек сарбаланд, қудратли, тоғдек... Йироқ.
Йироқ! Ҳа, сен ҳеч маҳал унинг яқинига бормагансан,
бирон марта у билан ўтириб чин дилдан, одамлардек гу-
рунг қилмагансан. Бир сўз билан гапингни кесиб қўйиши-
дан қўрқармидинг? Еки уялармидинг? Отангдан-а, ўз
отангдан?! Балки унинг ҳам дилида сенга — тўнгич фар-
зандига аталган гаплари, ёрилмоқни ўйлаб юрган дардла-
ри бордир? Балки у ҳам сендан иймагандир, сендан кут-
гандир? Қимдан лозим эди? Отангданми?! Мана, энди у

қарибди, дардга чалиниб қолибди. Бугун яна касалхонага жойлашолмабди. Сенинг кўмагингга муҳтоҷ, «ўғлим», деб сени қора тортиб шундай жойдан келиб ўтирибди. Дарди оғир, тезда касалхонага ётиши керак. «Буйрак билан ҳазиллашиб бўлмайди, вақтида олди олинмаса, заҳар қонга ўтиши мумкин. Заҳар қонга ўтса, кейин... бефойда». Сен эса...

... Ота, отажон, сизники бир касалхонага жойлашти-ролмасам, даволатолмасам, мен бу ерда нима қилиб юрибман?! Бугун бўлмаса, эртага албатта жойлаштираман. Керак бўлса, бор таниш-билишимни, ёр-дўстларимни ишга соламан. Керак бўлса, эҳ-ҳэ... Ахир, сиз бизни—мени, укаларимни ўқитдингиз, одам қилдингиз. Ахир, сиз қирқ йилдан бери ишдан бошқа нарсани ўйламайсиз, қирқ йил бўладики, бирор марта одамлардек курортларга бориб дам олмадингиз, даволанмадингиз. Энди келиб—келиб бир дардга чалинганингизда ўша лаънати касалхонада сиз даволанмай ким даволанади? Улар сизнинг кимлигини и билишмаган, ишдан қочиб юрган бир дангаса деб ўйлашган. Ҳозир унақалар камми? Сизни албатта ётқизишади, даволашади. Ота, лекин менга нима учун ўша гапни айтдингиз — нега «Эландим», дедингиз? Нега эландингиз, ота, нега?!

— Адажон, адажон...

Акбарнинг хаёли бўлинди, кўзларида ёш, эшикдан мўралаб турган қизчасини кўрди.

— Ҳа, қизим, яна нима бўлди?

— Қўғирчоим гапирмаяпти. Сув ичгиси кепти, йифлайди, ҳеч гапирмайди...

Акбар бир лаҳза қизчасига тикилиб қолди ва меҳр билан, мана шу — жажжи ҳаётидаги дастлабки имкон-сизликдан кўзларида ёш гилтиллаб турган мана шу қизчанинг отасигагина хос бир меҳр билан сўради:

— Нега гапирмас экан? Юрчи бундай...

Қани, безабон қўғирчоқ энди гапирмай кўрсин-чи!

... Қизим, дунёда сен учун энг зўр одам ким?

ХОТИРА

Тушида

... Уйлари бошқа жойда эмиш. Қачонлардир бўлганими, бу ҳовли ҳам унга элас-элас таниш. Орқа тарафи тоққа туташ ўрмон. Гужум тагидаги шоҳсупадан қаралса, яхлит боғни эслатувчи лўппи дараҳтлару дўмпайган сарғиш ғарамлар аро паст-баланд қишлоқ уйлари, емирилган четан оша сомон янчиладиган тақир майдонча — хирмонжой, кейин толларга кўмилган ҳовузнинг ойна-деккина чеккаси кўринади.

Супада бир тўда хотин-халаж. Ҳайитдагидек ясанишган: қўлларида билагузук, бўйинларида шалдиршулдир зебигардон, кўзларида сурма. Ҳаммаси қариндошлари! Улар гужумнинг тубанги шоҳига илинган со-пол кўзадан галма-гал чинни косада сув ичишяпти. Кимдир, аммасими — холасими уни имлаб четга чақириди. Тандир олдида ширин кулимсираб:

— Тўйлар муборак! — деди. — Суюнчини чўз, суюнчини! Қейин айтаман...

У чўнтагини кавлаб ангишвона чиқарди.

— Бармоғи тешилмасин, дебсан-да, йўқ-йўқ, чанқо-

вуз бўлсин, чанқовуз! — Аммасими-холасими уялмай-
нетмай ёш боладек эркалик билан ер тепа бошлид.

Чап чўнтагини кавлаб чанқовуз олди.

Супадаги хотинлар гув этиб унга ёпирилишди.

— Менга... менга... менга...

Кимдир, тағин аммасими-холасими сирли шипшиди:

— Югуринг. Ҳовуз бўйида Ойдин сизга қараб туриб-
ди.

Югурай деса, оёқлари тепинар-у, жойидан жилмас
эмис. Орқасидан хотин-халаж шовқин-сурон кўтариб
қувар-у, лекин етолмас эмиш.

Ойдин...

Ҳушида

...Ойдин! Уша хаёлдек йироқ хотирадаги қизча. Кўз-
лари катта-катта, ҳайрат билан боқар эди. Қудрат нега-
дир. унинг кўзларинигина эслайди, қиёфаси ёдидан кў-
тирилган. Эҳ-ҳе, қачонлар эди...

Қамол иккаласи ҳар кун дарсдан кейин ўрмонга бо-
рарди. Фаффор түякашнинг якпахса деворидан иргиб ўт-
гач, қуюқ дарахтзорга шўнғишар, гоҳо бир-бирларини
қувиб, бир зумда кенг сайҳонлик биқинидан чиққанла-
рини сезмай қолишар эди.

Тоққа туташ ўрмон идораси шу ерда жойлашган.

Сайҳонлик бошида қатор кўркам бинолар оқариб ту-
пар, атроғида узун-узун ўриси дарахтлар бўй чўзган
эди. Қудрат бу ерда ўзини қишлоқларида эмас, қулоғи
оғриганда отаси билан борган шаҳардагидек ҳис этарди.

Майдондан эртаю кеч болаларнинг шовқин-сурони
аримасди. Оқшом, пода келар пайт бирининг уст-боши
тупроқ, бирининг бурни қонаган, бирининг боши ёрил-
ган, уйга қайтарди. Айниқса, майдон адогидаги теракдек
ўққа ўрнатилган айланма арғимчоқнинг талабгори кўп
эди. Ким баланд учарига баҳс ўйнашарди. Баҳслашган-

лардан нечаси йиқилиб, бу ерга яқинлашмай қўйган, зада эди.

Гараж биқинида чала вайрон «нолуторка» машинаси бўларди. Фидираклари олинган, кабинаси начоқ, чироқлари «кўр», қолган мурватларини Филай ташиб кетган.

Филай — сариқ тугмали, узун қора шинель кийиб юртгувчи, болалар мўйловидан қўрқадиган баджаҳл ўрмон қоровулининг ўғли. Кўзлари икки ёнга аланглаб туради: қаёққа қараётганини билиш маҳол. Ташландиқ машинанинг хўжайини шу. Отаси ўрмонга, Филай машинага қоровул.

У машинага ҳеч кимни йўлатмас, «Митъка, Витъкага айтаман», деб пўписа қилас эди.

Митъка, Витъка ўрмон хўжалиги директорининг ўғиллари эди. Ювош бу ака-укалар ўрмондаги ҳеч парсага даъвогарлик қилишмас, кун-уззукун қўлларида чўзма, дарахтзор ичида чумчуқ қидиришар эди. Филай ўшалардан чала-чулпа билиб олган икки-уч русча сўзини айтиб керилиб юради.

Тўсатдан Митъка, Витъкалар кўринмай қолдию Филайнинг авжи пасайди: машина чинакам ишқибозларини топди. Болалар Митъка, Витъкани сўрашган эди, «Ну, давно кўчуб кетган улар», деди Филай хомуш.

Машинадан айрилгач, у аргимчоққа хўжайнлик қила бошлади. Аргимчоқда ким ўзарга Кудрат ҳаммадан пешқадам эди. У бир куни Филай билан баҳс бойлашиб, ҳар галгидан баландроқ учди: бир зум чинорнинг тепа шохлари, дарахтлар узра сой, қишлоқ намоён бўлди. Шу пайт қўли сўқондан чиқиб кетдию мувозанат сақлолмай, ўртадаги заранг дўнгликка келиб урди. Пешонаси қонади, тирсаклари шилинди. Қараса, атрофида ҳамма: Филай, унинг соғ-у, лекин ўлгудек бижилдоқ синглиси, ўрмончининг бир-биридан фарқлаб бўлмайдиган уч қизчаси ва ҳатто Камол ҳам масхараомуз тиржайиб турибди. Аламидан негадир унга ёпишгиси келди. Аммо, бир четда... рангпар, кўзлари катта-катта, ёқим-

той нотаниш қиз турганин кўрди. Қиз кулмас, аксинча, боқишида ачинишми, ҳайратми бор эди. Қудрат тўйғус пешонасидағи қонни, жизиллаётган тирсакларию масхараомуз тиржайишларни унугиб, жойидан сапчиб қўзғалди-да, югурга кетди.

— Менга нима, ўзингдан бўлди-да, — деди орқасидан етиб келган Қамол. Қудрат индамади, хаёли бошқа ёқда эди.

— Анови қиз ким? — деб сўради.

— Қайси? Ҳа-а... турганми? Билмадим, биринчи кўришим.

Эртасига билағон Ғилайдан сўрашди.

— Да-а, уми? Янги директорнинг қизи, — деди Ғилай ва мақтаниб қўйди: — Ҳамсоямиз.

— Оти нима?

— Оти? Оти... айтмайман! — дея мугомбirona тиржайди Ғилай.

— Айтмайсан? Нима, отангди қизими у?! Ураман — ўласан!

Қўпчилик болалар қатори Ғилай ҳам Камолдан ҳайикарди. Охири айтди: оти Ойдин экан!

Қудрат аргимчоқдан зада бўлмади: яна баҳс бойлашиб, аввалидан баландроқ уча бошлади. Ўрмонга олдингидан серқатнов бўлиб қолди. Баъзан дарсдан ҳам қочиб келар, кечгача шу ерда айланиб юрар эди.

Ойдин гоҳо куни билан кўринмас, оқ биноларга қарайвериб Қудратнинг эси кетар эди.

Қиз дардчилроқ, ёзда ҳам мудом рўмол ўтар, иссиқ кийинар эди. Қудрат унинг ёзилиброқ ўйнаганини, қувнаброқ кулганини эслолмайди. Аҳён-аҳёнда бир кўринса, ўйинга ёлчитмай онаси чақириб оларди.

Чинор тагида супага ўхшаш текис майдонча бор эди. Ойдин шу ерда Ғилайнинг соғ-у, лекин ўлгудек бижилдоқ синглиси билан қуш мисол ҳаккалаб «мак-мак» ўйнарди. Аммо Қудрат чинорга яқинлашолмас, оқ имо-

ратлар тўмон ўтишга ҳам журъат қилолмас эди. У машинага кириб, ойнаси синиқ кабинадан Ойдинни кузатиб ўтирап, қиз қараб қолгудек бўлса, Филай суғуриб оло-маган чамбаракни у ён-бу ён айлантириб, бёқларини нималаргадир босганча «ғинг-ғинг»лашга тушар эди. Кейин аргимчоқقا ўтар, қиз нигоҳини туйган кўйи янада баландроқ учишга, болаларнинг олқишини олишга тиришар эди.

Қудрат қизнинг қаравшларидан ниманингдир белгисини излар, бироқ, беозор, андак ҳайратли нигоҳлардан ўзга нарсани кўрмас эди. Оқибатда Филайга ҳавас, ҳасад қиласиди: у Ойдин билан қўрқмасдан, бемалод гаплаша олади — қўшниси! Бу шарафга эришиш учун Қудрат баъзан филай бўлишга ҳам рози эди...

Ўрмонни қўмсаб, Камол иккаласи ёзда муддатидан анча илгари лагердан қайтишди. Қелибоқ шу ёққа югуришдн.

Куз нишона бериб, ерга шапалоқсимон чинор барглари тўшалган, аргимчоқлар жимиб қолган, ўрмон алланечук руҳсиз, зерикарли эди.

Ёлғиз тентираబ юрган Филайнин топиб, Ойдинни сўрашди.

— Ну, давно кўчиб кетишган,— деди Филай лоқайдина: чамаси, у энди нимага хўжайнлик қилишни билмай сиқилган эди.

— Қудрат ўрмонга қайтиб бормади. Ойдин аста-аста хаёлидан кўтарилиди. Қайси бир йили Камол уни қўшни районда кўрган экан. Гаплашибди. Ростми-ёлғонми, «Сени сўради», дейди. Аммо Қудрат муқаддас бир нимани бузиб қўядигандек, боришдан қўрқди.

Кейинроқ, улғайгач, у кўп чиройли кўзларни учратди. Лекин ўша кўзлар олдида булари... Ироқ хотирадаги, беозор ҳайрат билан боқувчи катта-катта кўзлар! Уларни узоқдан бўлсин бир кўриш Қудратнинг армони эди..

Т у ш и д а

... «Ховуз бўйида Ойдин сизга қараб турибди».
Ойдин!

Оёқлари ўз-ўзидан ҳаракатланди, у жон-жаҳди билан югурга кетди — хотин-халаж сурон кўтарганча ортда қолди. Дарвозахонадан чиқиб, муюлишдан бурилдию бурни тагида масхараомуз тиржайиб турган башарани кўрди: Филай! Ҳали ҳам бола эмиш. Бир кўрганида отаси каби мўйлов қўйиб, ўрмончининг саманини миниб юрган барзангি йигит эди...

— Ну да-а! — деди Филай ва қўққисдан ушинг юзига панжа тортиб юборди...

— Ойдин, Ойдин!..

Ҳ у ш и д а

... Чўчиб уйғониб кетди. Кўзини очди. Тер босгана, ёстиқ жиққа ҳўл. Чалқанча ётибди: тушнада алаҳсираётган экан-да.

Тўшакка тирсаклаб ягринини кўтарди. Қарахт, гарангсиб деразага боқди: олис-олисда кичрайиб ўрмон кўринди... Ана, тоққа ўрлаган кўм-кўк арчалар, уларнинг тумшуқсимон учлари... Сўнг бу манзара ҳайрат тўла бир нигоҳ билан алмашинди...

Деразадан тонг бўзариб келар, қўшни ҳовлидан узуқ-юлуқ уйқули товушлар эшитилар эди.

Кўрпани авайлаб олдинга сурди. Туриб тиззаларини қучди. Тушдаги кечинмаларининг ширинлигини, армони энди ушалай деганда уйғониб кетганини ўйлади, дардли хўрсинди. Назарида ҳушёрлик маъносиз, зерикарли туюлиб кетди: «Ҳаёт бу қадар жўн, мароқсиз», деб фикр қилди ўзича. Ҳаёлида яна ўша, унтулиб кетган хотиrlари жонланди: «Ғалати, нега тушимга кирди экан? Эсламаганимга кўп бўлди, кў-ўп. Туш — туш...»

Ёнига қаради, фира-ширада беозор нафас олаётган

кимса хотини эканини идрок этиб, дафъатан ҳайрол бўлди: уйланган, хотини бор... Ниманидир қидиргандек унга қизиқсениб тикилди. Тополмади: фира-шира қоронфи. Хотини... Ана у, чалқанча ётиб бир текис нафас оляпти. Дарвоқе, чалқанча ётса, алаҳсирайди, дейишади. Эҳтимол ҳозир хотини ҳам туш кўраётгандир? Балки у ҳам тушида....

Муздек бир нимадан титраб кетди. Қўрқиши ва рашкка ўхшаш бир ҳис дилини ларзага солди.

— Гули, Гули!... — деб жонҳолатда хотинини туртди.

Хотини қимиirlади, «Имм», дея эринибгина кўзини очди, оғриниб унга боқди:

— Ҳа-а?

— Туш кўрдингми, туш? — дея ҳовлиқиб сўради у.

— Туш? Қанақа туш?! Шунгами?.. Э, боринг-э! — Хотини ижирғаниб тескари ўғирилди-да, кўрпани бошига тортиб, ғужанак бўлиб олди. Бир оздан кейин бошини буриб сўради: — Нима қилиб ўтирибсиз? Ётинг. Кечаги ташвиш ўзи...

Кеча хотинининг бир тўда дугонаси келган эди. Антиқа латифалар айтиб уларни роса кулдирди. Кейин негадир қишлоғи, болалиги ҳақида гапиргиси келди-ю, гапирмади.

Меҳмонлар орасида Мастура дегани кўп шўх экан...

У яна бир замон шу тахлит қотиб ўтириди. Сўнг беихтиёр кўнгли ёришиб кетди. Бошини орқага ташлаб ширин эснади. Ўринга чўзилди-да, хотинининг кифтидаш қучди...

1973

ОЛАМ ЯМ-ЯШИЛ

У тушликка кеч чиққан эди — кеч қайтди. Үзи ўтирадиган хона эшигига энди қўл чўзганида лаҳимдек қоронги, узун йўлак адогидан бирор ҷақириб қолди. Бурилиб қарадио новча кишининг қорасини кўрди, лекин кимлигини ажратса олмади—тovушидан қўшни бўлимда ишлайдиган ҳамкасбига ўхшарди.

— Кўрдингизми? — деб сўради ҳамкасби қувноқ ҳайқириб.

- Нимани?
- Қимни, денг! Гўзални-да, гўзални?
- Қанақа гўзал?
- Оббо! Сизни бир жонон қидириб келган эди.
- Бошни қотирманг!
- Бошингизни қотиришга вақтим йўқ, биродар, боргапни айтяпман.
- Бўпти, хушхабарингиздан баҳтиёрман.

У хонага кириб столига яқинлашар-яқинлашмас, куни бўйин чурқ этиб оғиз очмайдиган, ҳис-ҳаяжондан йироқ, тўнкамижоз ҳамкасб-ҳамхонаси кутилмагандан тил чиқариб суюнчилади:

— Сизни бир қиз сўраб келувди, йўлда учратгандир-сиз?

— Қанака қиз экан? — деди у таажжуби ортиб!

— Үзүйгиз билишингиз керак. — Ҳамхонаси одатича ўмтанини столга ташлаб олди — дока тасмасидек тепакали кўринди. — Лекин яхши экан.

— Бўлди, бўлди,— деб у ҳазилга йўймоқчи эди, ҳамхонаси сузмоқчидек, бошини столдан вазмин кўтариб ўқрайди.

Шу пайт ички телефон жиринглади.

— Ўзингмисан, Дон Жуан? — дея хушчақчақ гап бошлади бирга ўқиган оғайниси. — Фариштаман, деб юриб чатоқ чиқдинг, сен бола! Умрим бино бўлиб бунақасини учратмаганман. «Бундай гўзал келмагай ҳеч дунёга!» У қадди-қомату ҳусни-мaloҳатни! Муомаланинг майинлигини айтинг. Хуллас, таърифга сўз ожиз. Афсоналардаги паризоднинг ўзгинаси-я! Дуэлга чақирмоқчи бўлиб ўтирибман сени. Вой писмиқ-эй, индамай юрганингда гап бор экан-да. Бирпас йўлларига нигорон бўлдию айтиб қўйишни тайинлаб, кейин кетди. Телефон номерингни бердим, кутгин, қўнфироқ қиласи. Вой писмиқ-эй? «Бошимга баҳт қуши қўнди», деявер. Омад тилайман, болакай!

Хонадан чиқиб, ниманидир аниқлаш учун — телефон орқали битириш мумкинлигини унугиби — иқтисод бўлимига бораётганида чойнак кўтарган, ўзини гайритабиий чақон тутадиган қоровул чолга дуч келди.

— Қуллуқ бўлсин! Бизники киши билмас экан-да, а, шоввоз? Ким эди у? — дея атай паст овозда сирли қилиб сўради қоровул.— Келин бўлмишми? Тузук, тузук. Тўйдан бехабар қолмайлик, акаси!

Қайтишида Бедана лақабли суюқ, ҳовлиқмароқ ҳамкасби ўйлини тўсди:

— Қойи-ил, қойи-ил! Аммо-лекин беш кетдим, оғани. Пешонасига юлдуз битган бола экансан. ВеЙ, кўриб ўлиб қолдим-а! Худо ҳақи, бунақаси битта бўлади. Ёрилиб кетмаганингга ҳайронман, вей!

У кечгача ҳеч иш қиломай кафтига ияк тираб теле-

фон кутди. Ниҳоят, иш куни тугашига яқин телефон жиринглади. Сапчиб трубкани оларкан, юрағи бутун гавдасини ларзага солгудек дук-дук уради.

— Сизмисиз? — деди кимдир дағал оҳангда. — Қараб ўтирамизми энди? Рўйхат тайёрми ўзи? Намунча дудуқ-ланасиз? Ҳа-ҳа, илан бўлимига. Тезроқ!

У ишдан кейин ҳазонли кўчаларда узоқ тентираబ юрди. Ўзи ҳақида ўйлади. Еши ўттизни қоралаб қолгани, аммо ҳанузгача бирон-бир қизга астойдил кўнгил қўёлмагани ҳақида ўйлади. Кўнгил қўймоқчи бўлганлари уни назарларига илмай кетишгани, оқибатда ишга муккадан берилиб, бошқасига қизиқиши сўнганию кўпдан буён бу масалада бош қотирмай келаётгани ҳақида ўйлади. Мулоҳазалари давомида бир ҳақиқатнинг тагига етгандек бўлди: шундай нарсани назардан қочирган эканки, усиз яшаш...

У бахт деганлари бир кун ўзи эшик қоқиб келишига ишониб яшарди. Мана, бугун у келди, ўз оёғи билан уни излаб, сўроқлаб келибди.

Унинг қизлардан деярли тапиши йўқ, шу чоққача бирортаси йўқлаб келмаган эди. Собиқ курсдошлари аллақачон бола-чақали бўлиб кетишган, қолган битта-яrimч эса таърифлаганларичалик эмас. Қизиқ, ким бўлди экан у? Ким?..

Эртанги учрашувни ўйлаганида кўнгли сув ичгандек ёқимли бўшашиб кетарди.

Эртаси у ҳар доимидек тушликка кеч чиқиб, кеч қайтаркан, учраган ҳамкасбининг оғзига ҳаяжон ичида кўз тутиб янгилик кутди; кун бўйи телефон олдидан жилмади. Индини ҳам, кейинги куни ҳам... Бироқ энди ҳамкаслари лом-мим дейишмас, телефон ҳам ортиқ жирингламас эди.

Неча кун шундай илҳақу паришон юрди. Ҳамкасларидан батафсилроқ сўрашга ийманар, кулги бўлишдан чўчир, сирни очишга эса ғурури йўл бермас эди. Шу тариқа жумбоқ жумбоқлигича қолаверди.

Аммо сирли қизнинг сирли ташрифи уни батамом ўзартириб қўйди. У энди кўча-кўйда, ғайриодат, қизларга ўзгача назар-эътибор билан қарай бошлади. Гўё улар орасида уни кўриб қоладигандек туюларди. Борз-бора умидини узди. Бир қизни учратди. Севганга ўхшади. Уйланадиган бўлди. Тўйга келган ҳамкаслари четга тортиб: «Ўшами?», деб сўраганларида мужмал кулимсираб қўя қолди.

У хотини билан тотув яшарди. Фақат гоҳида ундан ранжиса, кимлиги қоронги бўлиб, армон бўлыб қолган ўша қиз ёдига тушар, «у билан чинакам баҳтли бўлармидим», дея ўй суреб кетар эди.

У ўқтин-ўқтин, лекин доимо бир хил кўринишда тушига киради. Оҳиста елиб боришаётган эмиш. Иккаласи. У ва ўзи. Кўл ушлашиб. Оёқяланг. Шудринг босган ўтлоқдан. Қайгадир. Оҳиста елиб боришаётган эмиш. «Хе-эй!— деб қичқирамиш у.— Қаранг, олам ям-яшил! Сиз ҳам яшил, мен ҳам яшил. Осмон яшил, замин яшил, қуёш яшил, булатлар яшил, тоғлар яшил.., Олам ям-яшил! Хе-хе-эй!..» «Қани, мен кўрмаяпманку?», деса, «Кўзингизни юмид қаранг-да», дер эмиш...

Бир куни у одатдагидек тушликка кеч чиқиб, кеч қайтиди. Ўз-ўзидан ҳовлиқиб, кирган заҳоти ҳамхонасидан сўради:

— Мени ҳеч ким йўқлаб келмадимн?

— Келди,— деди ҳамхонаси столдан бош кўтармай совуққина. — Хотинингиз.

Хотинига қўнғироқ қилиш мақсадида трубкани кўтари-ю, тағин секингина жойига қўйди.

«Бугун ишхонамизга камёб моллар келармии. Япон зонти ҳам бўлса, пул учун олдингизга бораман».

«Демак, камёб моллар кепти. Демак, япон зонти ҳам бор...» Хийла муддат қўли ишга бормай, дилғаш бўлиб ўтириди.

— Эй,— дея сўз қотди бир маҳал бор журъатини

**тӯплаб ҳамхонасига. — Ушанда мени лақиллатганми-
динглар? Келгани ростмиди ўзи?**

— Кимни гапиряпсиз? Қачон?

У чайнала-чайнала эслатди, бироқ ҳамхонаси ҳар-
чанд ўйламасин, хотирлай олмади, столга энгашди --
дока тасмасидек тепакали кўриниб қолди. Тоқатни тоқ
қилгулик вақт ўтиб, тасма яна кўздан ғойиб бўлди — у
бошини кўтарди!

— Ёмон одатингиз бор-да, тушликка вақтида чиқиб,
вақтида келмайсиз.

У индамади, дераза орқали учи қизгиш япроқларга
тикилганча ёмон одати ҳақида пушаймон билан ўйларди.

«Қаранг, олам ям-яшил! Сиз ҳам яшил, мен ҳам
яшил... Кўзингизни юмиб қаранг-да...»

У кўзларини юмиб, кафтлари устига босди. Дийдаси
olandini жимир-жимир қилиб яшил парда қоплади. Бу
яшиллик секин-секин бошқа аъзоларига ҳам таралди.
Боши, қўллари, бадани, оёқлари — ҳаммаёғи яшил ғу-
борга чулганиб, яшил ғуборга айланди. Вужуди пардек
енгил, пардек шаклсиз, пардек идорасиз бўлиб қолди.
Аллақаёққа уча бошлади. «Сиз ҳам яшил, мен ҳам
яшил... Олам ям-яшил...»

Бир пайт олис-олисдан ниманингdir жиринглагани,
сўнгра ҳамхонасининг бўлса керак, овози эшитилди:

— Трубкани олинг, сизни сўрашяпти.

— Трубкани олинг, сизни сўрашяпти...

У яшил қурга йўғрилиб, яшил ғуборга айланиб кет-
ган, кўзини очолмас... очгиси келмас эди.

МУНДАРИЖА

Отойининг туғилган йили. Қисса 8

Ҳикоялар

Остона	83
Кўк эшик	"	"	"	"	"	"	"	"	"	"	93
Файзининг амакиси	102
Бир оқшом	115
Совуқ	128
Жиян	143
Сен учун энг зўр одам	157
Хотира	169
Оlam ям-яшил	176

Аъзамов, Эркин.

Отойининг туғилган йили: Қисса ва ҳикоялар. (Урта ва катта ёшдаги болалар учун).—Т.: Адабиёт ва санъат нашриёти, 1981.—184 б.

„Машрабнинг оти нега Машраб?“, „Отоин нечанчи йилда туғилган?“ Мана шу саволларга сиз қандай жавоб бергани бўлардингиз?

Эркин Аъзамовнинг „Отойининг туғилган йили“ қиссаси қаҳрамонлари бундай саволларга ўзларича жавоб берадилар ва бу жавоб уларнинг ким, қандай одам ёқаниликларни олгилайди.

Китобга ёш ёзувчининг мазкур қиссасидан ташқари фир неча ҳикоялари ҳам киритилган. Уларда ёшларнинг ҳалоллик, поклик, муҳаббат, садоқат йўлидаги иштимони ва курашлари ҳақида баҳс юритилади.

Аззамов, Эркин. Год рождения Атои: Повесть и рассказы.

ББК 84 У37
У32

Босмахонага берилди 6.01.81. Босишига рухсат этилди 18.08.81. Р 09047 Формати
70×108^{1/2}. Босмахона қоғози № 3. Адабий гарнитура. Юқори босма. Шартли
босма л. 8,05. Нашр л 8,0. Тиражи 60000 Заказ № 415. Бахоси 55 т.
Гафур Гулом иомидаги Адабиёт ва санъат нашриёти. 700129, Тошкент, Навоий
кўчаси, 30.

Ўзбекистон ССР Нашриётлар, полиграфия ва китоб савдоси ишлари Ўзбекистон
Давлат комитетининг Тошкент „Матбуот“ полиграфия ишлаб чиқариш бирлашмасига қарашли
1-босмахона. Тошкент, Ҳамза кўчаси, 21.

Ўрта ва катта ёшдаги болалар учун

На узбекском языке

Эркин Агзамов

Год рождения Атои

Повесть и рассказы

Редактор *Х. Султонов*

Рассом *С. Латипов*

Расмлар редактори *А. Кива*

Техн. редактор *Е. Потапова*

Корректор *З. Турсунбоева*

ИБ № 1687